

# JNUHUN VAHA NI TEE SAN MATEO

---

Lista ñayuu yucūn jeē ní quiji

Jesucristo

(Lc. 3.23-38)

**1** Yāha cúu lista ñayuu yucūn jeē ní quiji Jesucristo. Te máá yá ni quiji nuū yucūn rey David, te David ni quiji nuū yucūn Abraham.

<sup>2</sup>Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i. <sup>3</sup>Te Judá ni cuu de tátá Fares jíin Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram. <sup>4</sup>Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón. <sup>5</sup>Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí. <sup>6</sup>Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xihna gā ni cuu ña ñasihí Urías.

<sup>7</sup>Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa. <sup>8</sup>Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías. <sup>9</sup>Te

Uzías ni cuu de tátá Jotam, te Jotam ni cuu de tátá Acáz, te Acáz ni cuu de tátá Ezequías. <sup>10</sup>Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías. <sup>11</sup>Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

<sup>12</sup>Te náa cáyucú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel. <sup>13</sup>Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor. <sup>14</sup>Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud. <sup>15</sup>Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob. <sup>16</sup>Te Jacob ni cuu de tátá José, tēe ni cuu yii María. Te María ni cuu ña náná Jesús, Yaā naní Cristo.

<sup>17</sup>Te nde Abraham te nde David ni iyo uxí cuūn yucūn. Te nde David te nde náa cuángoo ñayuu Israel preso ñuu Babilonia ni iyo inga uxí cuūn yucūn. Te nde ná ni jengoo i preso te nde ni cacu Cristo, suni ni iyo inga uxí cuūn yucūn.

**Jeē ní cacu Jesucristo***(Lc. 2.1-7)*

<sup>18</sup>Te jeē ní cacu Jesucristo, súcuan ni cuu: Náná yā María, je ni cundaā jeē quijnáhan ña jíin José. Te nde ná tu quijnáhan ña jíin de, te ni jecūhun séhe ña ni sáha Espíritu Santo. <sup>19</sup>Te José, tēe quijnáhan ña jíin, chi tēe ndaā cúu de. Te tu ní cúní de cuáha de jñūhun canu ña, chi sa cúní de jeē na jécuiñī sáhi jēe ma quijnáhan de jíin ña. <sup>20</sup>Te níní súcuan nácani ni de, te jíin jéni ni quee-ni iin ndajéhé maá Jítoho yō Yaā Dios nuū de, te ni cahān yā jíin de:

José, sēhe yucūn David, ma yūhu ró cueca ró ñasihí ró María, chi sēhe jeē scácu ña, vēji i nde nuū maá Espíritu Santo. <sup>21</sup>Te scácu ña iin sēhe yíí. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

<sup>22</sup>Súcuan ni cuu tācá jniñu yáha, návaha squícu jñūhun Jítoho yō Yaā Dios jeē ni cahān tēe ni nacani jñūhun ya nde jenahán. Te suhva ni cahān de:

<sup>23</sup>Coo iin sūchi síhí, te nihīn séhe i, te scácu i iin sēhe yíí, te conaní sūchí un Emanuel. Achí tutu. Te síhví yáha cúní cahān: Yaā Dios ndeé yá jíin yó.

<sup>24</sup>Te ni natahū ni José, te ni sáha de nájñūhun ni cahān ndajéhé Jítoho yō jíin de. Te ni jeca de María ni cuu ña ñasihí de. <sup>25</sup>Te tu ní quíxí de jíin ña, chi nde ni scácu ña sēhe yíí núú ña. Te ni snaní de i Jesús.

**Jeē ní quijicoo tēe mago nuū yā**

**2** Te ná ni cacu Jesús ini ñuu Belén ndañūū Judea, te

tiempo un ndácu rey Herodes jniñu. Yūcuán na te jecu tēe ndíchí jēe cascuáha siquī quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén. <sup>2</sup>Te ni cacajñūhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núú cáne niāndii ni cajito ná iin quími cáhnu jeē cúu seña jeē ní cacu i. Te vējicoo ná chiñūhún ná i, áchí de.

<sup>3</sup>Te rey Herodes, ná ni jini de jñūhun yáha, te ni cunéé ni de, nde jíin táca ñayuu ñuu Jerusalén. <sup>4</sup>Te ni nastútú de tāca sūtū cácujuhnu jíin tēe cástéén tutu ley Yaā Dios nuū ñayuu. Te ni cajñūhún de tēe un ndé nuū cacu Cristo achí tutu.

<sup>5</sup>Te ni cacachi nuū de:

Ini ñuu Belén ndañūū Judea. Chi suhva cáhán nuū tútu ni tee tēe ni nacani jñūhun ya nde jenahán:

<sup>6</sup>Te róhó ñayuu ñuu Belén ndañūū Judá, cújéhnu ga ñuu rō vēsú tāca gá jeē cújéhnu ini Judá. Chi suu ini ñuu rō quenda iin Yaā ndacu jniñu, te coto ya ñayuu maá rí Israel, achí Yaā Dios.

Achí tutu.

<sup>7</sup>Yūcuán na te Herodes ni cana sáhi de tāca tēe ndíchí un jēe naní mago. Te ni cajñūhun yúcún de ndé quíví ní cane quími ún. <sup>8</sup>Te ni tají de tēe un quíngoo de ñuu Belén. Te ni cahān de:

Cuángoo ní te cajñūhun yúcún ní ndé nuū íne sūchí lúlí un. Te núu ni nanihīn ní i, te quijicoo ní castūhun ní nuū ná, návaha suni máá ná quichiñūhún ná i, áchí rey.

<sup>9</sup>Te jeē ní cajini de jñūhun ni cahān rey, te cuangoo de. Te máá

quími cáhnu jeē ní cajito de ichi núu cáne niāndii, yósnúu núu de cuahān nde ni jinū nuū íne sūchi lúlí un, te yūcuan ní jecuiñī. <sup>10</sup>Te ná ni cajito de jeē ní jecuiñī quími ún, te yōhyo ni cacusiī ni de. <sup>11</sup>Te ni jinūcoo de ni quīvícoo de ini vehe, te ni cajito de nuū sūchi lúlí un jíin náná i María. Te ni cajecuiñī yití de nuū i, te ni cachiñúhún de i. Te ni canune de yejnū de, te ni casocō de oro jíin sūje cútú jíin sūje uvuā nuū i. <sup>12</sup>Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

**Jeē ní jinu José cuangoo  
de nación Egipto**

<sup>13</sup>Te náa cuánuhun tāca tée mago, te ni scóto jēni José jeē ñin ndajéhé maá Jítóho yō Yaā Dios ni cahān yā jíin de:

Ndocuiñī te cunu ró quíngoo ró jíin sūchi lúlí jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúlí jíin jeē cáhni de i. Achí yá.

<sup>14</sup>Te ni natahū ni José. Te cuangoo de jíin sūchi lúlí jíin náná i, te ñuú ní cajica de cuangoo de nación Egipto. <sup>15</sup>Te ni coyūcú de yūcuan ndé ni jihī Herodes. Te súcuan ni cuu návāha squícu jnūhun Jítóho yō Yaā Dios jeē ni cáhān tēe ni nacani jnūhun ya nde jenahán: Nde nación Egipto ni cana ri Sēhe ri vēji i, achí Yaā Dios, achí tutu.

**Jeē ní ndacu Herodes jniñu jeē  
na cúu tāca sūchi yíí lúlí**

<sup>16</sup>Yūcuán na te Herodes ni jini de jeē súcuan ni castáhú tée mago un

de, te yōhyo ni quitī ni de. Te ni tají de soldado cuangoo, te ni cajehni tāca sūchi yíí lúlí jeē uú cuiyā jíin jeē yiquín gá jeē cáyucú ini ñuu Belén jíin tāca ñuu yajni. Chi je ni cajnūhun yúcún de tāca tée mago un nasaa tiempo ni cuu jeē ní cacu Jesús. <sup>17</sup>Te súcuan ni squícu jnūhun ni cahān Jeremías, tēe ni nacani jnūhun Yaā Dios nde jenahán, chi ni cahān de:

<sup>18</sup>Ini región Ramá ni jini sōho ri jeē cándahyū te cándahyū cohó. Chi ñahan cácuu yucūn Raquel, cándahyū ña jehē séhe ña, te tu cácuni ña ndusiī ni ña, chi ni cajihī i.

Achí tutu.

<sup>19</sup>Yūcuán na te ni jihī Herodes. Te ni scóto jēni José jeē ñin ndajéhé Jítóho yō Yaā Dios ni cahān yā jíin de nuū ndeé de nación Egipto. <sup>20</sup>Te ni cahān yā jíin de:

Ndocuiñī te nuhun rō ñuu rō Israel jíin sūchi lúlí jíin náná i. Chi je ni cajihī tēe cánducú cahni sūchi lúlí jíin nuú. Achí ndajéhé.

<sup>21</sup>Yūcuán na te ni ndocuiñī de, te cuanuhun de nación Israel jíin sūchi lúlí jíin náná i. <sup>22</sup>Te ni nihīn de jnūhun jeē Arquelao ni nucuiñī de nuū tatá de Herodes, te máa de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhín de región Galilea, te cuangoo de. <sup>23</sup>Te ni jinū de yūcuán, te ni coyūcú de ñuu naní Nazaret. Súcuan ni cuu návāha squícu jnūhun ni cacahān tēe ni canacani jnūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

**Jnūhun Juan tēe scuándute***(Mr. 1.1-8; Lc. 3.1-9, 15-17; Jn. 1.19-28)*

**3** Te ni yāha tiempo, te ni jinū Juan tēe scuándute nde nuū ñūhun téhé ndañū Judea, nacani de jnūhun suhva:

<sup>2</sup>Nacani ni rō jijnáhan rō jēe stóo rō cuéchi rō, chi je ni cuyajni Yaā ndeé andiví jēe ndacu ya jniñu nuū rō. Achí de.

<sup>3</sup>Te Isaías, tēe ni nacani jnūhun Yaā Dios nde jenahán, suhva ni tee de jnūhun Juan nuū tútu:

Coo iin tēe cana jee nde nuū ñūhun téhé:

Sátūhva rō máá rō jijnáhan rō, chi quee maá Jítóho yō.

Te sáha rō jniñu ndaā, chi vēji ya, achi de.

Achí Isaías.

<sup>4</sup>Te sahma ñūhun Juan cúu ixi quití nání camello, te núhni iin cinturón ñi chiji de. Te jeē técu de cúu táca ndicuéhyí jíin ndúxi yocō. <sup>5</sup>Te ñayuu ñuu Jerusalén jíin táca ñayuu región Judea jíin ñayuu yúcu yajni yuyúte Jordán, ni quijicoo i nuū de. <sup>6</sup>Te ni canacani ndaā i cuéchi i nuū Yaā Dios, te ni scuándute de i ini yūte Jordán.

<sup>7</sup>Te ná ni jito de jeē vējicoo cuehē tēe grupo fariseo jíin tēe grupo saduceo nuū scuándute de, te ni cahān de jíin:

Va sēhe coō cácuu rō, chi xeēn rō nájñūhun coō. ¿A cájeni ni rō jeē cuu cunu rō cācu rō núū castigo xeēn jeē quíji? <sup>8</sup>Núu súcuan te sáha rō jniñu váha, te súcuan stéén rō jeē ní canacani ndije ni rō jeē stóo rō cuéchi rō. <sup>9</sup>Te ma cáni ni rō cahān rō jeē cuu cācu rō síquī

jeē cácuu rō yúcu Abraham. Chi cáhán ri jíin rō jeē cuu sáha Yaā Dios jeē táca yúu yáha nduu sēhe Abraham jeē candíje váha, te núu cúní yā. <sup>10</sup>Te cácuu rō nájñūhun nundéhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñūhun je íyó túhva iin cāa jeē cahnde nde yoho yujnu. Núu súcuan te sáha ya jíin rō nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. <sup>11</sup>Te ruhū chi jíin ndute scuándute ri rohó, te yūcuan cúu jeē steén rō jeē ní canacani ni rō jeē stóo rō cuéchi rō. Te Yaā jeē quíji, chi nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhūn. Te Yaā quíji chi cújéhnu ndasí yá. Chi tú na vé jéhnu cuiti cúu ri nuū yā, ni jeē cuajniñu ri nuū yā vēsú iin jniñu lúlí gá nájñūhun jeē quénehen ri ndijēn yā. <sup>12</sup>Te sáha ya nájñūhun sáha tēe scánda trigo, chi sásiin ya ñayuu váha jíin ñayuu cunéé, nájñūhun cúndoo trigo jeē quénda síin paja. Te nastútú yá trigo yā ndiví ini yacā yā. Te paja chi jnaa yā nuū ñuhún jeē ma ndahvá cuiti. Achí Juan.

**Jeē ní jendute Jesús***(Mr. 1.9-11; Lc. 3.21-22)*

<sup>13</sup>Yūcuán na te ni quenda Jesús región Galilea, te ni quee yā yūte Jordán nuū íne Juan, návaha scuándute de ya. <sup>14</sup>Te tu ní cúní Juan scuándute de ya, chi ni cahān de jíin yá:

Sa suhva cánuú jeē scuándute máá ní sãhá, ¿te ndese cúu jeē sa nuū ná vēji ní? áchí de.

<sup>15</sup>Te ni cahān Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. <sup>16</sup>Te ná ni cuu ni jendute Jesús, te ni quenda ya nuū ndúte. Te ni nune-ni andíví, te ni jito ya jeē cúun Espíritu Yaā Dios vēji, te cáa nájnūhun iin paloma, te ni quee xiní yā. <sup>17</sup>Te ichi ándiví ni cahān iin jnūhun:

Yāha cúu Sēhe ri jeē maní ndasí rí jíin, te yōhyo cúsiī ni rí jíin, achí.

**Jeē ní jito ndee jexeén Jesús**

(Mr. 1.12-13; Lc. 4.1-13)

**4** Yūcuán na te ni jinū Jesús nde nuū ñúhun téhé ní sáha Espíritu Santo. Te yūcuán coto ndee jexeén yā, chi cúní jeē sáha ya cuēchi.

<sup>2</sup>Te ni iyo ndite ni yā uū xico nduú uū xico ñuú, sáá te jíí yā sōco.

<sup>3</sup>Te ni quee maá jéxeén jeē coto ndee un yá, te ni cahān jíin yá:

Núu máá ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

<sup>4</sup>Te ni cahān yā jíin:

Tuú chi yósó núū tútu ii: Nasūu máni máá jíin stáa cátecu ñayuu, chi suni jíin táca jnūhun cáhán Yaā Dios, achí yá.

<sup>5</sup>Yūcuán na te cuahān jexeén un jíin yá nde ñuu iī Jerusalén. Te ni jeni ya xiní torre templo. <sup>6</sup>Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chi jnama ya rohó. Chi yósó núū tútu:

Tejníñu ya ndajéhé yā quijicoo coto rōhó.

Te cunundee yā rohó jíjnáhan ya, návāha ma cáchihi ró jéhē rō nuū yuú.

Achí tutu. Achí jexeén.

<sup>7</sup>Te ni cahān Jesús:

Tuú chi suni yósó núū tútu jeē ma coto ndee ñayuu Jítoho i Yaā Dios, núu jnama ya i chí tuú, achí yá.

<sup>8</sup>Te jexeén un ní jeca tucu ya cuahān jíin yá nde xiní iin yucu súcun ndasí. Te ni steén táca nación níí cáhnu ñayivi núū yā, te yōhyo luu cáa ndíhi. <sup>9</sup>Te ni cahān jíin yá:

Táca ñuu yáha cuáha ri nuū rō, te núu cuiñi yítí ró chiñúhún ró ruhū, achí.

<sup>10</sup>Yūcuán na te ni cahān Jesús nuū jexeén:

Satanás, cujiyo quihīn rō, chi yósó núū tútu jeē chiñúhún ñayuu maá Jítoho i Yaā Dios, te nuū maá-ni ya cuajníñu i. Achí yá.

<sup>11</sup>Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejníñu nuū yā.

**Jeē ní quejéé Jesús nácani ya jnūhun región Galilea**

(Mr. 1.14-15; Lc. 4.14-15)

<sup>12</sup>Te ná ni nihīn Jesús jnūhun jeē íne Juan vecāa, te cuanuhun yā región Galilea. <sup>13</sup>Te tu ní cóndee yā ñuu Nazaret, chi ni jehēn yā ni condee yā ñuu Capernaum. Te ñuu un íne yumar, máá región Zabulón jíin Neftalí. <sup>14</sup>Te súcuan ni squícu jnūhun ni tee Isaías, tēe ni nacani jnūhun Yaā Dios nde jenahán:

<sup>15</sup>Región Zabulón jíin Neftalí,

ichi jeē yíhi yumar, lado yūte  
Jordán nuū cáne niāndii,  
jíin región Galilea nuū cáyūcú  
ñayuu tācá nación tu jíiní  
jnūhun ya.

<sup>16</sup> Ñayuu ún chi nájnūhun cáyūcú i  
nuū néē,  
te coto i nájnūhun iin luz cáhnu.  
Te ñayuu je yajni naa, nihin i  
jnūhun váha ndasí,  
suu jnūhun jeē jnama ya anuá i.  
Achí Isaías.

<sup>17</sup> Te nde quiví yúcuan ní quejéé  
Jesús nácani ya jnūhun, te ni cahān  
yā suhva:

Nacani ni rō jijnáhan ró jéé stóo  
ró cuéchi ró, chí je ni cuyajni Yaā  
ndeé andiví jéé ndacu ya jniñu nuū  
rō, achí yá.

**Jeē ní cana ya cuūn tēe jnái chācá**  
(Mr. 1.16-20; Lc. 5.1-11)

<sup>18</sup> Te jíca Jesús yumar Galilea  
cuahān yā. Te ni jito ya nuū uú  
jnáhan ñani. Te iin de cúu Simón  
jeē suni nání Pedro, te inga de cúu  
Andrés. Te tēe cájnií chācá cácuu  
de, te cásinga de ñunu de ini mar.

<sup>19</sup> Te ni cahān yā jíin de:

Condiquin ruhū na quíhín yō, te  
nasáha ri rohó tēe nihin cuehē  
ñayuu candíje ruhū, nájnūhun  
cānihin rō chācá, áchí yá.

<sup>20</sup> Yūcuán na te ni castóo-ni de  
ñunu de, te ni candiquin de ya.

<sup>21</sup> Te ni jica ya jecu gā, te ni jito ya  
nuū inga uū jnáhan ñani. Te cácuu  
de Jacobo jíin Juan, sēhe Zebedeo.  
Te cáyūcú de ini barco jíin tátá de  
Zebedeo, cánachijní de ñunu de. Te  
suni ni cana ya de jeē cóndiquin de ya.  
<sup>22</sup> Te ni castóo-ni de tátá de jíin barco,  
te ni candiquin de ya cuango de.

**Jeē ni stéén yā nuū cuehē ñayuu**  
(Lc. 6.17-19)

<sup>23</sup> Te ni jica cuu Jesús ní región  
Galilea, ni steén yā jnūhun ini  
tācá vehe ií jeē cúu sinagoga. Te  
ni nacani ya jnūhun váha ndese  
ndácu Yaā Dios jniñu. Te ni  
nasávāha ya ñayuu cácuu tācá-ni  
cuehyí. <sup>24</sup> Te ni jitē núu jnūhun ya  
cuahān ní región Siria. Te nuū yā  
ni caquindeca i tāca ñayuu cácuu,  
ñayuu cándoho tijni nuū cuehyí,  
jíin jéé jetú, jíin jéé ñūhun tachí  
ini, jíin jéé jihí yíhí, jíin jéé ni íjin.  
Te ni nasávāha ya i jijnáhan i. <sup>25</sup> Te  
cuehē ñayuu región Galilea jíin  
Decápolis, jíin ñayuu ñuu Jerusalén  
jíin región Judea, jíin tāca ñuu ichi  
núu cáne niāndii yūte Jordán, ni  
cacondiquin i ya.

**Jeē ní nacani ya jnūhun nde nuū yúcu**

**5** Te ni jito Jesús nuū ñayuu  
cuehē. Te ni caa ya yucu  
cuahān yā, te ni cucōo ya. Te tēe  
cáscuáha jíin yá, ni jinūcoo de nuū  
yā yūcuán. <sup>2</sup> Te ni quejéé yá ni steén  
yā tāca jnūhun yáha nuū de:

**Jnūhun yōhyo ndetū**  
(Lc. 6.20-23)

<sup>3</sup> Yōhyo ndetū ñayuu jeē cánacuni  
i jeē tu íyó váha ánuá i siquí cuéchi  
i, chí je ni quivícoo i ndaha Yaā  
andiví jéé ndácu ya jniñu nuū i.

<sup>4</sup> Yōhyo ndetū ñayuu cácuu íhyá  
ni, chí ndusií ni i sáha Yaā Dios.

<sup>5</sup> Yōhyo ndetū ñayuu cáhiyo vitá  
suchí ini, chí ni jejnūhun ya jeē  
cutahū i ñayiví.

<sup>6</sup> Yōhyo ndetū ñayuu jeē  
nájnūhun jeē cájii i sōco cájichí i,

súcuan jnāā i sáha i jniñu ndaā, chi máá yá chindéé ñáhán yá i jeē cuu sáha i.

<sup>7</sup>Yōhyo ndetū ñayuu cákundáhú ni jnáhan, chi suni cundáhú ni Yaā Dios i.

<sup>8</sup>Yōhyo ndetū ñayuu cáhiyo ndoo ini anuá, chi coto i nuū Yaā Dios.

<sup>9</sup>Yōhyo ndetū ñayuu cánasámani jnáhan, chi cahān Yaā Dios jeē sēhe ya cácuu i.

<sup>10</sup>Yōhyo ndetū ñayuu jeē cájito xeēn inga ñayuu i siquī jeē casáha i jniñu ndaā, chi je ni quīvícoo i ndaha Yaā andiví jéé ndácu ya jniñu nuū i.

<sup>11</sup>Yōhyo ndetū maá ró jijnáhan ró núu cácahān neé i nuū rō jeē siquī ruhū, te coto xeēn i rōhó, te stáú yáhu i rōhó, vēsú tú cuēchi ró. <sup>12</sup>Na cúsiñi ni rō jijnáhan ró núu súcuan, te sa víhyá gā cusīñi ni rō, chi cáhnu ndasí coo tahū rō nde andiví. Chi suni súcuan ni cajito xeēn i tāca tée ni canacani jnūhun Yaā Dios jeē ní quijicoo xīhna gā vēsú rohó.

### **Jnūhun yátá siquī ñiñi jín siquī luz**

(Mr. 9.50; Lc. 14.34-35)

<sup>13</sup>Maá ró jijnáhan ró cájejniñu ró ini ñayiví nájñūhun jéjniñu ñiñi nuū cúñu návāha tú tehyū. Te núu ñiñi ún na náā jeē uhvuá, éte ndese nduu uhvuá tucu? Tuá cuajniñu cuiti gā, chi sa cate ñayuu te cueñū i siquī.

<sup>14</sup>Maá ró cácuu nájñūhun luz jeē steén ini anuá ñayuu ñayiví. Te cácuu ró nájñūhun ñiñi nuū íne xini yúcu, jeē ma cúu quisáhí. <sup>15</sup>Te ni tu nástīñi ñayuu ñiñi lámpara te chune i chíji cajón, chi sa suhva jéni i nuū sucún, návāha cundijin

nuū tāca jéé cáyucú ini vehe. <sup>16</sup>Te suni súcuan na stéén rō luz maá ró nuū tāca ñayuu, te suu cúu jeē cúni i jniñu váha casáha ró, te cahān i jeē yóhyo vāha Yaā cúu Tátá rō jeē ndeé yá andiví.

### **Jeē ni stéén yā siquī ley Yaā Dios**

<sup>17</sup>Ma cáni ni rō jijnáhan ró jéé véji ri snáā rī ley jeē ni jéhe Yaā Dios nuū Moisés, jíin jéé snáā rī tāca jnūhun ni cacahān tée ni canacani jnūhun ya jenahán. Tú véji ri jeē snáā rī, chi sa suhva jeē steén cají rí jnūhun ndíso. <sup>18</sup>Chi jendaá cahán rī jíin ró jeē núu níni íyó andiví jíin ñayiví, te ma náā cuiti ni ñiñi punto ni ñiñi letra nuū tútu ley yā, chi nde na squícu tācá ndiñi jnūhun jeē cahán. <sup>19</sup>Núu súcuan te núu ñiñi ñayuu tu squícu i ñiñi jnūhun yáha jéé ndácu ley yā, vēsú ñiñi jnūhun lulí gá cúu, te núu stéén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ñiñi ñayuu squícu i te stéén i jeē squícu ñayuu, yūcuán na te cujéñu i ichi andiví nuū ndácu Yaā Dios jniñu. <sup>20</sup>Chi cáhán rī jíin ró jeē núu tú coo ndaā gā jniñu casáha ró vēsú jniñu casáha tée cástéén tutu ley yā jíin tée grupo fariseo, te ma quívicoo cuiti rō ndaha Yaā andiví jéé ndacu ya jniñu nuū rō.

### **Jeē ni stéén yā jeē ma quití ni yō**

(Lc. 12.57-59)

<sup>21</sup>Je ni cajini ró jnūhun ni cacahān jíin ñayuu jenahán, jeē ma cáhni i ndiyí, te na-ni ñayuu núu cahni i ndiyí, te cundaā cuēchi

i nuū tāca tóhō, achí. <sup>22</sup>Te ruhū chi cáhán rī jín ró, vēsú núu máa jéē quití ni iin ñayuu jító i jnáhan i, suni cundaā siquī cuéchi i ún. Te núu iin ñayuu cahān neé i nuū jnáhan i, núu súcuan te cundaā cuéchi i un núu justicia cujéhu ga. Te núu iin ñayuu cahān i nuū jnáhan i: Róhó jéē canéé íi, achi i, núu súcuan te quívi i nuū ñuhún infierno te núu ma nácani ni i.

<sup>23</sup>Jeē yúcuan te núu ni jinū rō nuū altar jín jéē socó rō nuū Yaā Dios, te núu ni nucūhun ni rō jeē ni sáha ró cuéchi siquī jnáhan ró, <sup>24</sup>núu súcuan te squéndōo ró jéē socó rō ún xiin altar, te xihna gā quihīn rō ndumanī rō jín jnáhan ró. Yūcuán na te nandicó ró socó rō.

<sup>25</sup>Te núu iin ñayuu quihīn i jín ró nuū tohó jeē cacān i cuéchi siquī rō, núu súcuan te níní cuáhān rō jín i ichi te sándaā maá ró jín i, návāha ma squívi i róhó núu juez. Chi juez siáha de róhó núu policía, te chune de róhó vecāa. <sup>26</sup>Te jendaá cahán rī jín ró jeē ma quénda cuiti rō yūcuán, chi nde chunaa rō ndihī cuiti xūhun jéē cájicān de.

**Jeē ni stéén yā jeē ma  
cósiquí ndéē jnáhan**

<sup>27</sup>Ni cajini ró jnúhun ni cacahān jenahán jeē ma cósiquí ndéē jnáhan ñayuu. <sup>28</sup>Te ruhū chi cáhán rī jín ró jeē núu iin tēe ndéhe de nuū iin ñahan jeē ndíyo ni de ña, yūcuán na te je ni casíquí ndéē de ñahan ún ini anuá de.

<sup>29</sup>Núu súcuan te núu tinūu lado váha ró sáha jeē quívi ró cuéchi, váha ga quenehen ró te scáne ró, návāha tuá sáha ró cuéchi.

Chi váha gā jeē náā iin tinūu ró vēsú jeē cóo ndihī yiqui cúñu rō te quihīn rō infierno. <sup>30</sup>Te núu ndaha váha ró sáha jeē quívi ró cuéchi, váha ga cahnde rō te scáne ró, návāha tuá sáha ró cuéchi. Chi váha ga jeē náā iin ndaha ró vēsú jeē cóo ndihī yiqui cúñu rō te quihīn rō infierno.

**Jeē ni stéén yā jeē ma ndusín  
jnáhan**

(Mt. 19.9; Mr. 10.11-12; Lc. 16.18)

<sup>31</sup>Te suni ni cacahān nde jenahán: Núu ndé iin cúní stóo ñasihí, te na cuáha acta nuū ña jeē ndusín jín ña. <sup>32</sup>Te ruhū chi sa cáhán rī jín ró jeē núu iin tēe stóo de ñasihí de, te núu nasūu jéē tǎjni ni ña, núu súcuan te sáha de jeē casíquí ndéē ña de, chi condee ña jín inga tēe. Te núu iin tēe condeca de ñahan ní ndusín, suni casíquí ndéē de ña.

**Jeē ni stéén yā siquī  
jnúhun jéjñuhun téyí**

<sup>33</sup>Te suni ni cajini ró jnúhun jeē ni cáhán jín ñayuu nde jenahán: Núu ni jejnūhun téyí ró jeē squícu ró, jító jínúu Yaā Dios, núu súcuan te cánúu squícu ró jéē ni cáhán teyí ró un, achí. <sup>34</sup>Te ruhū chi cáhán rī jín ró jijnáhan ró jeē ní iin siquī jníñu ma cahán teyí ró nde jín sǎhvī Yaā Dios, ni ma cahán teyí ró jeē jító jínúu yā. Te núu jéjñuhun téyí ró te tú váha jeē ndácunehen ró andíví ni ñayíví. Chi andíví cúu nuū ín mesa nuū ndácu Yaā Dios jniñu. <sup>35</sup>Te ñayívi cúu nájnūhun teyū nuū ín jehē yā. Te ni ma ndácunehen ró ñuu Jerusalén, chi suu cúu ñuu



maá Yáa cúu Rey cujéhnú. <sup>36</sup>Ni ma cahán rō jeē na cóndee cuēchi siquī rō núu tu squícu ró. Ma cahán rō súcuan, chi ma cúu cuíti sáha rō jēē ni ìn ixi xíní rō nducujín chi ndujnúú. <sup>37</sup>Chi suhva-ni cahán rō: Cuu, achi rō. Tuú, achi rō. Chi núu chisóó gá rō jnūhun cahán rō, te nuū jexeén vēji.

**Jeē ni stéén yā jeē ma cuāha yó jēē ndútahū ñayuu**

(Lc. 6.29-30)

<sup>38</sup>Ni cajini ró jnūhun jeē ni cahán jíin ñayuu jenahán: Núu ìn tēē ndahva de tinūu jnáhan de, suni súcuan na ndáhva tinūú de. Te núu ìn tēē stáva de jnūhun jnáhan de, suni súcuan na stáva jnūhun de, áchí. <sup>39</sup>Te ruhū chi sa cahán rī jíin ró: Ma nácuāha ró jēē ndútahū tēē sáha ndevāha jíin ró. Chi sa núu ndé tēē cani de yiqui núú lado váha ró, te váha ga suni cuāha ró ìnga lado cani de, vēsú jeē nácuāha ró jēē ndútahū de. <sup>40</sup>Te núu ndé tēē stáú yáhu de rōhó te quēnde de camisa rō, suni cuāha ró jnūhun jeē na quíhín de jíin ndé ticāchi ró. <sup>41</sup>Te núu ndé tēē scāca de rōhó jēē condiso ró ndajníñu de ìn kilómetro, te caca ró úú kilómetro jíin de. <sup>42</sup>Te na-ni ñayuu núu jíicán i ndajníñu ró, te cuāha ró núu i. Te ñayuu jíicán núu ndajníñu nuū rō, ma sasáhán ró cuāha ró núu i.

**Jnūhun jeē cundáhú ni yō ñayuu cájito uhū yohó**

(Lc. 6.27-28, 32-36)

<sup>43</sup>Te suni ni cajini ró jnūhun jeē ni cahán nde jenahán: Cundáhú ni rō ñayuu cáhiyo maní jíin ró, te

coto uhū rō ñayuu cájito uhū rohó, áchí. <sup>44</sup>Te ruhū chi sa cahán rī jíin ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha siquī rō. Te sáha váha ró jíin ñayuu cáquiti ni nuū rō. Te cacān tahú rō jehē ñayuu cácahān neé núu rō te cájito xeēn i rōhó. <sup>45</sup>Te súcuan stéén rō jeē cácuu ró séhe máá Tátá rō, Yáa ndeé andiví, chi máá yá jéhe niāndii cúndijin nuū ñayuu cunéé jíin ñayuu váha. Te jéhe ya saū nuū ñayuu casáha jniñu ndaā jíin núu ñayuu casáha jniñu neé. <sup>46</sup>Chi núu íyó maní rō jíin máá-ni ñayuu jeē maní jíin ró, te tú na tahū nihín rō nuū yā. Chi nde tēē cástútú xúhun renta jeē castáhú, suni súcuan casáha de. <sup>47</sup>Te núu máni jnáhan ró cahán yiñúhún ró jíin, ¿te na vé jeē váha ga sáha ró núu súcuan? Chi nde ñayuu tu cácañíje Yáa Dios, suni súcuan casáha i. <sup>48</sup>Núu súcuan te ndaā na cóo ndihi jeē sáha ró, nájñūhun íyó ndaā ndihi jeē sáha Tátá rō, Yáa ndeé andiví.

**Jeē ni stéén yā ndese sáha yó jniñu váha**

**6** Te jeē sáha ró táca jniñu váha nuū Yáa Dios, coto ró jēē ma sáha ró máá síquī jeē cúni ñayuu te cuajnúhún i rōhó. Chi núu súcuan sáha ró, te tú na tahū rō cuāha máá Tátá rō, Yáa ndeé andiví. <sup>2</sup>Jeē yúcuan te jeē sáha ró caridad, te ma sáha ró jēē cúni táca ñayuu, nájñūhun casáha tēē stáhú-ni, cáhiin de nuū cúchitú ñayuu ini táca vehe ìi sinagoga jíin núu yáhu. Chi súcuan casáha de nāvaha cuajnúhún ñayuu de jeē

váha cásáha de. Jendaá cahán rī jíin ró jeē tahū de cúu jeē jejnúhún ñayuu de. <sup>3</sup>Te róhó jíjnáhan ró, núu cásáha ró caridad, te sáha yuhu rō, náváha nde amigo váha ró tú cuni jeē sáha ró. <sup>4</sup>Súcuan na sáha yuhu rō caridad. Te máá Tátá rō jeē jíto ya jeē sáha yuhu rō, iin quivī te cuāha ya tahū cuu ró.

**Jeē ni stéén yā ndese cacān tahú yō**

(Lc. 11.2-4)

<sup>5</sup>Te jeē cájicān tahú rō, te ma sáha ró nájñuhun cásáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini tācá vehe iī sinagoga jíin tāca yíqui yáhu, náváha cuni ñayuu te cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de. <sup>6</sup>Te róhó jíjnáhan ró, núu cájicān tahú rō, te ndēvi ró ini vehe ró te casi rō yehyí. Te cacān tahú rō nuū maá Tátá rō, Yaā ndeé yuhu jíin ró. Yūcuán na te máá Tátá rō jeē jíto ya jeē súcuan sáha yuhu rō, sáha ya jeē jícan rō.

<sup>7</sup>Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájñuhun cásáha ñayuu tu cájini jñuhun Yaā Dios. Chi cājeni ní i jeē núu cuehē jñuhun súcuan cahán i, te saá te cuni sōho ya, te tuú. <sup>8</sup>Núu súcuan te ma sáha ró nájñuhun cásáha máá i. Chi máá Tátá rō, je jíni yā na vé cájini ñúhún ró nde ná tu cacān rō nuū yā. <sup>9</sup>Núu súcuan te suhva cacān tahú rō:

Tátá maá ná jíjnáhan ná jēe ndeé ní andiví,  
níní na cóo yíñúhún ná nuū ní,  
chi Yaā iī cúu ní.

- <sup>10</sup>Te ñúhun ni na jēe yachī quiji quivī ndacu ní jniñu ní ñáyiví yáha.  
Te na cóo tācá jniñu nújnahan ní ní,  
nájñuhun íyó ini andiví, súcuan na cóo ini ñáyiví.
- <sup>11</sup>Staā jeē cátecu na táca quíví, cuāha ní núu ná vijna.
- <sup>12</sup>Te cone cahnu ni ni núu tāca cuéchi cásáha ná núu ní, nájñuhun cáhine cáhnu ni na núu ñáyuu casáha cuéchi nuū ná.
- <sup>13</sup>Te ma cuáha ni jnúhun jeē coto ndee jexeén sāñá,  
chi sa suhva jnama ní sáña núu tāca jēe neé.  
Chi máá ní cúu Yaā ndácu jniñu, te jñí ní poder,  
te yōhyo luu cújéhnu ní ní cání.  
Súcuan na cóo. Amén.

Achi rō jíjnáhan ró.

<sup>14</sup>Chi núu cone cáhnu ni rō nuū ñáyuu casáha cuéchi nuū rō, te suni súcuan cone cáhnu ni maá Tátá rō andiví nuū cuéchi ró. <sup>15</sup>Te núu ma cóne cáhnu ni rō nuū ñáyuu casáha cuéchi nuū rō, te suni súcuan ma cóne cáhnu ni maá Tátá rō nuū cuéchi ró jíjnáhan ró.

**Jeē ni stéén yā siquī jnúhun condite ni**

<sup>16</sup>Te núu condite ni rō jeē chiñúhún ró Yaā Dios, te ma sáha ró nájñuhun cásáha tēe stáhú-ni. Chi cásáha de jeē coto xíi de, te súcuan stéén de nuū ñayuu jeē iyó ndite ni de, náváha cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de. <sup>17</sup>Te

máá ró jijnáhan ró, núu íyó ndite ni rō, te sa chuhun vāha ró xínī rō te nandahá núu rō, <sup>18</sup>návāha ma cúni ñayuu jeē iyó ndite ni rō. Chi máá-ni Tátá rō jeē ndeé yuhu yā jín ró, cuni yā, te ñin quivī te cuāha ya tahū cuu ró.

**Ndese coo cúcá yó nde andiví**

(Lc. 12.33-34)

<sup>19</sup>Ma cóndihvī ni rō caya rō ndajniñu cúcá ini ñayivī yáha, chi quivī tiquixin, te cáne xehyu, te tívi. Te suni quívicoo ñacuíhná te sácuihná. <sup>20</sup>Chi sa suhva sáha ró táca jniñu vāha návāha cayā tahū rō nde andiví. Chi yūcuan má quivī tiquixin ni ma cáne xehyu jeē tívi. Ni ma cúu quivī ñacuíhna sácuihná. <sup>21</sup>Chi nde nuū nihín rō tahū vāha ró, yūcuan cúu nuū cóndihvī ni rō siquī.

**Tinūu cúu lámpara yiqui cúñu**

(Lc. 11.34-36)

<sup>22</sup>Tinūu ró cúu nájñuhun lámpara nuū yiqui cúñu rō. Núu súcuan te núu tinūu ró íyó ndijin, te níí-ni yiqui cúñu rō cúndijin. <sup>23</sup>Te núu tinūu ró tu íyó ndijin, te níí-ni yiqui cúñu rō iyó nee. Te suni súcuan cúu ánuá rō, chi núu máni jeē jéni neé ni rō, te nacā jeē nee gā iyó ini anuá rō núu súcuan.

**Jeē ma cóndihvī ni yō siquī xúhun**

(Lc. 16.13)

<sup>24</sup>Ni ñin mozo ma cúu cuajniñu de nuū uū patrón. Chi quitī ni de nuū ñin te coo manī de jín inga, chí squícu vāha de nuū ñin te sájéé ni de nuū inga. Te suni súcuan ma cúu cuajniñu ró núu Yaā Dios te núu máni siquī xúhun ndíhvī ni rō.

**Yaā Dios ndíto ya yohó**

(Lc. 12.22-31)

<sup>25</sup>Núu súcuan te cáhan rī jín ró jijnáhan ró: Ma nácani ndasí ni rō siquī jeē cótecu rō, núu ndese caji rō coho ró, ni siquī sahma, núu ndese cuhun ró. Chi Yaā Dios ni sáha ya jeē técu rō jín yiqui cúñu rō, te nagā ni cuu jeē ma cuáha ya jeē caji rō jín jéé cúhun ró. <sup>26</sup>Condēhe ró ndese cátecu saa, chi tu cátaji tí, ni tu cánastútú tí jeē chívāha tí, ni tú yacā tí. Te vésú súcuan te máá Tátá rō andiví scáji yā tí. Te cánuú ndasí gá rō jijnáhan ró vésú tēcá saa ún. <sup>27</sup>¿Te ndé ñin ró, á cuu scuéhnu ró máá ró sava metro gā, vésú na nácani ndasí ni rō?

<sup>28</sup>¿Te najehē cánacani ndasí ni rō jeē ma nihín rō sahma? Condēhe jijnáhan ró ndese jéé ita tāca yúcū. Chi tu sájniñu, ni tu táú. <sup>29</sup>Te cáhan rī jín ró jeē ni rey Salomón, quivī ní ñuhun de sahma vāha ndasí, tu ní ñuhun de sahma líu súcuan nájñuhun ita ún. <sup>30</sup>Te núu súcuan jéhe Yaā Dios sahma líu ita un jéé jéé vijnā te sajnē cayū nuū ñuhún, te nagā ni cuu rōhó jijnáhan ró jéé ma sáha ya jeē nihín rō sahma. ¿Te naun tu cácandíje nihin ró jéé ndíto ya rohó? <sup>31</sup>Núu súcuan te ma nácani ndasí ni rō siquī jeē caji rō, jeē coho ró, jeē cuhun ró. <sup>32</sup>Chi tāca ñayuu ñayivī jéé tu cácandíje cúu jeē máni siquī jeē yáha cándihvī ni i. Te máá ró jijnáhan ró, chi íyó Tátá rō andiví, te jín yā jeē cājini ñuhún ró tāca jéé yáha. <sup>33</sup>Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jín siquī jeē sáha ró jniñu ndaā jeē núnahan ni yā.

Yūcuán na te sáha ya jeē nihín rō tāca jée yáha. <sup>34</sup>Núu súcuan te ma nácani ni rō siquī jeē cóo sajnē, chi vijna cúu vijna te sajnē cúu sajnē. Chi cani ni rō siquī jnúndóho jeē iyó ná ìn ná ìn-ni quivī.

**Jeē ma cahán yō siquī cuēchi jnáhan yó**  
(Lc. 6.37-38, 41-42)

**7** Ma cahán rō siquī ñayuu ndese sáha i, návāha suni ma cahán Yaā Dios cuēchi siquī maá ró jeē casáha ró súcuan. <sup>2</sup>Chi nájnūhun cácahān rō siquī cuēchi ñayuu, suni súcuan cahān yā siquī cuēchi ró. Te cūhva jeē cándihvī ni rō siquī i, suni cūhva yúcuan sáha ya jíin ró. <sup>3</sup>Chi cuēchi jnáhan ró cúu nájnūhun jeē íne ìn yāca lúli tīnūu i. ¿Te naun casáha ró cuenta jeē súcuan, te tu casáha ró cuenta cuēchi maá ró jeē cúu nájnūhun jeē íne ìn nduhu tīnūu maá ró? <sup>4</sup>¿Te naun cácahān rō jíin jnáhan ró: Na táva rī yāca íne tīnūu ró, te tu cánacani ni rō jeē íne ìn nduhu tīnūu maá ró? <sup>5</sup>Tēe stáhú-ni cácuu ró núu súcuan. Xihna gā tīnūu maá ró tava rō nduhu, te yūcuán na te cuu condēhe váha ró jée táva rō yāca tīnūu jnáhan ró.

<sup>6</sup>Ma sáha fuerza rō ñayuu cunée quívicoo i nuū jnúhun ìi yā núu tu cúní i. Chi ndonda i siquī rō nájnūhun ina jeē cáyihī tī rohó. Te ma nácani ró jnúhun ya nuū ñayuu jeē tu cúní cuiti cuajnúhún. Chi cándāa i nájnūhun quinī jeē jeñú tī siquī perla jeē ndeé yahu ga.

**Cacān yō nuū yā te nihín yō**

(Lc. 11.9-13; 6.31)

<sup>7</sup>Cacān rō nuū Yaā Dios, te cuāha ya nuū rō. Te nducú ró tāca jée váha iyó

nuū yā, te nihín rō sáha ya. Te cacān tahú rō nde nihín rō, nájnūhun sáha ñayuu cahán yehyí ndé nune quívī i. <sup>8</sup>Chi tāca ñayuu jicán, cuāha ya nuū i. Te ñayuu nducú, suni nihín i. Te ñayuu cahán, nune ya ichi nihín i jeē cúní i.

<sup>9</sup>¿Te ndé ìn rōhó núu sēhe ró jicán i staā nuū rō, te á cuāha ró ìn yuū nuū i? <sup>10</sup>¿Te núu jicán i ìn chācá, te á cuāha ró ìn coō nuū i? Tú cuiti súcuan. <sup>11</sup>Núu súcuan te maá ró jijnáhan ró, vēsú ñayuu iyó cuēchi cácuu ró, te cájini rō cuāha ró jée váha nuū sēhe ró. Te nagā ni cuu maá Tátá rō andiví jée ma cuāha ya jeē váha nuū ñayuu jicán nuū yā.

<sup>12</sup>Te nájnūhun cúní rō jeē sáha váha ñayuu jíin ró, suni súcuan na sáha váha ró jíin i. Chi tutu ley Moisés súcuan ndácu jniñu, jíin táca tutu tēe ni canacani jnúhun Yaā Dios.

**Siquī jeē quívī yó yéhyí túu**

(Lc. 13.24)

<sup>13</sup>Condihvī ni rō quívicoo ró ndaha Yaā Dios. Chi cúu nájnūhun ìn yéhyí túu. Chi yéhyí jíin ichi jeē cuahán nuū jnahnú ndetú ñayuu, jíté te cáhnu, te cuehē i quívicoo yūcuán. <sup>14</sup>Te yéhyí jíin ichi jeē cuahán nuū nihín tahú i cotecu i, chi tuū yehyí te cuíni ichi, te jecu-ni i cánihin i.

**Jíin jniñu casáha ñayuu te nácuni yō ndese ñayuu cácuu i**

(Lc. 6.43-44)

<sup>15</sup>Te ma cándije cuiti rō tēe stáhú jée cácahān de jeē jnúhun Yaā Dios cánacani de. Chi nájnūhun lanchi, quití tú xeēn, súcuan casáha de vējicoo de nuū rō. Te ini anuá de chí cácuu de nájnūhun yihī, quití xéén. <sup>16</sup>Jíin jniñu casáha de te

nacuni rō de ndese tēe cácuu de. Chi cúu nájnūhun jeē tu scóyo ró ndehē uva xinī iñu, ni tu scóyo ró higo xinī iñu yóquin. <sup>17</sup>Te tācá yujnu váha chi jéhe ndehē váha, te yujnu neé chi cúun ndehē neé. <sup>18</sup>Iñ yujnu váha ma cúun ndehē neé, te ni ñin yujnu neé ma cuáha ndehē váha. <sup>19</sup>Te tācá yujnu jeē tu jéhe ndehē váha, chi tahndē te cayū nuū ñuhún. <sup>20</sup>Te suni súcuan cácuu tēe ún, chi jíin jniñu casáha de te nácuni rō ndese tēe cácuu de.

**Nasūú ndihi ñayuu quivicoo andiví**

(Lc. 13.25-27)

<sup>21</sup>Nasūú ndihi ñayuu jeē cahán i Jitoho i ruhū cúu jeē quivicoo nuū ndácu Tátá rī jniñu nde andiví. Chi quivicoo máá nene ñayuu jeē squícu jniñu cúní Tatá rī andiví. <sup>22</sup>Te quiví jeē sándaá rī jniñu ñayuu, te cuehē i cahán jíin rí: Jitoho na jíjnáhan ná, ni canacani ná jnúhun jíin síhví ní, te ni caquenehen ná táchí jíin síhví ní, te ni casáha ná cuehē jniñu jéhu jíin síhví ní jeē náá ni ñayuu sáha. Achi i. <sup>23</sup>Yūcuán na te cahán rī jíin ñayuu ún: Tu jíiní cuítí rī rohó. Cuiyo quingoo ró, chi ñayuu casáha jniñu neé cácuu ró, achi rī.

**Siquí uú vehe**

(Lc. 6.47-49; Mr. 1.22)

<sup>24</sup>Núu súcuan te tāca ñayuu jeē cájini sōho jnūhun cáhán rī te squícu i, cácuu i nájnūhun ñin tēe ni nacani váha ni, te ni jeni de vehe de siquí cáva. <sup>25</sup>Te ni cuun saū, te ni ndaa yūte, te ni quee tachí xeén, te ni cachundahá vehe ún. Te tu ní cótúú, chi siquí cáva

ndéé. <sup>26</sup>Te tāca ñayuu jeē cájini sōho jnūhun cáhán rī te tu squícu i, cácuu i nájnūhun ñin tēe cánéé jeē ní jeni de vehe de nuū ñíti. <sup>27</sup>Te ni cuun saū, te ni quiji ndute ñuhún cuehē, te ni quee tachí xeén, te ni cachundahá vehe ún. Te ni cótúú-ni, te ni naa ñi-ni. Achí yá jíin i jíjnáhan i.

<sup>28</sup>Te ná ni jíinu ni cahán Jesús tāca jnūhun váha, te ñayuu cuehē un ní canaa ni i ni cajini i jnūhun ni steén yá. <sup>29</sup>Chi ni steén váha ya nuū i, chi máá yá cúu jeē ndíso jniñu siquí ndihi. Te tēe cástéén tutu ley Yaā Dios, tu súcuan cástéén de.

**Jeē ní nasávāha ya ñin tēe ndóho cuehyí stehyú**

(Mr. 1.40-45; Lc. 5.12-16)

**8** Te ni nanuu Jesús yucu ún, te cuehē ñayuu cándiquin i ya. <sup>2</sup>Te ñin tēe ndóho cuehyí stehyú, ni quee de nuū yá. Te ni jecuiñí yití de nuū yá, te ni cahán de jíin yá: Jíní na jéé cuu sáha ní jéé nduvāha ná, te núu cúní ni, áchí de. <sup>3</sup>Te Jesús ni soó yá ndaha ya siquí de, te ni cahán yá:

Cúní rī. Te na nduvāha ró, áchí yá. Te ná ni cahán yá súcuan, te ni nduvāha-ni tēe ndóho cuehyí stehyú un. <sup>4</sup>Yūcuán na te ni cahán Jesús jíin de:

Ma cáchi cuítí rō nuū ní ñin. Chi quisteén rō maá ró nuū sutú, te condahá ró jeē socó rō nuū Yaā Dios, nájnūhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

**Jeē ní nasávāha ya mozo capitán**

(Lc. 7.1-10)

<sup>5</sup>Te ni quiví Jesús ñuu Capernaum. Te ñin tēe nación Roma

jeē cúu capitán, ni quee de nuū yā, te ni cahān ndahú de jíin yá:

<sup>6</sup>Mozo na catú i vehe ná, chi ni jíin i te ndóho xeēn i, áchí de.

<sup>7</sup>Te ni cahān Jesús:

Quihīn rī nasávāha ri i núu súcuan, áchí yá.

<sup>8</sup>Te ni cahān capitán jíin yá:

Tu cújéhu ná jéē quihín ni quívi ní vehe ná. Chi máá jéē cahán-ni ní, te na ndúvāha-ni mozo na.

<sup>9</sup>Chi máá ná suni ndíso jniñu ná ní casáha tēe cácujehu ga. Te cújéhu ná núu táca soldado na. Te núu cáhán na jíin iin de jeē na quíhín de, te cuahān de. Te núu cáhán na jíin inga de jeē na quíji de, te quíji de. Te núu ndácu ná iin jniñu nuū mozo na, te sáha i. Achí de.

<sup>10</sup>Te jeē ní jini Jesús jnūhun yáha, te ni naa ni yā. Te ni cahān yā jíin ñáyuu cándiquin yā ún:

Jendaá cahán rī jíin ró jeē ni nación yō Israel tu ní níhín rī ni iin ñayuu candíje nihin súcuan, nájñuhun cándíje tēe yáha, vēsú tēe nación tu jíin jnūhun Yaā Dios cúu de. <sup>11</sup>Te cáhán rī jíin ró jeē quíjicoo cuehē ñayuu ichi núu cáne niāndii jíin ichi núu quee niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andíví. <sup>12</sup>Te sava ñayuu nación Israel jeē maá i quívicoo núu, te sa quenehen ya i quihīn i nuū nēē, chi tu ní cácandíje i. Te yūcuan ndáhyū i te nacayihí yuhu i jeē ndoho xeēn i. Achí yá.

<sup>13</sup>Yūcuán na te ni cahān yā jíin tēe cúu capitán:

Cuánuhun vehe ró, chi sáha ri nájñuhun cándíje ró jéē sáha ri.

Te mozo de un ní nduvāha-ni i máá hora un.

**Jeē ní nasávāha ya naná chiso Pedro**

(Mr. 1.29-31; Lc. 4.38-39)

<sup>14</sup>Te ni jehēn Jesús vehe Pedro. Te ni jito ya naná chisó de jeē catú ña yíhi quíji ña. <sup>15</sup>Te ni jniñi ya ndaha ña, te ni quenda-ni quíji ún ña. Te ni ndocuññi ña, te ni sáha ña jeē ní cayeji de jíin yá.

**Jeē ní nasávāha ya cuehē ñayuu**

(Mr. 1.32-34; Lc. 4.40-41)

<sup>16</sup>Te jeē ní cuaa ni quecoo ñayuu jíin cuehē ñayuu jeē ñúhun tachī ini i. Te ni quenehen ya tachī un cuángoo jíin jnūhun cáhán-ni ya. Te suni ni nasávāha ya tāca ñáyuu cácuñhū. <sup>17</sup>Te súcuan ni cuu návāha cundaā jnūhun ni cahān Isaías, tēe ni nacani jnūhun Yaā Dios jenahán: Máá yá ni tejiyo ndínuū cuehyī cándoho yó, áchí Isaías.

**Siquī ñayuu jeē cácuni i condiquin i ya**

(Lc. 9.57-62)

<sup>18</sup>Te ni jito Jesús jeē ní ndicó ndúu cuehē ñayuu yā. Te ni cahān yā jíin tēe cácuáha jíin yá jeē na yáha de jíin yá inga lado mar. <sup>19</sup>Te iin tēe stéén tutu ley Yaā Dios, ni quee de nuū yā, te ni cahān de:

Maestro, condiquin na níhín quíhín yō ndé-ni cúu-ni nuū quihín ni, áchí de.

<sup>20</sup>Te ni cahān Jesús jíin de:

Tāca ñúcuui, íyó yáū cava cáñuhun ti. Te suni saa, iyó táca tī. Te ruhū, Yaā ní nduu tēe, tuú nuū cusú ri, achí yá.

<sup>21</sup>Te inga tēe ni cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, áchí de.

<sup>22</sup>Te ni cahān Jesús jíin de:

Condiquīn ruhū na quíhín yō. Te stóo tāca ndíyi na chíndūji jnāhan ndīyi, chí ndīyi cácuu ñayuu tu cácanđíje. Achí yá.

**Jeē ní jecuiñī tachī níhin jíin mar ni sáha ya**

(Mr. 4.35-41; Lc. 8.22-25)

<sup>23</sup>Yūcuán na te ni quívi Jesús ini barco, te tēe cáscuáha jíin yá ni quívicoo de cuahān de jíin yá. <sup>24</sup>Te nuū mar ni jequīhi iin tachī níhin, te ni stónnda ndute mar, ni quívi ini barco un. Te Jesús chí quíxí yā. <sup>25</sup>Te tēe cáscuáha jíin yá ni castónnda de ya, te ni cacahān de:

Jnama ní yóhó, chí je queé yó chíji ndute, áchí de.

<sup>26</sup>Te ni cahān yā jíin de:

¿Naun cáyūhú ndasí ró? Te tu cácanđíje níhin ró jēe cácu ró sáha ri, achí yá.

Yūcuán na te ni ndocuiñī yā, te ni cahān yā nuū tachí níhin un jíin nuū mar. Te ni cuu nayúú íi-ni. <sup>27</sup>Te ni canaa ni de jíjnāhan de, te ni cacahān de:

¿Ndé iin ga cúu tēe yáha, jēe ndé tachī níhin jíin mar cájetáhú jēe cahán de? áchí de.

**Tēe Gadara jeē cándoho tachī**

(Mr. 5.1-20; Lc. 8.26-39)

<sup>28</sup>Te ni jinū yā inga lado mar, máá región ñayuu Gadara. Te uū tēe ni quendacoo de nde nuū yíndūji ndīyi, ni quijnahan de ya. Te cáñuhun tachī ini de, te siquī jeē yóhyo xeēn tachī ún, te ni iin ñayuu tu cúu

yáha i ichi yúcuán. <sup>29</sup>Te ni cacana cóhó de ni casáha tachī:

¿Naun vēji ní núu ná, Jesús Sēhe Yaā Dios? ¿A vēji ní yáha jeē stóho ní sáña ndé ná tu quee maá quívī? áchí.

<sup>30</sup>Te nde jicá jecu cáhiin cuehē quīnī cájitu ti. <sup>31</sup>Te tachī jeē cáñuhun ini tēe un ní cacahān ndahú jíin yá:

Núu quenehen ní sáña, te cuāha ni jnúhun na quívicoo ná ini quīnī cáhiin yūcuán, áchí.

<sup>32</sup>Te ni cahān yā jíin:

Cuángoo núu súcuán.

Te ni quendacoo tachī ún ini tēe ún, te ni quívicoo ini quīnī. Te quīnī un ní cajinu ti ni caníngava ti iin yucáva, te ni ndaquīhi ti ndute mar, ni cajihī tī.

<sup>33</sup>Te tēe cándito ti ni cajinu de cuangoo de jeē ní cayūhú de. Te ni najinūcoo de ñuu. Te ni cacastūhún de tācá jniñu yúcuán, jíin ndese ni cuu jeē ní quendacoo tachī ini ndíndúú tēe ún. <sup>34</sup>Yūcuán na te ndíivi ñayuu ñuu un, ní quendacoo i cuacondēhé i Jesús. Te ná ni jinūcoo i nuū íne ya, te ni cacahān ndahú i jíin yá jeē na quénda ya región yúcuán quíhín yā.

**Jeē ní nasávāha ya iin tēe ndóho cuehyī ni íjin**

(Mr. 2.1-12; Lc. 5.17-26)

**9** Yūcuán na te ni ndívi Jesús ini barco. Te ni nayāha ya cuahān yā inga lado mar, te ni najinū yā ñuu maá yá. <sup>2</sup>Te ni caquindeca ñayuu iin tēe ndóho cuehyī ni íjin, cátu de nuū iin camilla. Te ni jini Jesús jeē cácanđíje i jeē cúu nasávāha ya tēe ní íjin ún. Te ni cahān yā jíin de:

Na ndúndeyí ni rō séhē, chi je íne cáhnu ni rī nuū tāca cuéchi ró, áchí yá.

<sup>3</sup>Yūcuán na te jecu tēe cástéén tutu ley Yaā Dios, ni cajeni ni de siquī yā: Jeē cahán tēe yáha súcuan, chi cáhán de jnūhun ndevāha jeē quití ni Yaā Dios. <sup>4</sup>Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? <sup>5</sup>Jeē uú jnūhun yáha, ¿ndé iin yí gá cáa? ¿A jéé cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuiñī te caca ró, chi je ni nduvāha ró, achi rī? <sup>6</sup>Te vijna te na stéén rī jeē maá rí, Yaā ní nduu tēe, ndíso jníñu ri ini ñayívi yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Ndocuiñī te naquihin ró camilla rō te quinuhun rō vehe ró, áchí yá jíin de.

<sup>7</sup>Yūcuán na te ni ndocuiñī-ni tēe ún, te cuanuhun de vehe de. <sup>8</sup>Te ná ni cajito ñayuu un jéé súcuan ni sáha ya, te ni cayúhú i. Te ni cacahān i jeē yóhyo vāha Yaā cúu Yaā Dios jeē súcuan ni jēhe ya poder nuū iin tēe jeē cúu nasávāha de ñayuu, achí i cájito i Jesús.

### Jeē ní cana ya Mateo

(Mr. 2.13-17; Lc. 5.27-32)

<sup>9</sup>Te ni quenda Jesús yūcuan cuáhān yā. Te ni jito ya nuū iin tēe nání Mateo, néne de nuū cutútú xúhun renta. Te ni cahān yā jíin de:

Condiquin ruhū na quíhín yō.

Te ni ndocuiñī de, te cuahān de jíin yá.

<sup>10</sup>Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe casáha cuéchi, suni cáyúcú de cáyeji de staā jíin Jesús jíin tēe cáscuáha jíin yá. <sup>11</sup>Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe casáha cuéchi? áchí de.

<sup>12</sup>Te ni jini Jesús, te ni cahān yatá yá jíin de:

Ñayuu cáhīyo vāha, tu jíini ñúhún i tēe tájné, chi ñayuu cácuahú cúu jeē jíini ñúhún. <sup>13</sup>Cuáhán jíinánhan ró núu súcuan, te nacani ni rō na vé cúu jeē cahán jnūhun yáha jéé yosó núu tútu i: Cúni rī jeē na cúndáhú ni rō jnánhan ró, nasūu jéé socó rō quití nuū rī, achí Yaā Dios nde jenahán. Te ruhū nasūu jéé véji ri cana ri ñayuu tú cuéchi, jeē cúu i nájnūhun ñayuu cáhīyo vāha, chi sa suhva véji ri cana ri ñayuu iyó cuéchi, jeē na nácani ni i te stóo i cuéchi i. Achí yá.

### Jeē ní cacajñuhún de ya siquī jeē cóndite ni

(Mr. 2.18-22; Lc. 5.33-39)

<sup>14</sup>Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Saña jíin tēe grupo fariseo, tíjni jínu cáhīyo ndite ni na núu Yaā Dios. Te tēe cáscuáha jíin máá ní, ¿naun tu casáha de súcuan?

<sup>15</sup>Te ni cahān Jesús jíin de:

¿A cuu condite ni de níní jéé iyó rí jíin de? ¿A cuu cucuíhyá ni ñayuu cáhīin vico nándāha, te núu níní néne tēe nándāha? Te quee



quivī jeē cújiyo tēe nándāha, te quivī ún chi condite ni i.

<sup>16</sup>Te ni cahān yā uū jnūhun yátá síquī jeē tu quíjnāhan jnūhun jeé jéé steén yā jíin táca jnūhun jengahán. Achí yá:

Ni iin tu náchuhun iin pedazo sahma jéé núu iin sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáhnū ga nuū catáhdé un. <sup>17</sup>Te suni tu cáchuhun vino jeé ini ñii túhú. Chi núu súcuan te ndatā ñii ún, te naa vino jíin ñii. Chi cánúú jéé chūhun i vino jeé ini ñii jéé, te súcuan te quéndō vāha ndíndúú. Achí yá.

**Jnūhun sēhe síhí Jairo jíin ñahan ní quehé yusáhma ya**

(Mr. 5.21-43; Lc. 8.40-56)

<sup>18</sup>Te níní cáhán Jesús táca jnūhun yáha, te iin tēe cújéhnū nuū ñáyuu hebreo, ni quee de nuū yā. Te ni jecuiñī yití de nuū yā, te ni cahān de:

Sēhe síhí ná sá ní jihī i. Te núu na quihín yō soó ní ndaha ní síquī i, te natecu i. Achí de.

<sup>19</sup>Te ni ndocuiñī Jesús, te cuahān yā jíin de, te suni cuangoo tēe cáscuáha jíin yá. <sup>20</sup>Te mēhñū ñáyuu cuangoo jíin yá ni quee iin ñahan, te je ní cuu uxī uū cuiyā ndóho ña cuehyī ñiñī. Te ni quee ña ichi yátá yā, te ni quehé ña yusáhma ya. <sup>21</sup>Chi ni jeni ni ña: Vēsú maá sahma ya na níhín rī quehé rí, te nduvāha ri, jéni ni ña. <sup>22</sup>Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jéé cuu nasávāha ri rohó,

te jeē yúcuán ní nduvāha ró, áchí yá.

Te ni nduvāha ña maá hora un.

<sup>23</sup>Te ná ni jinū Jesús vehe tēe cújéhnū ún, te ni jito ya nuū tēe cácuu músico jeē quíchindūji de i, jíin núu ñáyuu cuehē, cásávaā i.

<sup>24</sup>Te ni cahān yā jíin i:

Cujiyo jíjnāhan ró, chi sūchi síhí yáha, tu ní jíhí i chi quixí-ni i, áchí yá.

Te ni cajecū catá i jeē ni cáhān yā.

<sup>25</sup>Te ni quenehen ya ñáyuu cuehē ún, te ni quivī ya ini vehe. Te ni jniñi ya ndaha sūchi síhí ní jihī ún, te ni ndocuiñī-ni i. <sup>26</sup>Te ní región yúcuán ní jitē núu jnūhun jniñū jéhnū ní sáha ya ún.

**Jeé ní nasávāha ya uū tēe cuáá**

<sup>27</sup>Te ni quenda Jesús yúcuán cuahān yā. Te uū tēe cuáá cuángoo de yatā yā, cácana jee de:

Maá ní jeé cúu ní Sēhe yucūn David, cundáhú ni ní sáña víi, achí de.

<sup>28</sup>Te ná ni jinū yā vehe, te ni jinúcoo tēe cuáá un núu yā. Te ni cahān yā jíin de:

¿A cácandíje ró jéé cúu nanune ri tinūu ró? achí yá.

Te ni cacahān de:

Cácandíje ná, áchí de.

<sup>29</sup>Yúcuán na te ni tee ya ndaha ya tinūú de, te ni cahān yā:

Na sáha ri nájnūhun cácandíje ró, áchí yá.

<sup>30</sup>Te ni cananune-ni tinūú de. Te Jesús ni cahān nihin ya jíin de:

Ma cáchi cuiti rō nuū ni iin, áchí yá.

<sup>31</sup>Te maá de chi ni quendacoo de, te ni cajete-ni de jnūhun ní región

yūcuan jēē súcuan ni sáha ya jíin de.

**Jeē ní nasávāha ya iin tēe ñíhín**

<sup>32</sup>Te nuū ní quendacoo tēe un cuángoo de, te ni quecoo ñayuu jíin iin tēe ñíhín, jeē ñúhun tachī ini de. <sup>33</sup>Te ni quenehen ya tachī un cuáhān. Te tēe ñíhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiti yō ni iin jniñu súcuan ini ñuu Israel, achí i.

<sup>34</sup>Te tēe grupo fariseo chi ni cacahān de:

Tēe yáha chi quenehen de tachī jíin fuerza maá jexeén jeē cujéhnú nuū tachī, achí de.

**Jeē cundáhú ni yā ñayuu cuehē**

<sup>35</sup>Te ni jica cuu Jesús tācá ñuu jíin rancho, te ni steén yā jñúhun ini tācá vehe i sinagoga. Te ni nacani ya jñúhun vāha ndese ndácu Yaā Dios jniñu. Te ni nasávāha ya ñayuu cácu hū na-ni cuehyī cándoho i. <sup>36</sup>Te cundáhú ni yā jíto ya nuū ñáyuu cuehē ún. Chi cándoho i te cácu híhyá ni i, chi cácu i nájnúhun lanchi jeē tú jítoho tī, chi tu ndíquin i Yaā cúu Jítoho i. <sup>37</sup>Yūcuán na te ni cahān yā jíin tēe cácuáha jíin yá:

Ñayuu yáha cácu i nájnúhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. <sup>38</sup>Núu súcuan te cacān tahú rō nuū maá Jítoho rō Yaā Dios jeē na tájij yá cuehē tēe na quíngoo de cahnde de trigo, cúu jeē nácani de jñúhun ya nuū ñáyuu. Achí yá.

**Jeē ní nacāji ya uxí uū tēe apóstol**

(Mr 3.13-19; Lc. 6.12-16)

**10** Yūcuán na te ni cana ya uxí uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jēē nasávāha de ñayuu cácu hū tācá ndínuū cuehyī.

<sup>2</sup>Te yáha cúu síhví ndihúxí uū tēe apóstol un: Tēe iin cúu Simón jeē suni nání Pedro, jíin ñani de Andrés. Te uū gā de cácu sēhe Zebedeo, te nání de Jacobo jíin Juan. <sup>3</sup>Yūcuán na te Felipe, Bartolomé, Tomás, Mateo tēe ni stútú xúhun renta, Jacobo sēhe Alfeo, jíin Lebeo jeē suni nání Tadeo, <sup>4</sup>jíin Simón tēe grupo cananista, jíin Judas Iscariote, tēe jeē ní nastúu de ya.

**Jeē ní tají yá ndihúxí uū de quinacani de jñúhun**

(Mr. 6.7-13; Lc. 9.1-6)

<sup>5</sup>Te ni tají Jesús ndihúxí uū tēe yáha jeē quíngoo de. Te ni ndacu ya jniñu nuū de ndese sáha de:

Ma quíngoo ró núu ñáyuu jeē násúu ñáyuu hebreo cácu i, ni ma quívicoo ró táca ñuu ñayuu Samaria. <sup>6</sup>Chi nuū maá-ni ñayuu nación yō Israel quíngoo ró, chi cácu i nájnúhun lanchi jeē ní sana. <sup>7</sup>Te jeē quíngoo ró te suhva nacani ró jñúhun: Je ni cuyajni Yaā ndeé andíví jeē ndacu ya jniñu nuū rō, achí rō. <sup>8</sup>Te nasávāha ró ñáyuu cándoho cuehyī stehyú jíin ñáyuu cándoho tāca gá cuehyī, te nastécu rō ndīyí te quenehen ró táchī ini ñayuu. Te súcuan-ni ni jēhe ri

poder nuū rō jeē sāha ró, te suni súcuan-ni sāha ró jíin i.

<sup>9</sup>Te ma cóndiso ró xúhun oro, ni xúhun plata, ni centavo cuechí. <sup>10</sup>Ni ma cóndiso ró ñunu stáa caji rō ichi, ni inga camisa, ni ndijēn, ni vara. Chi siquī jniñu jeē nácani ró jnúhun nuū ñáyuu, te cánuu coto i rōhó.

<sup>11</sup>Te na-ni ñuu chí rancho núu ni jinūcoo ró, te yūcuán nducú ró ñin ñáyuu vāha, te coyūcu ró vehe i nde quingoo tucu ró. <sup>12</sup>Te jeē quívī ró vehe ñáyuu ún, te cahān rō jeē na quíji jnúhun ndeyí jnúhun sī ni nuū i. <sup>13</sup>Te núu ñáyuu vāha cácuu i, te jnúhun ndeyí ní cahān rō quendōo siquī i. Te núu nasūu ñáyuu vāha cácuu i, te jnúhun ndeyí ní cahān rō ma quéndōo siquī i. <sup>14</sup>Te núu íyó ñáyuu jeē tu cájetáhú i rōhó, ni tu cúní i cuni nahín i jnúhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. <sup>15</sup>Jendaá cahán rī jíin ró jeē quívī juicio te xeēn gā coo castigo siquī ñuu casáha súcuan vēsú siquī ñuu Sodoma jíin ñuu Gomorra nuū ní casáha ndasí ñáyuu cuēchi.

#### Jeē coto xeēn ñáyuu de jíjnáhan de

<sup>16</sup>Cuni sōho ró, chi tájí rí rohó quíngoo ró nájnūhun lanchi mēhñu yíhī. Núu súcuan te coo listo rō nájnūhun coō, te coo vitá ni rō nájnūhun paloma. <sup>17</sup>Te condito ró máá ró nuū ñáyuu, chi quee quívī jeē quíndeca i rōhó núu tohó, te caní i rōhó ini tācá vehe ñi sinagoga. <sup>18</sup>Te suni nde nuū tācá gobernador

jíin rey quíndeca i rōhó jéē siquí ruhū. Te súcuan te nune ichi jeē nacani ndaā rō jnúhun ri nuū de jíin núu ñáyuu tācá nación jeē tu jíin jnúhun Yaā Dios. <sup>19</sup>Te núu ni jendeca i rōhó núu tāca tée ún, ma nácani ndasí ni rō ndese cahān rō. Chi máá hora un te máá yá steén nuū rō ndese cahān rō. <sup>20</sup>Chi nasūu máá ró cúu jeē cahán, chi Espírítu máá Tátá rō cúu jeē cahán jíin yuhu ró.

<sup>21</sup>Te sava ñáyuu tu cácadíje, nastúu i ñani i jeē na cúu. Te tátá nastúu sēhe. Te sēhe ndonda siquī tatá jíin náná jeē na cúu. <sup>22</sup>Te ndihí ñáyuu quítī ni i nuū rō jeē siquí ruhū. Te ñáyuu jeē cuiñi ñihin nde jeē jínu jnúndóho, ñáyuu ún chi cācu ánuá i. <sup>23</sup>Te núu cájito xeēn i rōhó ñin ñuu, te cunu ró quíhīn rō inga ñuu. Chi jendaá cahán rī jíin ró jeē ma ndécava ró caca cuu ró ndihí nación yō Israel te ndiji-ni máá rí, Yaā ní nduu tēe.

<sup>24</sup>Ñin tēe scuáha, tu cújéhnu de nuū maestro de. Ni tēe cúu mozo, tu cújéhnu de nuū patrón de. <sup>25</sup>Tēe scuáha chi nájnūhun ndóho maestro de suni súcuan ndoho nahín máá de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

#### Jeē ní cachi yā ndé ñin cúu jeē yūhu yó

(Lc. 12.2-9)

<sup>26</sup>Núu súcuan te ma yūhu ró coto ró ñáyuu. Chi tāca jnúhun cácahān sáhí i ma quéndōo sáhí cuítī, chi

ndihí natūu ndijin, te cuni ñayuu.  
 27 Jnūhun ní cahān rī jín ró jeē tu ní jíní ñayuu, na nácastūhun cájī ró nuū i. Te jnūhun ní nacani sāhi rí nuū rō, na nácani jee ró yātā tācá vehe. 28 Te ma yūhu ró coto ró ñayuu cahni yiquí cúñu rō, chi ma cúu cahni i ánuá rō. Chi sa suhva yūhu ró jēe ma stívi ró núu Yaā Dios, chi cuu snáhnú ndetū yā rohó jēe quívi ánuá rō jín yiquí cúñu rō infierno.

29 Te tācá saa chi tú yahu ndéé tī, chi nde uū tī jeē ñin centavo lulí. Te ni ñin tī tu nánga nuū ñūhun te núu tu jéhe Tátá rō jnūhun, chi ndíto ya tī. 30 Te nagā ni cuu róhó jínáhan ró, chi nde ndihí ixi xíní rō je ni cahu ya. 31 Núu súcuan te ma yūhu ró jijnáhan ró, chi cánuú ndasí gá rō nuū yā vēsú cuehē tācá saa.

### Ñayuu jejnúhún Jesucristo nuū ñga ñayuu

(Lc. 12.8-9)

32 Te tāca ñayuu jeē cuajnúhún rúhū nuū ñga ñayuu, suni súcuan cuajnúhún rí i nuū Tátá rī, Yaā ndeé andíví. 33 Te tāca ñayuu jeē ma cuajnúhún rúhū nuū ñga ñayuu, suni súcuan ma cuajnúhún rí i nuū Tátá rī, Yaā ndeé andíví.

### Jeē siquí Jesús te cusín ini ñayuu

(Lc. 12.51-53; 14.26-27)

34 Ma cáni ni rō jijnáhan ró jēe vēji ri jeē cóyūcu mání ñayuu ñayíví. Tú vēji ri jeē cóyūcu mání ñayuu, chi sa suhva cuajnáhan i jeē siquí ruhū. 35 Chi jeē siquí ruhū te cusín ini sēhe yí jín tátá, te sēhe síhí jín náná, te sēhe jēnu jín náná chíso. 36 Chi tāca ñayuu candíje

ruhū, chi jnáhan vehe i cúu jeē quítī ni nuū i.

37 Te núu ndé ñin ñayuu maní gā i jín tátá i chí jín náná i vēsú jín rúhū, nasūu ñayuu vāha cúu i jeē cóndiquin i ruhū. Te núu ndé ñin ñayuu maní gā i jín sēhe yí i chí jín sēhe síhí i vēsú jín rúhū, te suni nasūu ñayuu vāha cúu i jeē cóndiquin i ruhū. 38 Te na-ni ñayuu núu tu jéhe i jnūhun ndoho i jnūndóho vēsú nde cuu i jeē siquí jeē cóndiquin i ruhū, nasūu ñayuu vāha cúu i jeē cóndiquin i ruhū. 39 Te núu ndé ñayuu cúni i cācu i nuū jnūndóho quiji nuū i jeē siquí ruhū, núu súcuan te jnahnú ndetū i ní cáni. Te núu ndé ñin ñayuu vēsú na cúu i jeē siquí ruhū, te cotecu i ní cáni.

### Jeē iyó táhū yō nuū Yaā Dios

(Mr. 9.41)

40 Te ñayuu cuatáhú róhó jijnáhan ró, núu súcuan te ruhū cájetáhú i. Te ñayuu cájetáhú rúhū, cájetáhú i Yaā ní tají rúhū vēji ri. 41 Núu na-ni ñayuu cuatáhú i ñin tēe nácani jnūhun Yaā Dios, siquí jeē jíca de jniñu Yaā Dios, núu súcuan te inuú-ni coo tahū de nuū Yaā Dios jín tēe nácani jnūhun Yaā Dios. Te núu na-ni ñayuu cuatáhú i ñin tēe ndaā, siquí jeē tēe ndaā cúu de, núu súcuan te inuú-ni coo tahū de nuū Yaā Dios jín tēe ndaā. 42 Te núu ndé ñayuu cuāha i vēsú ñin ñajin ndute mójin coho ñin sūchi yáha, siquí jeē cúu i sūchi cándíje ruhū, ndaā ndíje cúu jeē nihín i tahū i. Achí yá.

### Jeē ní tají Juan uū tēe nuū yā

(Lc. 7.18-35)

**11** Te ná ni jínu ni ndacu Jesús jniñu nuū ndihúxí uū tēe cáscuáha jín yá, te ni quenda ya

yūcuan cuáhān yā jeē steén yā te nacani ya jñūhun tācá ñuu región yūcuán.

<sup>2</sup>Te ine Juan vecāa. Te ni nihīn de jñūhun tācá jniñu sāha Cristo. Te ni tají de uū tēe cáscuáha jíin de, <sup>3</sup>cuacajñūhún de ya:

¿A máá ní cúu Cristo jeē achí tutu jeē quíji, chí condetu yó inga tēe quíji? áchí de.

<sup>4</sup>Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jñūhun cájini ró. <sup>5</sup>Te cachi rō nuū de jeē ñáyuu cuaá cánanune tinūú i, te ñáyuu yacuá cánacaca i, te ñáyuu ndóho cuehyī stehyú cánduvāha i, te ñáyuu sohó cánanune sōho i, te ñáyuu jihí nátecu i sāha ri. Te suni nácani ri jñūhun nuū ñáyuu ndahú jēe jnama Yaā Dios i. <sup>6</sup>Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

<sup>7</sup>Te náa cuanuhun ndīndúú tēe ún, te ni quejéé Jesús cahán yā jñūhun Juan jíin ñáyuu:

¿Na vé ni jécondēhe ró jijnáhan ró nde nuū ñūhun téhé? ¿A iin tēe jéni iin jéni uū ni, nájnūhun ite jeē cánda sāha tachí? <sup>8</sup>Te núu tuú, ¿te na vé ni jécondēhe ró núu súcuan? ¿A iin tēe cúni cujéhu jeē ñūhun sahma lúu? Tuú chí cájini rō jeē tēe cáñuhun sahma lúu, máni ini vehe rey cáyūcú de. <sup>9</sup>¿Te na vé ni jécondēhe ró núu súcuan? ¿A iin tēe nácani jñūhun Yaā Dios? Cahán rī jíin ró jeē suu ni jecondēhe ró, te cújéhu ga Juan yáha vēsú tāca gá tēe ni canacani jñūhun Yaā Dios. <sup>10</sup>Chi jñūhun Juan cúu jeē ni cáhān Yaā Dios jeē yosó núu tútu ii:

Tají rí tēe nacani jñūhun rī cosnūú de ichi núú Cristo, návāha coo tūhva ñáyuu jeē jinú yā.

Achí Yaā Dios, achí tutu. <sup>11</sup>Te jendaá cahán rī jíin ró jeē ini ñayīvi yáha cújéhu ga Juan tēe scuándute vēsú tāca gá tēe jeē ni íyo ini ñayīvi. Te vēsú súcuan te tāca tēe núu ga ini ñuu nuū ndácu Yaā andívi jniñu, cújéhu ga de vēsú Juan.

<sup>12</sup>Te nde quivī ní quee Juan tēe scuándute, te nde vijna, chí cánducú ndéyí ñáyuu quívicoo i ndaha Yaā andívi jēe ndácu ya jniñu nuū i. Te nde ñáyuu xeēn cánducú ndéyí i siquī. <sup>13</sup>Chi nde ná tu quíji Juan, te ni íyo máá ley Moisés, te suni ni íyo tāca tēe ni canacani jñūhun Yaā Dios. Te ni cacastūhún de ndese coo jeē ndacu Yaā Dios jniñu. <sup>14</sup>Te ni cacahān de jeē ndíji Elías. Te núu cáconi rō cuatáhú ró jñūhun, te jíní rō jeē maá Juan cúu tēe jeē ní cachi tutu jeē quíji, chí cúu de nájnūhun Elías. <sup>15</sup>Tāca róhó jēe jíni sōho, na chúsóhó ró.

<sup>16</sup>Yāhá cachi rī iin jñūhun yátá návāha na cúni rō ndese cúu ñáyuu tiempo vijna. Cúu i nájnūhun sūchi lúlí cáhiin nuū yáhu cácasíquí i. Te cácana ndee i xiní jnáhan i: <sup>17</sup>Ni cativi rī scuilí, te tu ní cájita jéhe ró. Te ni cajita ri yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúlí un jēe tu ní núnjahan ni i ni iin, súcuan cándāa ró. <sup>18</sup>Chi ni quíji Juan te cuehē jínu ni iyo ndite ni de, tu ní yéji de ni tu ní jíhi de. Te tu ní cánujnahan ni rō, chí ni cacahān rō jeē ñūhun tachí ini de. <sup>19</sup>Yūcuán na

te ni quee maá rí, Yaā ní nduu tēe, te yéji rí jíhi ri, te tu cánujnahan ní rō, te chísoó jnúhun ró cácahān rō jeē máni máá jéē yéji rí jíhi ri vino. Te quíjnāhan ri jíin tēe cástútú xúhun renta jíin táca gá tēe cása ha cuēchi, áchí ró. Te núu cúndichí iin tēe jíin jnúhun Yaā Dios, te jíin jniñu sáha de te nátūu jeē tēe ndíchí cúu de. Achí yá.

**Jeē ní cuxeēn yā nuū sava ñuu niñni ni**

(Lc. 10.13-15)

<sup>20</sup>Yūcuán na te ni quejéé yá cuxeēn yā nuū táca ñuu nuū ni sáha ya cuehē jniñu jéhnú, chi tu ní cánacani ni i jeē stóo i cuēchi i. Te ni cahān yā:

<sup>21</sup>Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jíin ñuu Sidón ni sáha ri jniñu jéhnú jeē ni sáha ri ini ñuu maá ró, te yachí nacani ni ñáyuu ñuu un jéē stóo i cuēchi i núú. Te sáha i seña jeē steén jeē nácani ni i siquī cuéchi i, chi cuhun i sahma jnúú te chuhun i yaā xini i núú. <sup>22</sup>Núu súcuan te cáhán rí jíin ró jeē quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jíin ñuu Sidón. <sup>23</sup>Te róhó ñáyuu ñuu Capernaum, zá cájeni ni rō jeē cujéhnú ró nájnūhun iin jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndīyí. Chi núu ini ñuu Sodoma ni sáha ri jniñu jéhnú jeē ni sáha ri nuū maá ró, te coo ñuu yúcuan ndé vijna núú. <sup>24</sup>Núu súcuan te cáhán rí jíin ró jeē quivī coo juicio te xeēn

gā coo castigo siquī rō vēsú jeē ni íyo siquī ñáyuu ñuu Sodoma. Achí yá.

**Nehen nuū ri ndetātu ró, achí yá**

(Lc. 10.21-22)

<sup>25</sup>Te suni quivī un ní cahān Jesús:

Na cútahū na núu ni Tátā, Jitoho andiví jíin ñáyiví. Chi ni jesi ní táca jnúhun ndíchí ní, jeē ma cúni ñáyuu ndichí jíin ñáyuu tūhva cuenta ñáyiví yáha. Te ni steén ni núú ñáyuu cácuu nájnūhun sūchi lúlí. <sup>26</sup>Chi súcuan ni nujnahan ni ni Tátā, achí yá.

<sup>27</sup>Te ni cahān gā yā:

Ndivii ni jēhe Tátá rí nuū rí. Te tu cájini ñáyuu ndé iin cúu ruhū, Sēhe Yaā Dios, chi máá-ni Tátá rí cúu jeē jiní yā ruhū. Ni tu cájini ñáyuu ndese Yaā cúu máá Tátá, chi máá-ni Sēhe cúu jeē jiní. Te íyo ñáyuu jeē cuní maá Sēhe steén yā nuū i ndese Yaā cúu Tátá yā, te máá i suni cuni i. <sup>28</sup>Tāca ró jéē ni cuíta ró jíin táca jniñu jíin ley jeē yí sáha jíin ró, nehen quivīcoo ró ndaha ri, te ndetātu ró sáha ri. <sup>29</sup>Quiví ró núu jniñu ndácu máá rí, te scuáha ró coo ró nájnūhun íyo máá rí. Chi vītá ni rí te suchí ni rí. Te súcuan te ndetātu ró jíin ánuá rō sáha ri. <sup>30</sup>Chi tú yí jéē cuandetū rō nuū rí, ni tú yí jéē squícu ró jniñu ndácu ri. Achí yá.

**Jeē ní cataxín de yoco trigo quivī ndetátú**

(Mr. 2.23-28; Lc. 6.1-5)

**12** Te iin quivī ndetātu ní yāha Jesús cuahān yā nuū cáa trigo. Te tēe cáscuáha jíin yá, cájii de sōco. Te ni quejéé de cátaxín de

yoco trigo cáyeji de. <sup>2</sup>Te ni cajito tēe grupo fariseo, te ni cacahān de jíin yá:

Condēhé, chi tēe cáscuáha jíin ró casáha de jniñu jeē tu íyó váha sáha yó quivī ndétátú, áchí ley Moisés.

<sup>3</sup>Te ni cahān maá yá jíin de:

¿A tu ní cácahu ró tutu ndese ni sáha David, iin quivī jeē ni jíi de sōco jíin tēe cáhiin jíin de? <sup>4</sup>Te ni quivī de ini vehe Yaā Dios. Te ni yeji de pan ii jeē yosó ndijin nuū Yaā Dios. Te tú na ley jeē cáji de, ni tēe cáhiin jíin de, chi máá-ni sutū cuu caji. Te vēsú súcuan te tú na cuēchi ní íyo siquī de. <sup>5</sup>¿Te á tu ní cácahu ró tutu ley Moisés, ndese cásájniñu sutū ini templo, vēsú quivī ndétātu cúu? Te tú na cuēchi íyó siquī de, vēsú quivī ndétātu cásájniñu de jniñu jeē cácuu de sutū. <sup>6</sup>Te cáhān rī jíin ró jeē maá rí jeē iyó yáha, cújéhnū ga rī vēsú templo. <sup>7</sup>Te tu cájecūhun ni rō jijnáhan ró jñūhun yáha jeē yosó núu tútu ii jeē ni cáhān Yaā Dios: Jeē cuní gā rī cúu jeē cundáhú ni rō jnáhan ró, vēsú jeē socó rō quitī nuū rī, achí yá. Te núu jeē ní cajecūhun ni rō jñūhun yáha, te ma cahān rō súcuan siquī tēe jeē tú na cuēchi núu. <sup>8</sup>Chi ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétátú, áchí yá.

**Jeē ní nduvāha tēe ni ichī ndaha**

(Mr. 3.1-6; Lc. 6.6-11)

<sup>9</sup>Yūcuán na te cuahān Jesús, te ni quivī ya ini vehe ii sinagoga. <sup>10</sup>Te yūcuan íne iin tēe ni ichī iin ndaha de. Te cácu ni tēe grupo fariseo

jeē nihin de cuēchi siquī yā, te ni cacajnūhún de ya:

¿A íyó ley jeē cuu nasávāha yó ñayuu kuhú quivī ndétátú? áchí de.

<sup>11</sup>Te ni cahān yā jíin de:

¿Ndé iin róhó, núu névāha ró iin lanchi, te núu nīnga ti ini iin yaū quivī ndétátú, te á tu jéhen rō natava rō tī, chí naún? <sup>12</sup>¿Te á tu cánuú ndasí gá iin tēe vēsú iin lanchi? Núu súcuan te vetū-ni sáha yó jniñu váha quivī ndétátú, áchí yá.

<sup>13</sup>Yūcuán na te ni cahān yā jíin tēe ni ichī ndaha ún:

Scáá ndaha ró.

Te ni scaá de, te ni nduvāha-ni nájñūhun íyó inga. <sup>14</sup>Yūcuán na te ni quendacoo tēe grupo fariseo, te ni candajnūhún de siquī Jesús, ndese cahni de ya.

**Jñūhun Jesús jeē ni cáhān**

**Isaías nde jenahán**

<sup>15</sup>Te ni jini Jesús jeē súcuan cájeni ni de, te ni quenda ya yūcuan cuáhān yā. Te cuehē ñayuu cándiquin i ya. Te ni nasávāha ya ndihī ñayuu kuhú. <sup>16</sup>Te ni ndacu ya jniñu nuū i jeē ma stéen i ya. <sup>17</sup>Te súcuan ni cuu návāha squícu jñūhun ni cahān Yaā Dios siquī Jesús, te ni nacani Isaías jñūhun ya un ndé jenahán:

<sup>18</sup>Yāha cúu mozo rī jeē ní nacāji rī,

te manī rī jíin yá, te cúsihī ni rī jíin yá.

Te cuāha ri Espíritu rī coo jíin yá.

Te máá yá sándaā jniñu ñayuu tēcá nación.

<sup>19</sup>Ma tejnáhan ya, ni ma cána jee ya,

te ni ma cahán jee ya ichi jeē cúni ñayuu.

<sup>20</sup>Ma sáha xeēn yā jíin ñáyuu ni cunihin jnūndóho siquī, ni ma snáa yā ñayuu jeē maá lulí-ni cácanđíje.

Chi kujéhnú ya siquī ndihi, te ndaā ndacu ya jniñu.

<sup>21</sup>Te ñayuu tācá nación cocuhun ni i jeē jnáma ya i.

Achí Yaā Dios, achí Isaías nde jenahán.

**Jeē ní cacahān de jeē jejniñu ya fuerza Satanás**

(Mr. 3.19-30; Lc. 11.14-23; 12.10)

<sup>22</sup>Yūcuán na te ni caquindeca i nuū yā iin tēe cuáá ñhán, chi ñúhun tachī ini de. Te ni nasávāha ya de. Te ni ndundijin tinūú de te ni nacahān de. <sup>23</sup>Te ndihi ñayuu cuehē un ní canaa ni i cájito i, te ni cacahān i:

¿A tēe yáha cúu jeē ni cáhān Yaā Dios jeē cacu nuū yucūn David? achí i.

<sup>24</sup>Te tēe grupo fariseo, ni cajini de jeē súcuan cácahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē kujéhnú nuū tachí, achí de.

<sup>25</sup>Te Jesús ni jini yā jeē súcuan cájeni ni de, te ni cahān yā jíin de:

Tācá nación jeē casásíin máá te cájejnáhan máá, núu súcuan te snáa jeē iyó váha máá. Te núu iin ñuu chí iin vehe casásíin máá te cájejnáhan máá, te ma cúu ga coyūcu cáhnu. <sup>26</sup>Te suni súcuan Satanás núu quénehen jnáhan tachí, núu súcuan te sásíin máá.

¿Te ndese cuiñi nihin Satanás jeē ndácu jniñu núu súcuan? <sup>27</sup>Chi cácahān rō jeē jíin fuerza Satanás quénehen ri tachí. Te núu súcuan cúu núu, te ñayuu cascuáha jíin máá rō jíjnáhan rō, ¿na jíin fuerza cáquenehen máá i tachí, cájeni ni rō? Núu súcuan te máá i jíjnáhan i cachi jeē ní castívi ndasí suhva rō ni cacahān rō jeē cáquenehen ri tachí jíin fuerza Satanás. <sup>28</sup>Te tuú chi sa jíin Espíritu Yaā Dios cúu jeē quénehen ri tachí. Núu súcuan te je ndéé Yaā Dios mēhñu rō jeē ndácu ya jniñu.

<sup>29</sup>¿Chi ndese cuu quívi iin tēe ini vehe tēe ndacuí jeē quenehen de ndajniñu de? Chi cánuú jeē xíhna gā cuhni de tēe ndacuí ún, te yūcuán na te cuu quenehen de ndajniñu ún. Te suni súcuan cúu jeē jíhni rí Satanás te quénehen ri tachí.

<sup>30</sup>Te ñayuu tu íyó máni jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rí.

<sup>31</sup>Jeē yúcuan cáhān rí jíin rō: Iyó modo coo jnūhun cáhnu ni nuū tāca cuéchi casáha ñayuu, jíin núu tāca jnūhun néé cácahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i. <sup>32</sup>Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayívi yáha, ni ní tiempo quíji.

**Jnūhun yujnu váha jíin yujnu néé**

(Lc. 6.43-45)

<sup>33</sup>Núu yujnu váha, te váha ndehē, te núu yujnu néé, te cánéé ndehē.



Chi jíin ndéhē te jíin yō ndese yujnu cúu. Te suni súcuan ñayuu. <sup>34</sup>Va sēhe coō cácuu ró, chi xeēn rō nájnūhun coō. ¿Ndese cuu cahān rō jnūhun vāha, chi ñayuu cásáha néé cácuu ró? Chi jniñu jeē jéni ni anuá ñayuu, máni yūcuan cáhān i. <sup>35</sup>Tēe vāha cáhān de jnūhun vāha, chi íyó ndāā anuá de. Te tēe sáha néé cáhān de jnūhun néé, chi cánéé ánuá de. <sup>36</sup>Te cáhān rī jíin ró jeē tācá na-ni jnūhun cácahān ñayuu, nacuāha i cuenta jnūhun un quívī coo juicio. <sup>37</sup>Chi jíin jnúhun ni cahān rō sándaā yā siquī rō, núu jeē quéndōo ndāā rō chí jēē cóndee cuēchi siquī rō. Achí yá.

**Jeē ní cajicān ñayuu tu cācandíje iin jniñu jéhnú**

(Mr. 8.12; Lc. 11.29-32)

<sup>38</sup>Yūcuán na te jecu tēe grupo fariseo jíin tēe cástéén tutu ley Yaā Dios, ni cacahān de jíin yá:

Maestro, cácuu na jēē sáha ní iin jniñu jéhnú jeē steén núu máá ní cúu Yaā ní tají Yaā Dios, achí de.

<sup>39</sup>Te ni cahān yā jíin de:

Ñayuu yáha jeē casáha jniñu néé, tu cájetáhú cuiti i Yaā Dios. Te cájicān i iin jniñu jéhnú jeē steén núu Yaā ní tají Yaā Dios cúu ri. Te tuá na inga jniñu jéhnú stéén rī nuū i, chi máá-ni jniñu jéhnú nájnūhun ni cuu jíin Jonás, tēe ni nacani jnūhun Yaā Dios. <sup>40</sup>Chi nájnūhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone ri chíji ñuhun unī nduú unī ñuú, te sáá te natecu rī. <sup>41</sup>Te tāca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo

yáha, quívī juicio jeē sándaā yā cuēchi, te cahān i cuēchi siquī ñáyuu yáha. Chi máá i ni canacani ni i ni castóo i cuēchi i quívī ní nacani Jonás jnūhun nuū i. Te vijna chi cújéhnú ga ruhū Yaā íne yāhá vēsú Jonás, te tu cācandíje ró rúhū. <sup>42</sup>Te reina jeē ní cujéhnú nación ichi sur, natecu ña jíin ñáyuu tiempo yáha, quívī juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ni jini nahín ña jnūhun ndíchí ní cahān rey Salomón. Te vijna chi cújéhnú ga ruhū, Yaā íne yāhá vēsú Salomón, te tu cācandíje ró rúhū.

**Tachī jeē nastútú jnáhan ndívi ini ñayuu**

(Lc. 11.24-26)

<sup>43</sup>Núu ni quenda iin tachī ini iin tēe tu cāndíje, te jíca cuu nuū ñūhun téhé, ndúcú núu ndétátú, te tu níhín, yūcuán na te jéni ni maá: <sup>44</sup>Na quínuhun rī vehe nuū ní quenda ri. Te núu ni ndee tucu, te jíto jeē tēe tu cāndíje ún, cúu de nájnūhun iin vehe íyú te ni ndundoo. <sup>45</sup>Yūcuán na te jéquihiñ uxā gā tachī neé gá vēsú maá. Te quívicoo ini tēe un jéē cóyūcu yūcuan. Núu súcuan te xeēn gā ndoho tēe un jéē sándíhí vēsú jeē xíhna ñúhún. Te suni súcuan ndoho ñayuu tiempo yáha jeē casáha néé. Achí yá.

**Náná yā jíin ñani yā**

(Mr. 3.31-35; Lc. 8.19-21)

<sup>46</sup>Te níní súcuan cáhān yā jíin ñáyuu ún, te ni quee naná yā jíin táca ñani yā, íin ña nuū quéhe, te cúní ña cahān ña jíin yá. <sup>47</sup>Te ni cachi iin tēe nuū yā:

Náná ni jíin táca ñani ni cáhiin nuū quehe, te cácuini cahān jíin ní, achí de.

<sup>48</sup>Te ni cahān yā jíin tēe ni cahān súcuan jíin yá:

¿Ndé iin cúu náná rī, te ndé iin cácuu ñani rī? Achí yá.

<sup>49</sup>Te ni steén ndaha yá nde nuū cáyūcu tēe cáscuáha jíin yá. Te ni cahān yā:

Suni náná rī jíin ñani rī cácuu táca jéé yáha. <sup>50</sup>Chi táca ñáyuu casquícu jniñu cúní maá Tátá rī, Yaā ndeé andiví, suu cácuu ñani rī, cuāha rī, náná rī. Achí yá.

#### Jnūhun yátá síquī tēe jéte trigo

(Mr. 4.1-9; Lc. 8.4-8)

**13** Te quivī un ní quenda Jesús vehe cuahān yā, te ni jinū yā ni cucōo ya yumar. <sup>2</sup>Te ni cutútú cuéhē ndasí ñayuu nuū yā. Te ni quivī ya ini iin barco, ni cucōo ya. Te táca ñáyuu un cáyūcú i yumar. <sup>3</sup>Te jíin jnūhun yátá ni cahān yā cuehē jnūhun nuū i, te súcuan ni cahān yā:

Iin tēe cate trigo, ni quenda de jeē cáte de. <sup>4</sup>Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayejí tī. <sup>5</sup>Te jecu gā trigo ni jitē nuū ñūhun yuū, nuū tú cuehē ñuhun. Te yachī-ni ni cane, chi tu cóquin ñuhun. <sup>6</sup>Te nuū ní cane niāndii, te ni ichī-ni, te ni casun, chi tu ní níhín nuū quihín yoho. <sup>7</sup>Te jecu gā trigo ni jitē nuū náne iñu. Te ni jehnu iñu ún, te ni jesí nuū. <sup>8</sup>Te jecu ni jitē nuū ñūhun váha, te ni jēhe cuehē nunī. Sava ni jēhe ciento jeē iin iin, te sava ni jēhe unī xico, te sava ga ni jēhe ocō

uxī. <sup>9</sup>Tāca róhó jéé jíni sōho, na chúsóhó ró. Achí yá.

#### Najehē cahán yā máni jnūhun yátá

(Mr. 4.10-12; Lc. 8.9-10)

<sup>10</sup>Yūcuán na te tēe cáscuáha jíin yá un ní quecoo de nde nuū yā, te ni cacajñūhún de ya:

¿Najehē cúu jeē máni jnūhun yátá cáhán ni jíin ñáyuu? achí de.

<sup>11</sup>Te ni cahān yā jíin de:

Róhó jíjnáhan ró chi sáha ya jeē cájécūhun ni rō jnūhun ni yisāhi yáha, ndese quívicoo ñayuu ndaha Yaā andiví jeē ndacu ya jniñu nuū i. Te ñayuu yáha jéé tu cácandíje, chi ma jécūhun ni i. <sup>12</sup>Chi ñayuu je jécūhun ni, chi steén gā yā nuū i, te víhyá gā cuni i. Te ñayuu tu cándíje, sa suhva naa jecu jeē je jíni i ún.

<sup>13</sup>Jeē yúcuan cáhán rī jnūhun yátá jíin i. Chi vēsú cájito i, te quendōo i nájnūhun jeē tú na vé ni cájito i. Te vēsú cájini sōho i, te ma jécūhun ni i, te quendōo i nájnūhun jeē tú na vé ni cájini i. <sup>14</sup>Ñayuu yāhá chi squícu síquī i jnūhun ni cahān Yaā Dios jeē ní nacani Isaiás, tēe ni nacani jnūhun nde jenahán:

Vēsú cuni nahín ró, te ma jécūhun ni rō,

te vēsú coto ró, te ma nácuni rō.

<sup>15</sup>Chi ñayuu yáha yōhyo ni ndunihni ni i, te yōhyo uhū chusóhó i, te nájnūhun cájesi i tinūú i, návaha coo nájnūhun jeē tu cájito i,

ni tu cájini nahín i,

te ni ma jécūhun ni i,

ni ma násāma ini i quívicoo i nuū rī

jeē nasávāha ri anuá i nuū  
cuéchi i.

Achí Yaā Dios, achí tutu.

<sup>16</sup>Te máá ró jijnáhan ró, yōhyo ndetū rō, chí cájito ró jíin tñūu ró, te cájini nahín ró jíin sóho ró. <sup>17</sup>Chi jendaá cahán rī jíin ró jeē cuehē tēe ni canacani jñūhun Yaā Dios jíin cuehē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

**Jeē ní castūhun cájī yá jñūhun yátá  
tée jéte trigo**

(Mr. 4.13-20; Lc. 8.11-15)

<sup>18</sup>Núu súcuan te cuni nahín jíjnáhan ró na vé cuni cahān jñūhun yátá tée jéte trigo: Trigo un cúu jñūhun Yaā Dios. <sup>19</sup>Te ñayuu cájini sōho jñūhun ndese ndácu Yaā andívī jniñu, núu tu cájecūhun ni i te cácuu i nájñūhun trigo jeē ni jítē yuhíchi. Yūcuán na te quíjī jexeén te quénde-ni jñūhun ini anuá i. <sup>20</sup>Te trigo jeē ni jítē nuū ñūhun yuū cúu nájñūhun ñayuu cájini sōho jñūhun, te yachī-ni cájetáhú i te cácusī ni i jíin. <sup>21</sup>Te tu cúcutú jñūhun ún ini anuá i, te jecu-ni quivī cájetáhú i. Te núu ni quejéé jnúndóho, chí jító xeēn ñayuu i síquī jñūhun ún, te quejéé nácani yátá ni i. <sup>22</sup>Te jeē ni jítē nuū náne iñu cúu ñayuu cájini nahín jñūhun, te cándihvī ni i síquī jeē iyó ini ñayīvi yáha, te cúní i cucúcá i, te stáhú un i cujnéñu i jíin. Te ndíhi jeē yáha jési nuū jñūhun ya, te tu íje i jíin jñūhun ya. <sup>23</sup>Te trigo jeē ni jítē nuū ñūhun váha cúu nájñūhun ñayuu cájini nahín jñūhun, te cájecūhun ni i, te

cáhije i jíin jñūhun ya. Te sava i cúu nájñūhun nuni jeē jéhe ciento jeē ñin ñin, te sava ga i jéhe unī xico, te sava ga i jéhe ocō uxī. Achí yá.

**Jñūhun yátá síquī ite lasú**

<sup>24</sup>Te ni cahān yā inga jñūhun yátá jíin de:

Jeē ndácu Yaā andívī jniñu cúu nájñūhun ñin tēe jeē ní jete de trigo váha nuū ñūhun de. <sup>25</sup>Te íyó ñin tēe jító uhū de tēe chíí trigo. Te náa cáquixī tēe chíí trigo jíin táca jnáhan de, te ni jehēn ni jete ndiquín lású nuū trigo de, te cuahān. <sup>26</sup>Te nuū ní cane trigo ún, te ni cane yoco i, te suni súcuan ni jehnu ite lasú un. <sup>27</sup>Yūcuán na te ni jengoo mozo ni cacahān i jíin patrón i: ¿A násūu trigo váha ní jéte ní núu ñūhun ní? ¿Te ndese cúu jeē ní canecoo ite lasú nuū? <sup>28</sup>Te ni cahān de jíin i: ñin tēe jító uhū ruhū ni sáha jeē yáha. Te ni cacahān mozo un jíin de: ¿Núu súcuan te á cúní ni jéé na quíngoo ná te jñūhun ná? achí i. <sup>29</sup>Te ni cahān de: Tuú, chí núu jñūhun ró lású un te sanaa te jñūhun ró ndé jíin trigo. <sup>30</sup>Váha ga na cuehnu máá ndé quivī tahndé. Te quivī un cahān rī jíin tēe cahnde jeē xihna gā ite lasú cahnde de, te chucú tútú de návāha cahmu yó. Yūcuán na te trigo chí cahnde de ndívi ini yacā rī, achí de. Achí yá.

**Jñūhun yátá síquī ndiquín mostaza**

(Mr. 4.30-32; Lc. 13.18-19)

<sup>31</sup>Te suni ni cahān yā inga jñūhun yátá jéé steén yā ndese ndúcuehē ñayuu ndácu Yaā andívī jniñu nuū: Ndúcuehē i nájñūhun jéhu ñin ndiquín mostaza jeē ní jequin ñin

tēe nuū ñúhun de. <sup>32</sup>Te jendaá jeē ñn ndiquín lúlí gá cúu vēsú tāca gá ndiquín. Te núu ni jehnu, te cúu cáhnu ga vēsú tāca gá yucū, chí ndúu nájnūhun ñn yujnu. Te quǵijicoo saa, te cásáha tí tacā tí chíji ndaha ún. Achí yá.

**Jnūhun yátá síquī levadura**

(Lc. 13.20-21)

<sup>33</sup>Te ñga jnūhun yátá ní cahān yā jijn de:

Jeē ndácu Yaā andiví jniñu nuū ñáyuu cúu nájnūhun levadura jeē ní quihin ñn ñahan. Te ni saca ña jíin úní kilo harina, nde ni ndaa ndihí ñujen ni sáha. Achí yá.

**Jeē máni jnūhun yátá cáhán yā jíin i**

(Mr. 4.33-34)

<sup>34</sup>Tāca jnúhun yáha ní cahān Jesús jíin ñáyuu cuehē ún. Te tāca jēe ní stéén yā, máni jnūhun yátá ní cahān yā jíin i. <sup>35</sup>Súcuan ni sáha ya návaha squícu jnūhun ni cahān tēe ni nacani jnūhun Yaā Dios nde jenahán:

Cahān rī tāca jnúhun yátá jíin ñáyuu,  
te cachi rī tāca jnúhun yísāhí  
ndé quiví ní jecōo ñayiví.  
Achí tutu, áchí yá.

**Jeē ní castūhun cájí yá jnūhun ite lasú**

<sup>36</sup>Yūcuán na te ni nacuatáhú Jesús nuū ñáyuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jíin yá: Nacani cájí ní jnūhun yátá ite lasú nuū ná, áchí de.

<sup>37</sup>Te ni cahān yā jíin de:

Jeē jéte trigo vāha un cúu máá rí, Yaā ní nduu tēe. <sup>38</sup>Te ñuhun un cúu

ñayiví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. <sup>39</sup>Te tēe jíto uhū jeē ní jete lasú un cúu máá jexeén. Te quiví tahndé cúu quiví jínu ñayiví. Te tēe cahnde un cácuu ndajéhe Yaā Dios. <sup>40</sup>Te nájnūhun tahndé ite lasú te cayū nuū ñuhún, súcuan coo quiví jínu ñayiví. <sup>41</sup>Chí máá rí, Yaā ní nduu tēe, tají rí ndajéhe rí quingoo. Te nastútú yá tāca ñáyuu casquíví jnáhan nuū cuéchi, jíin ñáyuu casáha jniñu néé, quenehen ya i mēhñu ñáyuu ndácu rí jniñu nuū. <sup>42</sup>Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. <sup>43</sup>Yūcuán na te ñayuu squícu nuū yā chí ndindēe i nájnūhun niāndii, te coyūcú i nuū ndácu máá Tátá i jniñu. Tāca róhó jéé jíni sōho, na chúsóhó ró.

**Jnūhun yátá síquī yejnū  
xūhún jeē yísāhí**

<sup>44</sup>Te jeē ndácu Yaā andiví jniñu nuū ñáyuu, suni cúu nájnūhun ñn yejnū xūhún jeē yísāhí chíji ñn ñuhun. Te ni nanihín ñn tēe, te ni nacasi tucu de síquī. Te jeē cúsiñ ní de jíin, te ni jehēn de ní xícó ndihí de jeē névaha de, te ni jeen de ñuhun ún.

**Jnūhun yátá síquī perla  
jeē ndeé yahu**

<sup>45</sup>Te jeē ndácu Yaā andiví jniñu nuū ñáyuu, suni cúu nájnūhun ñn tēe jéen xícó, te ndúcú de perla vāha. <sup>46</sup>Te ní jini de ñn perla jeē yáhu ndasí, te ní jehēn de ní xícó ndihí de jeē névaha de, te ni jeen de perla un.

### Jnūhun yátá síquī ñunu jní chācá

<sup>47</sup>Te jeē ndácu Yaā andiví jniñu nuū ñáyuu, suni cúu nájñūhun iin ñunu jeē cásingava de ini mar, te quívicoo ndinuū chācá. <sup>48</sup>Te núu ni chitú ñunu ún, te cánatava de yundúte. Te cáucucōo de cánacāji de chācá. Te chācá váha cájnaa de ini jica, te chācá tú váha cáscāne de. <sup>49</sup>Te suni súcuan coo quiví jínu ñayiví. Chi quijicoo ndajéhé yā, te sásin ya ñayuu casáha jniñu néé méhñu ñáyuu casáha jniñu váha. <sup>50</sup>Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

### Jnūhun yátá síquī ndajniñu ndéé yahu

<sup>51</sup>Te ni cajñūhun yá de jijnáhan de:

¿A ní cajecūhun ni rō tāca jnúhun yáha, chí tuú? áchí yá.

Te ni cacahān de jíin yá:  
Ni cajecūhun ni ná, áchí de.

<sup>52</sup>Te ni cahān yā jíin de:

Iyó váha núu súcuan. Te iin tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jnúhun síquī ún. Chi cúu de nájñūhun iin tēe chíí vehe. Te ini yejñū de táva de ndajniñu ndéé yahu, sava jeē jeé jíin sava jeē je ni cunahán iyó. Achí yá.

### Jeē cuánuhun yā ñuu Nazaret

(Mr. 6.1-6; Lc. 4.16-30)

<sup>53</sup>Te ná ni ndihí ni cahān Jesús tāca jnúhun yátá yáha, te ni quenda ya yūcuan cuáhān yā. <sup>54</sup>Te ni

najinū yā ñuu yā Nazaret. Te ni steén yā jnūhun ini vehe i sinagoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jnúhun ndíchí? ¿Te ndese cúu sáha de tācá jniñu jéñu yāhá? <sup>55</sup>Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas. <sup>56</sup>Te suni cáyūcu cuáha de jíin yó yāhá. ¿Te ndese jíin de tāca jnúhun yáha núu súcuan? Achí ñayuu.

<sup>57</sup>Te súcuan ni cacujéé ni i nuū Jesús. Te ni cahān yā jíin i:

Tāca tēe nácani jnūhun Yaā Dios, iyó yíñuhún ñayuu jíin de, te máni ñayuu ñuu maá de jíin ñáyuu vehe maá de cúu jeē tu iyó yíñuhún jíin de. Achí yá.

<sup>58</sup>Te tu ní sáha ya cuehē jniñu jéñu yūcuán, chi tu cácandíje i ya.

### Jeē ni jíihí Juan tēe scuándute

(Mr. 6.14-29; Lc. 9.7-9)

**14** Te tiempo yūcuan te Herodes, tēe ndácu jniñu región Galilea, ni jini jnūhun de jnūhun Jesús. <sup>2</sup>Te ni cahān de jíin ñáyuu cáhiin jíin de:

Tēe yūcuan cúu Juan tēe ni scuándute, te ni natecu de. Jeē yūcuan iyó poder de sáha de jniñu jéñu. Achí de.

<sup>3</sup>Chi Herodes, je ni ndacu de jniñu jeē na quívi Juan vecāa, jíin jéē na cónuhni de jíin cadena. Súcuan ni sáha de jeē síquí Herodías, ñasihí ñani de Felipe.

<sup>4</sup>Chi Juan ni cahān de nuū Herodes: Tu iyó ley condeca ró ña, áchí de.

<sup>5</sup>Te jeē yūcuan ní cuni Herodes cahni de Juan. Te yúhú de jeē quití

ni ñayuu, chi ndihi i jéni ndije ni i jeē ñin tēe nácani jñūhun Yaā Dios cúu Juan. <sup>6</sup>Te ñin quivī ni sáha Herodes ñin vico quivī ní cacu de. Te sēhe síhí Herodías ni quivī i ni jita jéhé i nuū ñáyuu ní cana de ún. Te ni cusihī ni Herodes ni sáha i. <sup>7</sup>Te ni jejnūhun téyí de jeē cuáha de núu na vé cacān i nuū de. <sup>8</sup>Te ni jehēn i ni cajñūhún i náná i na vé cacān i. Te ni ndīvi i nuū Herodes, te ni cahān i:

Cuāha ní xíní Juan tēe scuándute, cone nuū ñin cohō, achí i.

<sup>9</sup>Yūcuán na te rey Herodes ni cucuíhyá ni de. Te siquī jeē ni jéjnūhun téyí de, jíin jéē ní cajini sōho tēe cáyeji staā jíin de, jeē yúcuan ní ndacu de jñiñu jeē na cuáha nuū i. <sup>10</sup>Te ni tají de soldado jeē na quícahnde xinī Juan ini vecāa. <sup>11</sup>Te ni quee soldado un jíin xíní Juan, íne nuū ñin cohō, te ni jēhe nuū súchi síhí un. Te máá i ni jendeca i nuū naná i.

<sup>12</sup>Yūcuán na te ni jengoo tēe cáscuáha jíin Juan, te ni candonehen de yiqui cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

### Jeē ni scáji yā uhūn mil tēe

(Mr. 6.30-44; Lc. 9.10-17; Jn. 6.1-14)

<sup>13</sup>Te ná ni jini Jesús jñūhun, te ni cujiyo ya yūcuan cuáhān yā jíin barco, jeē cóne síin ya ñin lugar nuū tú ñayuu. Te ni cajini ñayuu jeē cuahán yā. Te tācá ñuu ni quendacoo i cájica jéhé i, cuajñahan i ya. <sup>14</sup>Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni

nasávāha ya tāca ñáyuu cácuñu jeē véjicoo i jíin. <sup>15</sup>Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuan te tají ní ñayuu na quíngoo i tācá ñuu, te cuaan i jeē cáji i.

<sup>16</sup>Te ni cahān Jesús jíin de:

Tu jíini ññūhún quíngoo i, chi cuāha máá ró jeē cáji i, áchí yá.

<sup>17</sup>Te ni cacahān de jíin yá:

Tú na vé cánevāha ná yāha, chi uhūn-ni staā jíin úu-ni chācá, áchí de.

<sup>18</sup>Te ni cahān yā jíin de:

Cuāha na quíji, áchí yá.

<sup>19</sup>Te ni cahān yā jíin ñáyuu un jéē na cúcōo i nuū íte. Te ni quihin ya ndihūhún staā jíin úu chācá un. Te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá. Te máá de ni casaja de nuū ñáyuu cuehē ún. <sup>20</sup>Te ndivii i ni cayejí, te ni candutú chíji i. Te ni canastútú de pedazo jeē ní quendōo, te ni chitú úxí uū jica. <sup>21</sup>Te tēe ni cayejí un cúu nájñūhun uhūn mil, te síin ga cúu ñahan jíin súchi lúlí.

### Jeē ní jica jéhé yá nuū mar

(Mr. 6.45-52; Jn. 6.16-21)

<sup>22</sup>Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnūú de quíngoo de nde inga lado mar, níni jéē nátají yá ñayuu un quíngoo i. <sup>23</sup>Te nuū ní cuu ni nacuatáhú yá nuū i, te máñūhún-ni ya ni caa ya yucu, cuacacān tahú yā. Te ni cuaa, te íne máñūhún yá yūcuán.

<sup>24</sup>Te barco un, je ni cuu sava nuū mar cuahān. Te ndute mar un nátundahá níhin barco, chi vēji tachī ichi núú de. <sup>25</sup>Te jeē yínee gā ni quee Jesús nuū de, jíca jéhé yá nuū mar. <sup>26</sup>Te tēe cáscuáha ún, ni cajito de ya jeē jíca ya nuū mar. Te ni candondava de, te ni cacana cóhó de jeē cáyuhú de.

Jíhná cúu, áchí de.

<sup>27</sup>Te ni cahān-ni Jesús jíin de:

Ndeyí coo ni rō, te ma yūhu ró, chi máá rí cúu, áchí yá.

<sup>28</sup>Yūcuán na te ni cahān Pedro jíin yá:

Núu máá ní cúu, te cahān ni jíin ná jēe na cáca jéhé ná nuū mar te jeē na núu ní, áchí de.

<sup>29</sup>Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndúte cuahān de nuū Jesús. <sup>30</sup>Te nuū ní jini de jeē níhin yíhi tachī, te ni yūhú de. Te ni quejéé de quee de chíji ndute. Te ni cana cóhó de:

Jnama ní sáña, áchí de.

<sup>31</sup>Te Jesús ni jni-ni ya ndaha de. Te ni cahān yā jíin de:

Tēe tu cándíje níhin cúu ró.

¿Naun ni nayūhu ró? Achí yá.

<sup>32</sup>Te ni quívi ya ini barco un jíin de, te ni jecuñi-ni tachī. <sup>33</sup>Yūcuán na te tēe cáhiin ini barco un, ni cajecuñi yití de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

**Jeē ní nasávāha ya ñayuu cácuñi  
región Genesaret**

(Mr. 6.53-56)

<sup>34</sup>Te ni quenda jíyo ya jíin de nuū mar un, ní jinū yā región Genesaret.

<sup>35</sup>Te ñayuu yūcuan ní canacuni i ya. Te ni cascáca i jñūhun tēcá ndañū yūcuan jēe ni jíin yā. Te ñayuu ni caquindeca i ñayuu cácuñi nuū yā.

<sup>36</sup>Te ni cacahān ndahú i jíin yá jeē na quéhé i vēsú yusáhma ya. Te tēe cáca ñayuu jeē ní caquehé sahma ya, ni canduvāha i.

**Siquí ndese cújnehén ñayuu**

(Mr. 7.1-23)

**15** Yūcuán na te jecu tēe grupo fariseo jíin tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jíin yá:

<sup>2</sup>Tēe cáscuáha jíin ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staā. Achí de.

<sup>3</sup>Te Jesús ni cajñūhun yá de:

Te máá ró jíin náhan ró, ¿suni naun cástívi ró jñiñi ní ndacu Yaā Dios nuū rō? Chi sa costumbre maá ró cúu jeē casquicu ró. <sup>4</sup>Chi ni cahān Yaā Dios: Coó yíñūhún ró jíin tátá rō jíin náná rō. Te núu ndé iin cahān siquí tátá chí síquí naná, na cúu nahín, áchí Yaā Dios. <sup>5</sup>Te máá ró chi cacahān rō jeē cuu cahān iin tēe jíin tátá de jíin náná de: Ma cúu chindéé ñáhán ná níhin cuáha na jēe cáji ni jēe cúhun ní, chi ndíhi jeē névāha ná, je ni socō na núu Yaā Dios. <sup>6</sup>Te tēe cahān súcuan, tuá cánúu chindéé ñáhán de tátá de náná de, áchí ró jíin náhan ró. Te súcuan cástívi ró jñiñi ní ndacu Yaā Dios, jeē siquí costumbre ni cajequin máá ró. <sup>7</sup>Tēe stáhú-ni cácuu ró. Ndaā ni nacani Isaías jñūhun siquí rō nde jenahán, yósó núu tútu i jeē ni cahān Yaā Dios:

<sup>8</sup> Ñayuu yáha chi máá yuhu-ni i cájetáhú i ruhū, te nasūu ndé jíin ini jíin ánuá i.

<sup>9</sup> Te cáchiñúhún sáá-ni i ruhū, chi jñūhun cástéén i cúu jñiñu ní candacu tēe, te nasūu jéé ní ndacu máá rí cúu.

Achí Yaā Dios. Achí yá.

<sup>10</sup> Te ni cana ya ñayuu cuehē ún, te ni cahān yā jíin i:

Cuni sōho vāha jíjnáhan ró, te chuhun ni rō: <sup>11</sup> Nasūu jéé quívī ini yuhu ñayuu cujnéhén i sáha. Chi jñūhun jeé quénda yuhu i, yūcuan cúu jeé cujnéhén i sáha, áchí yá.

<sup>12</sup> Yūcuán na te tēe cáscuáha jíin yá, ni quecoo de nuū yā, te ni cacahān de:

¿A jíiní ni jéé ní caquitī ni tēe fariseo jeé ní cajini sōho de jñūhun ni cahān ní? áchí de.

<sup>13</sup> Te ni cahān maá yá:

Cácuu de nájñūhun yujnu jeé tu ní náchuhun Tátá rī, Yaā ndeé andívī, te ñin quívī te jñuhun ya quihīn.

<sup>14</sup> Na quíngoo máá de. Chi cácuu de nájñūhun tēe cuáá cástéén ichi nuū inga tēe cuáá. Chi núu ñin tēe cuáá stéén de ichi nuū inga tēe cuáá, te ndíndúú de ñinga de xehvā. Achí yá.

<sup>15</sup> Te ni cahān Pedro jíin yá:

Castūhun cájī ní jnúhun yátá yáha nuū na jíjnáhan ná, áchí de.

<sup>16</sup> Te ni cahān Jesús:

¿Te á suni máá ró ná tu jecūhun ni rō chí naún? <sup>17</sup> ¿A tu cájecūhun ni rō jeé tāca jéé yéji ñayuu, chi quívī chíji i, te quénda-ni cuahān?

<sup>18</sup> Te jñūhun jeé quénda yuhu ñayuu, chi nde ini anuá i vēji, te yūcuan cúu jeé cujnéhén i sáha. <sup>19</sup> Chi nde ini anuá ñayuu quénda jeé jéni néé

ni, jeé jéhni ndíyi, jeé casíquí ndeé jnáhan, jeé jíca jnéni, jeé sacuíhná, jeé cahán jñūhun stáhú, jeé cahán yāa síquí jnáhan. <sup>20</sup> Tāca jéé yáha cúu jeé cujnéhén ñayuu sáha. Te núu tu squícu i costumbre jeé nándahá i te caji i staā, tu cúnéhén i sáha. Achí yá.

**Ñahan inga nación jeé ní candíje nihin**

(Mr. 7.24-30)

<sup>21</sup> Te ni quenda Jesús yūcuan cuahān yā región Tiro jíin Sidón.

<sup>22</sup> Te ñin ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ni sáña víi. Chi sēhe síhí ná, ñūhun tachī ini i, te yōhyo xeēn ndóho i, áchí ña jíin yá.

<sup>23</sup> Te tu ní cáhán cuiti yā jeé ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quíhín ña, chi cána jee ña vēji ña yatā yō, achí de.

<sup>24</sup> Te ni cahān yā jíin ña:

Nuū maá-ni ñayuu nación Israel ni tají Yaā Dios sáña vēji ná, chi cácuu i nájñūhun lanchi, quití ní sana.

<sup>25</sup> Te ñahan ún chi ni quee ña, te ni jecuíñī yītī ña nuū yā, te ni cahān ña:

Tátā, chindéé ñáhán ní sáña víi, achí ña.

<sup>26</sup> Te ni cahān yatá yá jíin ña:

Tu íyó váha jeé quénde yō staā sēhe, te cuāha yó núu ína, achí yá.

<sup>27</sup> Te ni cahān ña:

Jendaá cahán ni Tátā, te chindéé ñáhán ní sáña vēsú cúu



ná nájnūhun ina. Chi suni máá tí cánihin nahín tí pedazo staā cuechí jéē cóyo chíji mesa jitoho tí cáyeji tí, achí ña jíin yá.

<sup>28</sup>Yūcuán na te ni cahān Jesús:

Yōhyo vāha jeē cándíje nihin ní súcuan, nánā. Te na sáha ná jéē cuní ni, achí yá.

Te máá hora un ní nduvāha-ni sēhe síhí ña.

### Jeē ní nasávāha ya cuehē ñayuu cácuhū

<sup>29</sup>Te ni quenda Jesús cuahān yā yūcuán, te ni yāha ya yumar Galilea. Te ni caa ya iin yucu, te yūcuan ní cucōo ya. <sup>30</sup>Te cuehē ñayuu ni quecoo i nuū yā, te cándeca i tāca jéē cájica chácua, jeē cuaá, jeē ñihín, jeē cacúhndú, jíin cuéhē gā ñayuu cácuhū. Te ni cajequin i nuū jehé Jesús. Te ni nasávāha ya i jíināhan i. <sup>31</sup>Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, nácaca vāha ñayuu chacuá, nánune tinūu ñáyuu cuaá. Te ni cacahān i jeē yóhyo vāha Yaā cúu Yaā Dios ñuu i Israel.

### Jeē ni scáji yā cuūn mil tēe

(Mr. 8.1-10)

<sup>32</sup>Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ni rī ñayuu cuehē yāhá, chí je ni cuu unī quivī cáyūcú i jíin rí, te tuá na vé caji i. Te tu cúní rí natají rí i nuhun ndite i, chí núu súcuan te sava ichi te cuíta íi i. Achí yá.

<sup>33</sup>Te ni cacahān tēe cáscuáha jíin yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yúcu, achí de.

<sup>34</sup>Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúlí, achí de.

<sup>35</sup>Yūcuán na te ni cahān yā jíin ñáyuu cuehē un jéē na cúcōo i.

<sup>36</sup>Te ni quihin ya ndihúxá staā jíin chāca ún, te ni nacuatáhú yá nuū Yaā Dios. Te ni tahué cuéché yá, te ni jēhe ya nuū tēe cáscuáha jíin yá, te máá de ni casaja nuū ñáyuu.

<sup>37</sup>Te ndihí i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jica. <sup>38</sup>Te tēe ni cayeji ún, nde cuūn mil de cúu, te sfin ga cúu ñahan jíin súchi lúlí. <sup>39</sup>Yūcuán na te ni nacuatáhú yá nuū ñáyuu ún, te cuanungoo i. Te ni ndīvi ya ini barco, te cuahān yā región Magdala.

### Jeē cájicān de iin jniñu jéhnu nuū yā

(Mr. 8.11-13; Lc. 12.54-56)

**16** Te ni quecoo tēe grupo fariseo jíin tēe grupo saduceo nuū yā. Chi cácuñi de coto ndee de ya, te ni cajicān de jeē na sáha ya iin jniñu jéhnu jeē coo iin seña ichi ándiví. <sup>2</sup>Te máá yá ni cahān yā jíin de:

Núu ni ini, te cacahān rō: Nandii, chí ni nasácuéhé i andiví, achí ró.

<sup>3</sup>Te jenéhen chí cacahān rō: Vijna te cuun saū, chí ni nasácuéhé i andiví, achí ró. Tēe stáhú-ni cácuu ró. Chí cájecūhun ni rō ndese stéén seña andiví, te tu cájecūhun ni rō ndese stéén táca jniñu jéhnu sáha

ri tiempo yáha. <sup>4</sup>Ñayuu yáha jeē casáha jniñu néé, tu cájetaháhu cuiti i Yaā Dios. Te cájicān i jeē sáha ri iin jniñu jéhnú jeē coo iin seña andiví. Te tuá na inga jniñu jéhnú stéén rī nuū i, chí máá-ni jniñu jéhnú nájnūhun ni cuu jíin Jonás, tēe ni nacani jnūhun Yaā Dios nde jenahán. Achí yá.

Te ni stóo ya de jijnáhan de, te cuahān yā.

### Jnūhun levadura tēe fariseo

(Mr. 8.14-21)

<sup>5</sup>Te tēe cáscuáha jíin yá ni canaa ni de condiso de staā náa cuangoo de jíin barco inga lado mar. <sup>6</sup>Te ni cahān Jesús jíin de:

Coto má candíje ró levadura tēe grupo fariseo jíin tēe grupo saduceo, achí yá.

<sup>7</sup>Te tēe cáscuáha un ní cacahān maá de:

Va siquī jeē tú na staā ndíso yó, jeē yúcuan cáhán yā súcuan, áchí de.

<sup>8</sup>Te ni jini Jesús, te ni cahān yā: ¿Najehē cacahān rō jeē ni cáhán rī súcuan siquī jeē tú na staā cándiso ró? Tēe tu cándíje nihin cácuu ró. <sup>9</sup>¿A ná tu jecūhun ni rō jeē tu ní cáhán rī súcuan siquī jeē tu ndíso ró stáá? ¿A tu cánucūhun ni rō jeē ní tahú cuéché rí uhūn staā ni cayejí uhūn mil tēe, te nasaa jīca ní canastútú ró jeē ni quéndōo? <sup>10</sup>¿Te á tu cánucūhun ni rō jeē ní tahú cuéché rí uxā staā ni cayejí cuūn mil tēe, te nasaa jīca ní canastútú tucu ró? <sup>11</sup>¿Te najehē tu cájecūhun ni rō jeē násūu siquī staā ni cahān rī jíin ró jeē ni cáhán rī jeē coto má candíje ró levadura

tēe fariseo jíin tēe saduceo? Achí yá jíin de.

<sup>12</sup>Yūcuán na te ni cájecūhun ni de jeē tu ní cáhán yā jeē coto de jeē ma cáji de pan jeē yíhi levadura, chí sa suhva ni cahān yatá yá jeē ma cándíje de jnūhun stáhú cástéén tēe fariseo jíin tēe saduceo.

### Jeē ni cáhán Pedro jeē Jesús cúu Cristo

(Mr. 8.27-30; Lc. 9.18-21)

<sup>13</sup>Te nuū ni jíin Jesús región Cesarea Filipino jíin tēe cáscuáha jíin yá, te ni cajnūhun yá de:

Ruhū, Yaā ní nduu tēe, ¿ndé iin cúu ri cácahān ñayuu?

<sup>14</sup>Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

<sup>15</sup>Te ni cahān yā jíin de:

Te máá ró, ¿ndé iin cúu ri cácahān rō? achí yá.

<sup>16</sup>Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, áchí de.

<sup>17</sup>Te ni cahān Jesús:

Yōhyo ndetū rō, Simón sēhe Jonás, chí nasūú iin ñayuu ni steén jnūhun yáha nuū rō, chí sa suhva máá Tátá rī, Yaā ndeé andiví, ní steén yā nuū rō. <sup>18</sup>Te ruhū suni cáhán rī jíin ró jeē maá ró cúu Pedro, jeē cuní cahān: yuū. Te jnūhun ndaā jeē ni cáhán rō jeē maá rí cúu Cristo, suu cúu nájnūhun iin yuū cáhnu. Te siquī yuū cáhnu yáha sáha rí jeē

quítuu vehe, te vehe un cúu ñayuu cácaandíje ruhū. Te tu ndé vé cundeyí cuítí siquí i, ni jñūhun xeēn jeē cájihī i, tuá na vé cúu sáha jíin ánuá i. <sup>19</sup>Te máá ró condiso jniñu ró sáha ró jéē quívicoo ñayuu ndaha Yaā andíví jeē ndacu ya jniñu nuū i. Te tāca jéē cási rō jeē ma sáha ñayuu ini ñayívi yáha, suni casi jeē cáyūcú nde andíví. Te tāca jéē cuáha ró jñūhun sáha i ini ñayívi yáha, suni jeē cáyūcú nde andíví cuáha jñūhun. Achí yá.

<sup>20</sup>Yūcuán na te ni ndacu ya jniñu nuū tée cáscuáha jíin yá, jeē ma cáchi de nuū ní ñin ñayuu jeē cúu ya Cristo.

#### Jeē ní castūhún Jesús jeē cúu yā

(Mr. 8.31-9.1; Lc. 9.22-27)

<sup>21</sup>Te nde saá ní quejéé Jesús cástūhun cájí yá nuū tée cáscuáha jíin yá jeē jíini ñūhún quihīn yā ñuu Jerusalén. Te tāca tée jéhnū jíin sūtū cácujeñu jíin tée cástéén tutuley, stóho ndasí de ya. Te cahni de ya, te nuū uní quiví te natecu yā, achí yá. <sup>22</sup>Yūcuán na te Pedro, ni cana máñūhún de ya, te ni quejéé de cáhán de nuū yā:

¿Naun cáhán ni súcuan? Chi tu cúní Yaā Dios jeē cuu súcuan. Tu jíini ñūhún cuítí ndoho ní jñúndóho yáha, áchí de.

<sup>23</sup>Te ni ndió cóto ya nuū Pedro, te ni cahān yā jíin de:

Cujiyo quihīn rō, chi cáhán rō ná cáhán Satanás. Chi tēe ndúcú stívi rúhū cúu ró. Te tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu. Achí yá.

<sup>24</sup>Yūcuán na te ni cahān yā jíin tée cáscuáha jíin yá:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuáha i jñūhun ndoho i jñúndóho jeē siquí rī, vésú na cúu i. <sup>25</sup>Chi núu ndé ñayuu cuní i cācu i nuū jñúndóho quiji nuū i jeē siquí ruhū, núu súcuan te jnahnū ndetū i níí cáni. Te núu ndé ñayuu, vésú na cúu i jeē siquí ruhū, te cotecu i níí cáni. <sup>26</sup>¿Chi ndé cuajniñu vésú na cundeyí ñayuu nihīn i níí ñáyívi, te núu quívi i nuū jnahnū ndetū i? Chi tú na jíin cuítí chunaa ñayuu jeē cácu ánuá i. <sup>27</sup>Chi ruhū, Yaā ní nduu tēe, ndiji ri jíin táca ndajéhé rī, te yōhyo luu cujéhnū ri nájnūhun cújéhnū Tátá rī. Yūcuán na te cuáha ri tahū nuū ñin ñin ñayuu núu ndese jniñu ni casáha i. <sup>28</sup>Te jendaá cahán rī jíin ró jeē sava tēe cáhiin yāhá, ma cúu de chi nde cuni de jeē maá rí, Yaā ní nduu tēe, ndácu ri jniñu jíin poder rī.

#### Jeē tucu ni nduu ya

(Mr. 9.2-13; Lc. 9.28-36)

**17** Yūcuán na te nuū inū quiví te Jesús ni jeca ya Pedro jíin Jacobo jíin Juan ñani Jacobo, cuahān sīn ya jíin de ñin yucu súcún. <sup>2</sup>Te yūcuán, tucu ni nduu ya nuū de. Chi ni ndindēe núu yā nájnūhun niāndii. Te sahma ya ni nducujín quiyi ndasí, nájnūhun nduva luz. <sup>3</sup>Te ni cajito-ni de jeē Moisés jíin Elías, tēe ni cahīyo jenahán, cándajnūhún de jíin yá. <sup>4</sup>Te ni cahān Pedro jíin yá:

Nacā jeē váha jeē cáhiin ná yáha. Te núu cúní ni te na sáha ná úní vehe ramada, ñin cuu máá ní, inga cuu Moisés, te inga cuu Elías, achí de.

<sup>5</sup>Te níní cáhán gā de, te ni quiiji vicō nūhun jēē yaa ndasí, ni jesi-ni nuū de. Te nuū vicó un ní cahān iin jnūhun:

Yāha cúu Sēhe ri jeē maní ndasí rí jíin, te cúsihí ni rí jíin. Na cúni nahín ró jnūhun cáhán yā. Achí.

<sup>6</sup>Te jeē súcuan ni cajini sōho tēe cáscuáha ún, te ni cajecava ndeyi de, chi yōhyo ni cayūhú de.

<sup>7</sup>Yūcuán na te ni quee Jesús, te ni soó yá ndaha ya siquī de. Te ni cahān yā:

Ndocuñī, te ma yūhu ró jijnáhan ró, achí yá.

<sup>8</sup>Te ni candacoto de, te tuá tēe un ní cájito de, chi máá iin na Jesús.

<sup>9</sup>Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní iin jeē súcuan ni cajito ró, chi nde na nátecu maá rí, Yāa ní nduu tēe, achí yá.

<sup>10</sup>Yūcuán na te tēe cáscuáha jíin yá, ni cacajnūhún de ya:

Núu súcuan te tēe cástéén tutu ley Yāa Dios, ¿najehe cácahān de jeē cánuú ndiji Elías xihna gā, te sáá te quiiji Yāa cúu Cristo? achí de.

<sup>11</sup>Te ni cahān Jesús jíin de:

Jendaá cúu jeē xihna gā quiiji iin tēe cuu nájnūhun Elías, te sátūhva de ndihi, achí tutu. <sup>12</sup>Te cáhán rí jíin ró jeē jé ni quiiji tēe ni cuu nájnūhun Elías, te tu ní jíiní ñayuu jeē suu de cúu. Te ni casáha ndevāha ñayuu jíin de ndihi jeē ní cacuu ni maá i. Te suni súcuan stóho i ruhū, Yāa ní nduu tēe. Achí yá.

<sup>13</sup>Yūcuán na te tēe cáscuáha un, ní cajecūhun ni de jeē cahán yā jeē Juan tēe scuándute, ni cuu de nájnūhun Elías.

**Jeē ní nasávaha ya iin sūchi jíhí yīhí**

(Mr. 9.14-29; Lc. 9.37-43)

<sup>14</sup>Te ni najinū yā jíin de nuū ñayuu cuehē ún. Te ni quee iin tēe, ni jecuñī yití de nuū yā, te ni cahān de:

<sup>15</sup>Cundáhú ni ni séhe yīí ná, chi yōhyo xeēn ndóho i cuehyī jíhí yīhí. Te je ni cuu cuehē jínu cótúú i nuū ñuhún jíin núu ndúte. <sup>16</sup>Te ni quindeca ná i nuū tēe cáscuáha jíin ní, te tu ní cúu sávaha de i, achí de.

<sup>17</sup>Te ni cahān Jesús:

Ñayuu yōhyo nihni ni cácuu ró chi tu cácandije ró jēē cuu nduvāha i. ¿Nasaa ga quivī condee ri jíin ró? ¿Te nasaa ga quivī cuandeyí ni rí jíin ró? Cuáquihin sūchí un na quíji i, achí yá.

<sup>18</sup>Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

<sup>19</sup>Yūcuán na te tēe cáscuáha un, ní cacajnūhun sīn de ya:

¿Najehe tu ní cúu quenehen ná tachí un jijnáhan ná? achí de.

<sup>20</sup>Te ni cahān yā:

Siquī jeē tu cácandije nihin ró jēē cuu sáha ró. Chi jendaá cahán rí jíin ró, jeē núu candije ró vēsú iin tíhí-ni, cūhva nájnūhun iin ndiquin mostaza, te cuu sáha ró táca-ni jniñu yí. Chi cuu cahān rō jeē na cújiyo yucu yáha quihīn inga lado, te cújiyo-ni. Te tēcá-ni jniñu chi cuu sáha ró, te núu candije nihin ró jēē cúu. <sup>21</sup>Te iin tachí súcuan chi ma quénda cuiti quihīn, te núu tu cacān tahu rō te coo ndite ni rō. Achí yá.

**Jeē ni cáhán tucu ya jeē cúu yā**

(Mr. 9.30-32; Lc. 9.43-45)

<sup>22</sup>Te jíca cuu Jesús jíin de jijnáhan de región Galilea, te ni cahān yā jíin de:

Máá rí, Yaā ní nduu tēe, nastúu i ruhū nuū tāca tēe xeēn. <sup>23</sup>Te cahni de ruhū, te nuū uní quivī te natecu rī, achí yá.

Te ni canducuíhyá ndasí ni de jeē ni cáhān yā jñuhun yáha.

### **Siquī xúhun cuajníñu ini templo**

<sup>24</sup>Te ni jinū yā ñuu Capernaum jíin tēe cáscuáha jíin yá. Te tēe cástútú xúhun templo ni quecoo de, te ni cacajñuhún de Pedro:

Te maestro maá ró jijnáhan ró, ¿á tu cuáha de xuhún cuajníñu ini templo, chí naún? áchí de.

<sup>25</sup>Te ni cahān Pedro:

Cuu, áchí de.

Te ná ni quivī de ini vehe, te xihna gā Jesús ni cahān yā jíin de:

¿Ndese jéni ni rō, Simón? Tāca tēe cácuu rey ini ñayiví yáha, ¿ndé núu cájicān de xuhun renta jíin xuhun cuajníñu ñuu? ¿A núu séhe de chí núu ñáyuu sīn vehe? áchí yá.

<sup>26</sup>Te ni cahān Pedro:

Nuū ñáyuu sīn vehe, áchí de.

Te ni cahān Jesús:

Núu súcuan te tú na inga cujéhnu nuū séhe rey jeē cacán xuhún un núu i.

Súcuan ni cahān yā jeē cujéhnu ya cúu ya Sēhe Yaā Dios. Te ni cahān yā:

<sup>27</sup>Te na chúnaa yō, návāha tu squítí ni yō de. Núu súcuan te cuáhān ndé yumar, te scāne ró gancho jeē jníi chācá, te tava rō chācá jéē jníi xihna gā. Te ndica rō yuhu tí, te yūcuan níhīn rō iin xuhun jéē cánda chunaa rō jeē cájicān de. Te quindēca ró núu de jeē cúu ruhū jíin rōhó. Achí yá.

### **Ndé ñáyuu cúu jeē cujéhnu ga**

(Mr. 9.33-37; Lc. 9.46-48)

**18** Te suni quivī un ní quecoo tēe cáscuáha un núu yā, te ni cacajñuhún de ya:

¿Ndé iin cujéhnu ga nuū ñáyuu jeē ndácu Yaā andiví jniñu nuū? achí de.

<sup>2</sup>Te ni cana ya iin sūchi lúlí, te ni jeni ya i mēhñú de. <sup>3</sup>Te ni cahān yā:

Jendaá cahān rī jíin ró, núu tú nandió cóo ni rō te cani ni rō nájnūhun iin sūchi lúlí, ma quíví cuítí rō ndaha Yaā andiví jéē ndacu ya jniñu nuū rō. <sup>4</sup>Núu súcuan te ñáyuu jeē jéni ni i jeē tu cujéhnu i, nájnūhun jéni ni sūchi lúlí yáha, suu i cujéhnu ga nuū ñáyuu jeē ndácu Yaā andiví jniñu nuū. <sup>5</sup>Te na-ni ñáyuu núu jeē siquí ruhū jetáhú i iin sūchi lúlí nájnūhun sūchi yáha, te ruhū jetáhú i. Achí yá.

### **Xeēn coo siquī ñáyuu quíví nuū cuéchi**

(Mr. 9.42-48; Lc. 17.1-2)

<sup>6</sup>Te núu iin sūchi lúlí yáha cándije i ruhū, te núu quiví i cuéchi sáha na-ni ñáyuu, te vāha ga núu ni conuhni iin yōso cáhnu sucūn ñáyuu ún, te quēe i chiji ndute mar nuú. <sup>7</sup>Nacā xeēn cúu jíin ñáyuu ñayiví, chí máni íyó jéē nducú squíví ñáyuu nuū cuéchi. Te máni súcuan coo ini ñayiví. Te nacā xeēn ndoho ñáyuu jeē squíví jnāhan nuū cuéchi.

<sup>8</sup>Núu súcuan te núu ndaha ró chí jéhē rō sáha jeē quíví ró cuéchi, vāha ga cahnde rō te scāne ró na quíhīn, návāha tuá sáha ró cuéchi.

Chi vāha ga jeē coo chácuá ró chí coo tícúhndu ró te quīvi ró núu cotecu ró ní cáni, vēsú jeē cóndee ndíndúú ndaha ró jéhē ró te quīvi ró núu ñuhún jeē cayú ní cáni.

<sup>9</sup>Te núu tinūu ró sáha jeē quīvi ró cuéchi, vāha ga tava ró te scáne ró na quíhín, návāha tuá sáha ró cuéchi. Chi vāha ga jeē coo ñin-ni tinūu ró te quīvi ró núu cotecu ró ní cáni, vēsú jeē cóndee ndíndúú tinūu ró te quīvi ró núu ñuhún infierno.

**Jnūhun yátá síquī lanchi jeē ní sana**

(Lc. 15.3-7)

<sup>10</sup>Coto ma sájéē ni ró nuū ní ñin sūchi lúli yáha. Chi cáhán rī jín ró jeē tāca ndajéhé andiví jéē ndíto ya i, níni cáhīn ya nuū maá Tátá rī andiví. <sup>11</sup>Chi ruhū, Yaā ní nduu tēe, vēji rī jeē jnáma rī ñayuu jeē ní sana i nuū Yaā Dios.

<sup>12</sup>¿Te ndese cájeni ni ró? Núu ñin tēe ndéca de ñin ciento lanchi, te núu sana ñin tí, ¿á tu stóo de cuūn xico xahūn cuūn gā tī yucu, te ndicó de quinanducú de quiti ní sana ún? <sup>13</sup>Te núu ni nanihīn de tí, te ndaā jeē yóhyo ga cúsiñi ni de jín quiti ún vēsú jín cúūn xico xahūn cuūn gā quiti jeē tu ní sana. <sup>14</sup>Te suni súcuan máá Tátá ró, Yaā ndeé andiví, tu cúní yā jeē jnahnú ndetū ni ñin sūchi lúli yáha.

**Siquī jeē cóne cáhnu ni yō nuū jnáhan yó**

(Lc. 17.3)

<sup>15</sup>Te núu jnáhan ró ní sáha de cuēchi síquī ró, núu súcuan te castūhun ró nuū mañúhún-ni de jeē ní sáha de cuēchi síquī ró. Te núu ni jetáhú de jnūhun ni cahān

rō jín de, núu súcuan te je ni ndumanī de jín ró ni sáha ró. <sup>16</sup>Te núu tu ní jétáhú de jnūhun cáhán ró, te quicāna ró ñin chí úu gā ñayuu quihīn ró jín nuū de, cuu i testigo jín ró, te cundaā cuēchi de te ndumanī de jín ró. <sup>17</sup>Te núu tu ní jétáhú tucu de jnūhun cácahān tēe ún, yūcuán na te castūhun ró nuū ñayuu cácañdije. Te núu tu ní jétáhú tucu de jnūhun cahān ñayuu cácañdije ún, te siáá ró de na cóo de nájnūhun ñin tēe tu cáñdije nuū Yaā Dios chí tēe stútú xūhun renta.

<sup>18</sup>Jendaá cahán rī jín ró jéē tāca jéē cási ró jeē ma sáha ñayuu ini ñayīvi yáha, suni casi jeē cáyūcú nde andiví. Te tāca jéē cuáha ró jnúhun sáha i ini ñayīvi yáha, suni jeē cáyūcú nde andiví cuáha jnūhun.

<sup>19</sup>Te suni cáhán rī jín ró, núu uū jnáhan ró ini ñayīvi yáha, ñnuu canī ni ró síquī ñin jeē cacán tahu ró, núu súcuan te máá Tátá rī andiví cuáha ya jeē cájicān ró. <sup>20</sup>Chi núu ndé mí ndútútú úu chí únī ñayuu jeē cáchiñúhún i ruhū, te yūcuán íne rī jín i, áchí yá.

<sup>21</sup>Yūcuán na te ni quee Pedro nuū yā, te ni cajnūhún de ya:

¿Nasaa jínu cone cáhnu ni na núu jnáhan ná jéē sáha de cuēchi síquī ná? ¿A ndé uxā jínu chí naún? áchí de.

<sup>22</sup>Te ni cahān Jesús:

Tu cáhán rī jín ró jeē maá úxā jínu, chí nde uxā jínu jeē uní xico uxí.

**Jnūhun yátá síquī mozo jeē tu ní íne cáhnu ni**

<sup>23</sup>Núu súcuan te Yaā ndeé andiví, suhva cúu jeē íne cáhnu ni yā nuū

ñáyuu ndácu ya jniñu nuū: Cúu nájnūhun iin rey jeē cuní de sándaā de jíin mozo de jeē cátaū nuū de. <sup>24</sup>Te ni quejéé de sándaā de jíin i. Te ni caquindeca i iin mozo jeē taú tijni millón peso nuū de. <sup>25</sup>Te tú na vé névāha mozo un chunaa nuū de. Te ni ndacu de jniñu jeē na cúyāhu mozo un jíin ñasihí jíin séhe jíin táca ndajniñu, te nucūnaa xūhun táú. <sup>26</sup>Yūcuán na te ni jecuiñī yití mozo un, te ni cahān ndahú de jíin patrón de ún: Condetu ní, te na chúnaa ndihi ná xūhun ní, áchí de. <sup>27</sup>Te máá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā. <sup>28</sup>Te ni quenda mozo un cuáhān de, te ni najnáhan-ni de jíin iin jnáhan mozo de jeē taú jecu peso nuū de. Te ni jniñ de tēe ún, te ni quitu de sucūn, te ni cahān de: Chunaa jeē taú rō nuū rī, achí de. <sup>29</sup>Te jnáhan mozo de un ní jecuiñī yití núu de, te ni cahān ndahú jíin de: Condetu te na chúnaa ndihi rī xūhun ró, achí. <sup>30</sup>Te máá de tu ní cuní de, chi ni chune de tēe un vécāa nde quivī nachunaa jeē taú nuū de. <sup>31</sup>Te táca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuangoo de nuū patrón de, te ni cacachi de ndihi ndese ni cuu. <sup>32</sup>Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chi ni ine cáhnu ni rī ndihi jeē taú rō nuū rī, chi ni cahān ndahú ró jíin rí. <sup>33</sup>Te nájnūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, achí de. <sup>34</sup>Te ni quitī ndasí ni patrón, te ni ndacu de jniñu jeē na

quíví vecāa nde nachunaa ndihi jeē taú nuū de.

<sup>35</sup>Te ni jinu ni cahān yā, te áchí yá:

Nájnūhun ni sáha rey un jíin mozo de, suni súcuan sáha máá Tátá rī andiví jíin táca róhó núu tu cone cáhnu ni rō nuū jnáhan ró nde jíin ini jíin ánuá rō, núu na-ni cuēchi sáha i nuū rō. Achí yá jíin de jijnáhan de.

**Siquí jeē ma stóo jnáhan tēe jíin ñahan**

(Mr. 10.1-12; Lc. 16.18)

**19** Te nuū ní ndihi ni cahān Jesús táca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii. <sup>2</sup>Te cuehē ñayuu ni candiquin i ya, te yūcuan ní nasávāha ya ñayuu cácuñu.

<sup>3</sup>Yūcuán na te ni quecoo jecu tēe grupo fariseo nuū yā, chi cácuni de coto ndee de ya núu ndese cahān yā. Te ni cacajnūhún de ya:

¿A íyó ley jeē cuu ndusiin iin tēe jíin ñasihí de núu na-ni siquí cúu, chí naún? áchí de.

<sup>4</sup>Te ni cahān yā:

¿A tu ní cácahu ró tutu iī ndese ni sáha Yaā Dios ñayuu nde xihna ñúhún? Chi tēe jíin ñahan ni sáha ya, achí. <sup>5</sup>Te suni ni cahān Yaā Dios: Jeē yūcuan cúu jeē stóo tēe tátá de náná de, te quijnáhan de jíin ñasihí de, te iin na cuu ndindúú de, achí Yaā Dios, achí tutu. <sup>6</sup>Núu súcuan te tuá cúu uū jnáhan de, chi iin na cúu. Jeē yūcuan tu íyó váha jeē stóo jnáhan, chi jeē ni squíjnéhan Yaā Dios cúu, achí yá.

<sup>7</sup>Te ni cacajnuhún de ya:

Núu súcuan ¿te naun ni ndacu Moisés jniñu jenahán jeē núu stóo iin tēe ñasihí de, te na cúvaha acta jeē ndusín de jíin ña? áchí de.

<sup>8</sup>Te ni cahán yā jíin de:

Siquí jeē níhni ni rō jijnáhan ró, jeē yúcuan ní jēhe Moisés jnūhun jeē stóo ró ñasihí ró. Te nde xihna ñúhún chi nasūu súcuan ní cuu. <sup>9</sup>Te ruhū chi cáhán rī jíin ró, núu iin tēe stóo de ñasihí de, te núu nasūu jēē tǐjni ni ña, te quijnáhan de jíin inga ñahan, núu súcuan te cásiquí ndéē de ña. Te núu iin tēe condeca de ñahan ní ndusín, suni cásiquí ndéē de ña, áchí yá.

<sup>10</sup>Yūcuán na te ni cacahán tēe cáscuáha jíin yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, áchí de.

<sup>11</sup>Te ni cahán yā jíin de:

Jnūhun ni cahán rō yāhá, tu níhín jniñu nuū ndihí tēe, chi máá nene tēe jeē ni sáha Yaā Dios jeē nihín jniñu nuū. <sup>12</sup>Chi íyó tǐjni siquí jeē jési jeē ma cóndeca tēe ñahan. Chi sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cóndeca de ñahan siquí jeē ndihví ni de jíin jniñu jeē ndácu Yaā andíví nuū de. Tēe jeē cúu cuatáhú jnūhun jeē ma cóndeca de ñahan, na cuatáhú de núu súcuan. Achí yá.

**Jeē ni jícān tahú Jesús jehē sūchi lúlí**

*(Mr. 10.13-16; Lc. 18.15-17)*

<sup>13</sup>Yūcuán na te ni quecoo ñayuu jíin sūchi lúlí, jēē na sóo yá ndaha

ya xiní i te cacān tahú yā jehē i. Te tēe cáscuáha jíin yá, ni cacahán de nuū ñayuu vējicoo jíin i. <sup>14</sup>Te ni cahán Jesús:

Cuāha jnūhun na quíjicoo sūchi lúlí jíinā nuū rī, te ma cásí rō jeē quíjicoo i. Chi ñayuu jeē ndió cóo ni i cani ni i nájnuhun sūchi yáha, suu i quíví ndaha Yaā andíví jēē ndacu ya jniñu nuū i, áchí yá.

<sup>15</sup>Te ni sóo yá ndaha ya xiní i jijnáhan i. Te ni quenda ya yúcuan cuáhān yā.

### **Jnūhun tēe cúcá**

*(Mr. 10.17-31; Lc. 18.18-30)*

<sup>16</sup>Te iin tēe suchí ní quee de nuū Jesús, te ni cajnuhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihín tahú na cotecu na níí cáni andíví? áchí de.

<sup>17</sup>Te ni cahán yā jíin de:

¿Naun cáhán rō jeē tēe vāha cúu rī? Tú ni iin tēe vāha íyó, chi máá iin-ni Yaā Dios. Te núu cúní rō cotecu rō níí cáni, te squícu ró jniñu ní ndacu ya. Achí yá.

<sup>18</sup>Te ni cahán de:

¿Ndé-ni jniñu cúu núu súcuan?

Te ni cahán yā:

Ma cáhni rō ndīyí. Ma cosíquí ndéē jnāhan ró. Ma sacuíhná ró. Ma sajnūhún ró. <sup>19</sup>Cuatáhú ró nuū tatá rō nuū naná rō. Te cundáhú ni rō jnāhan ró nájnuhun cundáhú ni rō maá ró, achí yá.

<sup>20</sup>Te ni cahán tēe suchí un:

Tācá jniñu yáha je ni squícu ná ndé ná lulí ná. ¿Te na vé cúmani gā sáha ná núu súcuan?

<sup>21</sup>Te ni cahán Jesús:

Núu cúní rō squícu ndihí ró, cuáhān te xico ró ndihí jeē névāha



ró, te cuāha ró núū ñáyuu ndahú. Te nde andiví cuāha ya jeē ndetū ndasí coo ró. Yūcuán na te quiji ró condiquīn rō ruhū quihīn yō, achí yá.

<sup>22</sup>Te tēe suchí un, ná ni jini sōho de jñuhun yáha, te ni cucuíhyá ni de te cuahān de, chi cúcá ndasí de.

<sup>23</sup>Yūcuán na te ni cahān Jesús jíin tēe cáscuáha jíin yá:

Jendaá cahán rī jíin ró, tēe cúcá chi yōhyo yíí quívicoo de ndaha Yaā andiví jēē ndacu ya jniñu nuū de. <sup>24</sup>Te cáhán tucu ri jíin ró jeē yachī gā yāha iin camello yaū yutúcuí, vēsú jeē quívi iin ñayuu cucá ndaha Yaā Dios jeē ndacu ya jniñu nuū i, achí yá.

<sup>25</sup>Te tēe cáscuáha jíin yá, yōhyo ni canaa ni de jeē ní cajini de jñuhun yáha, te ni cacajñuhun jnáhan de:

¿Ndeé ñáyuu cúu jeē cácu núu súcuan?

<sup>26</sup>Te ni ndacoto Jesús nuū de, te ni cahān yā:

Ñayuu chi ma cúu squíví i máá i ndaha Yaā Dios, te máá yá chi ndihī-ni cuu sáha ya, achí yá.

<sup>27</sup>Yūcuán na te ni cahān Pedro:

Sāña jíinánhan ná ní castóo ná ndihī jeē cánevāha ná, te cándiquīn na níhín. ¿Te na vé nihín na núu súcuan? achí de.

<sup>28</sup>Te ni cahān Jesús jíin de:

Ruhū, Yaā ní nduu tēe, jendaá cahán rī jíin ró jíinánhan ró jēē iin quíví conene rī mesa ndacu ri jniñu, te yōhyo luu kujéhnū ri ini ñayíví jéé. Te quíví ún te máá ró jeē ní cacondiquīn rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí

uū yucūn ñayuu Israel. <sup>29</sup>Te tāca ñáyuu jeē ni stóo vehe, chí ñani, chí cuāha, chí tátá, chí náná, chí ñasihí, chí séhe, chí ñuhun, siquī jeē cóndiquīn i ruhū, te nanihīn i iin ciento gā jeē súcuan. Te suni nihīn tahú i cotecu i níí cáni. <sup>30</sup>Te cuehē ñayuu jeē vijna cácuu i nuū, nduu i sandīhí. Te ñayuu jeē vijna cácuu i sandīhí, nduu i nuū. Achí yá.

### Jñuhun yátá síquī tēe cásjniñu

**20** <sup>1</sup>Te suhva cúu jeē ndacu Yaā andiví jniñu nuū ñáyuu: Cúu nájnñuhun iin tēe chíí ñuhun. Te iin nehen ni quenda de, ndúcú de tíjni mozo jeē taxín ndéhē uva de. <sup>2</sup>Te ni sándaā de jíin mozo un jéé chúnaa de iin denario jeē quíví. Te ni tají de tēe un cuángoo jeē taxín uva de. <sup>3</sup>Yūcuán na te ni quenda tucu de nájnñuhun cahīin. Te ni jito de nuū sava ga tēe cáyūcu sáá-ni de nuū yáhu. <sup>4</sup>Te ni cahān de jíin: Róhó jíinánhan ró, cuángoo taxín ró uva rī, te chunaa vāha ri yáhu ró, achí de. Te tēe un cuángoo de. <sup>5</sup>Te ni quenda tucu de jeē cuácuu cahuxí uū jíin jéé cuácuu cahuní, te suni súcuan ni nihīn tucu de mozo. <sup>6</sup>Te jeē cuácuu cahuhūn ni quenda tucu de. Te ni nihīn tucu de jecu gā tēe cáyūcu sáá-ni nuū yáhu. Te ni cahān de jíin: ¿Najehē cáhiin sáá-ni ró yáha níí ndiáca? achí de. <sup>7</sup>Te ni cacahān tēe ún: Siquī jeē tú ni iin ní cána sāña jéé sájniñu ná. Te ni cahān de jíin tēe ún: Núu súcuan te suni máá ró quingoo ró taxín ró ndehē uva rī, chi chunaa vāha ri yáhu ró, achí de. <sup>8</sup>Te nuū ní ini, te tēe chíí ñuhun ni cahān de jíin tēe cújéhnū nuū

mozo de: Cana xinī tēe cásajniñu te chunaa rō yāhu de, te xihna gā tēe ni quivicoo sandihí, te sáa te tēe ni quivicoo xihna ñúhún, áchí de. <sup>9</sup>Te ni quecoo tēe jeē ni quivicoo cahuhún. Te iin denario ni caquihin iin iin de. <sup>10</sup>Yūcuán na te ni quecoo tēe jeē ni quivicoo xihna ñúhún. Te cājeni ni de jeē cuehē gā quiyāhu de. Te iin-ni denario ni caquihin iin iin de. <sup>11</sup>Te nuū ní caquihin de, te ni caquejé de cācāhān sōo de siquī tēe chíí ñuhun, áchí de: <sup>12</sup>Máa ná jijnáhan ná, ndiáca ni casájniñu ná, te ni candoho ná jéē jihní. Te tēe yáha jéē ni quivicoo sandihí, chí máa iin hora-ni ni casájniñu de. Te inuú-ni ni chiyāhu ní sáña jíin de, áchí de. <sup>13</sup>Te tēe chíí ñuhun ni cahān jíin iin de: Amigo, nasūu jéē tú vāha sáha ri jíin ró. ¿A tu ní sándaā yō jeē iin denario quiyāhu ró, chí naún? <sup>14</sup>Núu súcuan te quihin yāhu ró te quinuhun rō. Chí cúní rī jeē tēe ni quivicoo sandihí yáha, inuú quiyāhu de jíin máa ró. <sup>15</sup>¿Te á tu cuu sáha ri ndese cúní rī jíin xúhun máa rí? ¿Te chí cúcuésún ni rō jeē ní chiyāhu vāha ri de jijnáhan de siquī jeē vāha ni rī? áchí de. <sup>16</sup>Te nájnūhun ni sáha tēe chíí ñuhun, suni súcuan sáha Yaā Dios. Chí ñayuu cácuu sandihí, nduu i nuū. Te ñayuu cácuu nuū, nduu i sandihí. Chí cuehē ñayuu cána ya jeē candíje i ya. Te jecu-ni i cándíje, te nácāji ya maá i jeē ndúu i sēhe ya. Achí yá.

**Jeē ni cahān tucu Jesús jeē cúu yā**

(Mr. 10.32-34; Lc. 18.31-34)

<sup>17</sup>Yūcuán na te ná ni quihin Jesús ichi cuahān yā ñuu Jerusalén, te ni cana sfin ya ndihúxí uū tēe

cáscuáha jíin yá. Te ni cahān yā jíin de:

<sup>18</sup>Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhnu jíin núu tēe cástéén tutu ley. Te ndonda de siquī rī jeē cúu rī. <sup>19</sup>Te squívi de ruhū nuū tēe nación Roma jeē cáyucú Jerusalén cándacu jniñu. Te tāca tēe un sácatā de nuū rī. Te cani de ruhū, te sáa te cahni de ruhū jicā cruz. Te nuū uní quiví te natecu rī. Achí yá.

**Jeē ni jícān naná Jacobo jíin Juan iin favor nuū yā**

(Mr. 10.35-45)

<sup>20</sup>Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuññí yití ña nuū yā, jícān ña iin favor nuū yā. <sup>21</sup>Te ni cajnūhun yá ña:

¿Na vé cuní rō?

Te ni cahān ña:

Cuāha ní jnúhun jeē quiví ndácu ní jniñu te conēne ndindúu séhe ná yáha xiin ní, iin i lado vāha ní, te inga i lado jecó ní, achí ña.

<sup>22</sup>Yūcuán na te ni cahān Jesús jíin Jacobo jíin Juan:

Tu cājini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho ri? Achí yá.

Te ni cacahān de:

Cuu sáha ná.

<sup>23</sup>Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho ri. Te jeē cónēne ró lado vāha ri jíin lado

jecó rí, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rí, te tēe un níhín. Achí yá.

<sup>24</sup>Te uxí gā tēe cáscuáha jíin yá ní cajini de jnūhun yáha. Te ni caquití ni de nuū uú ñani ún. <sup>25</sup>Te Jesús ni cana ya de, te ni cahān yā jíin de:

Cájini rō ndese cásáha tēe cácujuhnu nuū ñayuu tācá nación. Chi cándacu nihin de jniñu nuū i, te máa de cáchí ndese coo. <sup>26</sup>Te máá ró jijnáhan ró, chi ma sáha ró súcuan. Chi núu ndé ñin ró cúni cujéhnú, sa suhva cuajniñu ró núu jnáhan ró. <sup>27</sup>Te núu ndé ñin ró cúni cuu nuū, sa suhva sáha ró máá ró mozo nuū jnáhan ró. <sup>28</sup>Chi suni súcuan sáha ruhū, Yaā ní nduu tēe, chi nasūu jéē véji ri jeē cuajniñu ñayuu nuū rí, chi sa suhva véji ri jeē cuajniñu ri nuū ñáyuu. Te cuāha ri maá rí cuu rí návāha jnama ri cuehē ñayuu, achí yá.

**Jeē ní nasávāha ya uū tēe cuáá**

(Mr. 10.46-52; Lc. 18.35-43)

<sup>29</sup>Yūcuán na te ni quenda ya jíin de ñuu Jericó. Te cuehē ndasí ñáyuu ni candiquín i ya. <sup>30</sup>Te yuhíchi un cáyūcu úū tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ni sáña, áchí de.

<sup>31</sup>Te ñayuu un ní cacahān i nuū de jeē na cási de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña víi, achí de.

<sup>32</sup>Te ni jecuiñí Jesús, te ni cana ya ndíndúú tēe cuáá un, te ni cajnūhun yá de:

¿Na vé sáha ri jíin ró cácu ni rō?

<sup>33</sup>Te ni cacahān de jíin yá:

Jeē na ndúndijin tinūu ná cácu ni ná, áchí de.

<sup>34</sup>Te ni cundáhú ni yā de. Te ni tee ya ndaha ya tinūu de. Te ni candundijin-ni tinūu de. Te ni candiquín de ya cuango de jíin yá.

**Jeē ni quíví Jesús ñuu Jerusalén**

(Mr. 11.1-11; Lc. 19.28-40; Jn. 12.12-19)

**21** Te nuū cuácuyajni ya ñuu Jerusalén, te ni jinū yā jíin tēe cáscuáha jíin yá ñuu Betfagé, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. <sup>2</sup>Te áchí yá jíin de:

Cuáhán ñuu lulí íne ichi núu. Te yūcuan níhín rō ñin burra, núhni tí jíin ñin burro lulí. Te ndají ró tí, quijicoo ró jíin tí nuū rí. <sup>3</sup>Te núu ndé ñin cahān jíin ró, te cachi rō nuū: Máá Jítoho yō jíini ñúhún yá tí, achi rō. Yūcuán na te siáá-ni i tí, quiji ró jíin tí, achí yá.

<sup>4</sup>Te súcuan ni cuu tācá jniñu yáha návāha squícu jnūhun ni cahān tēe ni nacani jnūhun Yaā Dios nde jenahán, yósó nuū tútu:

<sup>5</sup>Cachí rō nuū ñáyuu ñuu

Jerusalén jeē naní ñuu Sión:  
Yāhá condēhe ró jeē véji Rey rō.  
Tu sájéhnú ya maá yá, chi máá burra-ni yósó yá,  
jíin burrito, sēhe quiti ndíso.

Achí tutu.

<sup>6</sup>Yūcuán na te tēe cáscuáha un cuángoo de, te ni casáha de nájñūhun ni ndacu Jesús jniñu nuū de. <sup>7</sup>Te ndéca de burra jíin séhe tí, ni ndecoo de nuū yā. Te ni casoó de sahna de siquí tí, te ni jecosó yā tí. <sup>8</sup>Te cáhiin cuehē

ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi. <sup>9</sup>Te ñayuu cuangoo ichi núú jíin ñayuu cuangoo ichi yátá, cácana jee i:

Yōhō cújéhnū Yaā cúu Sēhe yucūn rey David. Yōhō vāha Yaā cúu Yaā jeē véji jíin jniñu máá Jítóho yō Yaā Dios. Te yōhō cújéhnū máá Yaā Dios. Achí i.

<sup>10</sup>Te nuū ni quívi ya ñuu Jerusalén, te ndíhi ñayuu ñuu un ní cacuvaā i, te cuehē i cájñuhun jnáhan:

¿Ndé tēe cúu tēe yáha? áchí i.

<sup>11</sup>Te ni cacahān ñayuu vējicoo jíin yá:

Yāha cúu Jesús jeē nácani jñuhun Yaā Dios, jeē véji nde ñuu Nazaret ndañúú Galilea. Achí i.

### Jeē ní quenehen ya ñayuu ini templo

(Mr. 11.15-19; Lc. 19.45-48; Jn. 2.13-22)

<sup>12</sup>Yūcuán na te ni quívi Jesús ini templo cáhnu Yaā Dios. Te ni quenehen ya tāca ñayuu cájeen quítí te cánaxico núú ñayuu jeē socō i. Te ni scotúú ndeyi ya tāca mesa tēe cástáyí xuhún, jíin silla tēe cáxicó paloma. <sup>13</sup>Te áchí yá jíin i:

Yósó núú tútu ii jeē cahán Yaā Dios: Vehe ri chí vehe nuū cájicān tahu cúu, áchí Yaā Dios. Te máá ró jijnáhan ró, chí nájñuhun yaū cava ñacuñhá ni canasáha ró. Achí yá.

<sup>14</sup>Yūcuán na te sava ñayuu cuaá jíin ñayuu chacuá ni quecoo i nuū yā ini templo un. Te ni nasávāha ya i. <sup>15</sup>Te sutū cácujehnū jíin tēe cástéén tutu ley Yaā Dios, ni cajito de táca jniñu jéhnū sáha ya, te ni cajini de jeē cácana jee sūchi lúli

ini templo: Yōhō cújéhnū Yaā cúu Sēhe yucūn rey David, achí i. Te ni caquítí ni de. <sup>16</sup>Te ni cacahān de jíin yá:

¿A tu jíni ró jēe súcuan cácahān sūchi yáha? áchí de.

Te ni cahān Jesús jíin de:

Jíni ri. ¿Te á ná tu cahu ró jēe yosó núú tútu ii jeē suhva cáhān iin tēe jíin Yaā Dios?

Sáha ní jēe tāca sūchi lúli jíin sūchi cájexin, vāha ndasí cáhān i jeē Yaā cujéhnū cúu Cristo.

Achí.

<sup>17</sup>Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuáá ún.

### Jeē ni cáhān yā nuū yújnu higo

(Mr. 11.12-14, 20-26)

<sup>18</sup>Te jenéhen inga quiví cuanuhun yā ñuu Jerusalén, te jíi yā sōco.

<sup>19</sup>Te ni jito ya iin nundēhe higo, iin yuhíchi. Te ni jehēn yā jehē. Te tú na ndehē ni níhín yā, chí máá ndaha-ni iin. Te ni cahān yā jíin:

Vijna te ma cúun cuítí gā ndehē xiní rō, achí yá.

Te ni ichi-ni yujnu higo ún. <sup>20</sup>Te tēe cáscuáha jíin yá, ni canaa ni de cájito de. Te ni cacajñuhún de ya:

¿Ndese ni sáha ní jēe yachí-ni ni ichi yujnu higo? achí de.

<sup>21</sup>Te ni cahān yā jíin de:

Jendaá cahán ri jíin ró, núu candíje ró te tú cani síquí ni rō, te cuu sáha ró jniñu jéhnū nájñuhun ni sáha ri jíin yujnu higo. Te nde jniñu jéhnū ga cuu sáha ró, chí nde cuu cahān rō jeē cújiyo yucu yáha, quihín nuū mar, te sáha nájñuhun

cahān rō. <sup>22</sup>Te tāca jēē cacán tahu rō jijnáhan ró, te núu candíje ró jēē nihīn rō, te nihīn rō. Achí yá.

**Siquī jeē ndíso jniñu Jesús**

(Mr. 11.27-33; Lc. 20.1-8)

<sup>23</sup>Te ni quīvi tucu ya ini templo cáhnu. Te níni stéén yā jñuhun, te sutū cácujeñhu jíin táca tée jéñhu jeē cándacu jniñu nuū ñayuu hebreo, ni quecoo de nuū yā. Te ni cacajñuhún de ya:

¿Ndé ní nihīn jniñu ró jēē sáha ró jniñu yáha? ¿Te ndé ñi ni tee jniñu siquī rō jeē sáha ró súcuan? Achí de.

<sup>24</sup>Te ni cahān Jesús:

Suni ruhū, cajñuhun rí rohó ñi jñuhun jíjnáhan ró, te núu cuu stío cuñí rō, yūcuán na te cachi rí nuū rō ndé ní nihīn jniñu ri jeē sáha ri jniñu yáha. <sup>25</sup>¿Ndé ñi ni tee jniñu siquī Juan jeē ni scuándute de? ¿A Yaā Dios chí táca tée? achí yá jíin de.

Yūcuán na te ni candajñuhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cácuandíje ró de? <sup>26</sup>Te núu cahān yō jeē ñayuu ni catee jniñu un síquī de, te cáyūhu yó ñayuu, chí ndívi i cácuandíje i jeē tée ni nacani jñuhun Yaā Dios ni cuu ndije Juan. Achí de cácahān maá de.

<sup>27</sup>Te ni cacahān de jíin Jesús:

Tu cájini rí, achí de.

Yūcuán na te ni cahān yā jíin de:

Ni ruhū, suni ma cáchi rí nuū rō ndé ñi ni tee jniñu siquī rí sáha ri jniñu yáha, achí yá.

**Jñuhun yátá síquī uú sēhe yíi**

<sup>28</sup>Te ni cahān gā yā jíin de:

Cuni nahín ró jñuhun yátá yáha: ñi tēe ni iyo uū sēhe yíi de. Te ni cahān de jíin ñi i: Séhē, quihīn rō taxín ró ndehē uva rí vijna, áchí de. <sup>29</sup>Te ni cahān i: Ma quihín na, áchí i. Te ni cunúu, te ni nacani ni i, te cuahān i nuū jniñu ún. <sup>30</sup>Te tēe un ní jehēn de nuū ñnga sēhe de, te suni súcuan ni cahān de jíin i. Te ni cahān i: Cuu núu súcuan, te quihīn na, áchí i. Te tu ní jéhén i. <sup>31</sup>¿Te ndese cájeni ni rō? Jeē ndíndúú i, ¿ndé ñi ni siquīcu jniñu cúní tatá i? achí yá.

Te ni cacahān de:

Sūchi jēē ni cáhān de jíin xíhna gā, achí de.

Te ni cahān Jesús jíin de:

Súcuan cúu, te jendaá cahán rí jíin ró jeē tée cástútú xúhun renta jíin ñahan cájica jnéni, yachi cánacani ni i jeē stío i cuēchi i te quívicoo i ndaha Yaā Dios jeē ndacu ya jniñu nuū i, te máá ró jijnáhan ró chí ma quívi ró. <sup>32</sup>Chi ni quiji Juan, ni steén de ndese condiquín rō jñuhun ndaā, te tu ní cácuandíje ró jñuhun ni cahān de. Te sa suhva tēe cástútú xúhun renta jíin ñahan cájica jnéni, ni cacandíje i jñuhun ni cahān de. Te máá ró, vésú ni cajito ró jēē ní cacandíje i, te tu ní cánacani cuiti ni rō jeē candíje ró. Achí yá.

**Jñuhun yátá síquī tēe néé casájniñu nuū uva**

(Mr. 12.1-12; Lc. 20.9-19)

<sup>33</sup>Cuni sōho ñnga jñuhun yátá jíjnáhan ró: Ni iyo ñi tēe chíi ñuhun. Te ni nachuhun de cuehē ndehē uva. Te ni jesí de corral, te ni sáha de ñi nuū cúhun ndehē un

táxín. Te ni jeni de iin vehe súcún nāvaha cuu coto de ní cáhnu.

'Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de. <sup>34</sup>Te máá tiempo ndutútú uva, te ni tají de jecu mozo cuanuquihin sava uva nuū tēe cásájniñu ún. <sup>35</sup>Te tēe un ní cajniñi de mozo un. Te iin i ni cacani de, te inga i ni cajehni de, te inga i ni cajēhe de yuū xiní. <sup>36</sup>Te tēe chíí uva ni tají tucu de jecu gā mozo cuangoo, cuehē gā vēsú jeē xíhna ñúhún. Te suni súcuan ni casáha tēe un jíin ndíhi mozo un.

<sup>37</sup>Te jeē sándīhí na te ni tají de sēhe de cuahān. Te jéni ni de: Tēe ún chi cuatáhú de jíjnáhan de nuū séhe ri. <sup>38</sup>Te tēe cásájniñu ún, núu ní cajito de nuū séhe tēe chíí uva, te ni cacahān maá: Tēe chíí táhú cúu jeē yáha. Na cáhni yō de, te ndōo tahū de cuu yó, áchí. <sup>39</sup>Te ni cajniñi de i, te ni caquenehen de i inga lado, te ni cajehni de i. Achí yá.

<sup>40</sup>Yūcuán na te ni cajñuhun yá de: Núu súcuan te núu na quíji tēe chíí uva un, ¿te ndese sáha de jíin tēe cásájniñu ún? áchí yá.

<sup>41</sup>Te ni cacahān de jíin yá:

Ma cundáhú cuiti ni de tāca tēe casáha jniñu néé un, chi cahni de. Te cuāha de ñuhun cáa uva un núu inga sava tēe sájniñu nuū, cuu sava de ndehē jíin. Te quivī ndutútú ndehē, te tēe ún nacuāha de sava ndehē nuū tēe chíí uva. Achí de.

<sup>42</sup>Te ni cahān Jesús jíin de:

¿Te á ná tu cahu ró jnúhun yáha jeē yosó núu tútu ii, jeē ruhū cúu nájnūhun iin yuū? Chi áchí tutu:

Yuū jeē ní casquéhichí tēe cájeni vehe,

yuū yáha nduu jeē quítuu vehe.

Máá Jítóho yō Yaā Dios ni sáha ya súcuan,

te cánaa ni yō jíto yó jniñu yáha.

Achí tutu. <sup>43</sup>Núu súcuan te cáhán rí jíin ró jeē cujiyo-ni jeē ndácu Yaā Dios jniñu nuū rō jíjnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájnūhun cúni yá. <sup>44</sup>Te ñayuu tu cácanđje, ndoho i nájnūhun ndóho ñayuu jeē cotúú siquī yuū te jnáhnú i. Te quivī sándaā Yaā Dios cuēchi, te ñayuu tu cácanđje, ndoho i nájnūhun ndóho ñayuu jeē nínga yuū siquī i te cundihi i sáha. Achí yá.

<sup>45</sup>Te sutú cácujeñhu jíin tēe grupo fariseo ni cajini sōho de tāca jnúhun yátá ní cahān yā. Te ni cajecūhun ni de jeē siquī maá de cúu jnúhun yátá ní cahān yā siquī tēe cásájniñu nuū uva jíin tēe cájeni vehe. <sup>46</sup>Te ni canducú de modo jniñi de ya. Te cáyūhú de jeē quitī ni ñayuu, chi cájeni ni i jeē tēe nácani jnúhun Yaā Dios cúu ya.

### Jnúhun yátá síquī vico nándāha

**22** Yūcuán na te ni cahān tucu Jesús inga jnúhun yátá jíin de jíjnáhan de:

<sup>2</sup>Súcuan cúu jeē ndácu Yaā andiví jniñu nuū ñáyuu: Cúu nájnūhun iin rey jeē sáha de iin vico jeē nándāha sēhe yí de. <sup>3</sup>Te ni tají de tāca mozo de cuacana ñayuu jeē ni cáhán de jíin jéé quíjicoo. Te ñayuu ún tu ní cácuni i quíjicoo i. <sup>4</sup>Te ni tají tucu de jecu gā mozo quingoo, te áchí de jíin: Cahān jíin ñáyuu ní cana ri un jéé iyó túhva ndeyu. Chi je ni jehni rí stiquī rí jíin táca gá quití ní

nduu, te ndihi je íyó túhva. Nehen jijnáhan ró vico nándāha. Achi rō jíin i. Achí de. <sup>5</sup>Te ñayuu ní cana de ún tu ní cásáha i cuenta. Chi iin i cuahān nuū itu i, te inga i cuahān nuū jñíñu sáha i. <sup>6</sup>Te sava ga i ni cajni i tāca mozo rey, te ni casácatā i nuū, te ni cajehni i. <sup>7</sup>Yūcuán na te yōhyo ni quitī ni rey. Te ni tají de soldado de ni jengoo, ni cajehni de ñayuu ní cajehni ndīyí ún, te ni cajehmu de ñuu i. <sup>8</sup>Yūcuán na te ni cahān de jíin sava ga mozo de: Ndihi je íyó túhva jeē cóo vico nándāha. Te ñayuu ní cana ri ún, tu íyó váha jeē quíjicoo i chi nasūu ñáyuu vāha cácuu i. <sup>9</sup>Núu súcuan te cuáhán jijnáhan ró tāca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de. <sup>10</sup>Te ni quendacoo mozo un cuángoo tācá ichi. Te ni castútú de ndihi ñayuu ní canihīn de, cúu ñayuu cunéé, cúu ñayuu váha. Te súcuan te ni chitú ñáyuu ini vehe nuū iyó vico nándāha.

<sup>11</sup>Te ni quīvi rey ini vehe jeē cahán de jíin ñáyuu ni cutútú. Te ni jito de nuū iin tēe jeē tu ñúhun sahma jeē ni jéhe de cuhun ñayuu quijicoo vico nándāha. <sup>12</sup>Te ni cahān de jíin tēe ún: Amigo, ¿ndese ni quīvi ró yáha jēe tu ñúhun ró sahma vico nándāha? áchí de. Te máá tēe ún tu ní cáhán cuiti de. <sup>13</sup>Yūcuán na te ni cahān rey jíin tēe cájeni cohō: Jni de te cuhni rō ndaha de jehē de, te quenehen ró de na quíhín de nuū quéhe nuū néē. Te yūcuan ndáhyū de te nacayihí yuhu de jeē ndóho xeēn de. Achí rey. <sup>14</sup>Chi cána Yaā Dios cuehē

ñayuu jeē na cándíje i. Te jecu-ni i cándíje, te máá i nácāji ya jeē ndúu i sēhe ya. Achí Jesús.

### **Siquí xúhun renta**

(Mr. 12.13-17; Lc. 20.20-26)

<sup>15</sup>Yūcuán na te cuangoo tēe grupo fariseo. Te ni candajnūhún de núu ndese sáha de návāha cahān yā iin jñūhun jeē nihín de cuēchi siquí yā. <sup>16</sup>Te ni catají de jecu tēe cáscuáha jíin máá de jíin tēe grupo Herodes cuangoo de. Te ni cacahān de jíin yá:

Maestro, cájini na jēe tēe cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni iin ñayuu siquí ní, chi tu sáha ní cuenta ndese cúu iin iin i, chi inuú-ni sáha ní jíin i. <sup>17</sup>Núu súcuan te cahān ní ndese jéni ni ní: ¿A íyó váha jeē chúnaa yō renta nuū rey nación Roma jeē jñí nación yō, chí tuú? áchí de.

<sup>18</sup>Te ni jini Jesús jeē cájito ndee de ya. Te ni cahān yā jíin de:

Tēe stáhú-ni cácuu ró. ¿Najehē cájito ndee rō ruhū? <sup>19</sup>Stéén xūhun jēe jéconaā renta na cóto ri, achí yá.

Te ni castéén de iin denario nuū yā. <sup>20</sup>Te ni jito ya, te ni cajñūhun yá de: ¿Ndé iin nuū cúu jeē ndeé nuū xúhun yáha, te ndé síhví cúu jeē ndeé yáhá?

<sup>21</sup>Te ni cacahān de jíin yá:

Nuū jíin síhví rey un cúu, áchí de. Yūcuán na te ni cahān yā jíin de: Núu súcuan te nacuāha ró núu rey un jēe yíhi cuenta nuū de, te nacuāha ró núu Yaā Dios tāca jēe yíhi cuenta nuū maá yá, achí yá.

<sup>22</sup>Te nuū ní cajini de jeē ndichí ní cahān yā jñūhun yáha, te ni canaa

ni de, te ni castoo de ya, te cuango de de.

**Jeē ní cacajñuhún de siquī jeē nátecu ndīyi**

(Mr. 12.18-27; Lc. 20.27-40)

<sup>23</sup>Te suni quivī un ní quecoo jecu tēe grupo saduceo nuū yā. Te tēe un cácahān jeē tu nátecu cuiñi ndīyi. Te ni cacahān de jíin yá siquī iin jñuhun, áchí de:

<sup>24</sup>Maestro, Moisés ni cahān de jeē núu iin tēe cuu de, te ndōo ñasihí de, te núu tú sēhe de ní íyo jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñiñi nuū ndíyi ñani de. Achí Moisés. <sup>25</sup>Te ñuu na ní íyo uxā ñani. Te tēe núu ní quiñáhan de jíin ñahan. Te ni jihí de. Te jeē tú sēhe de ní íyo, te ni ndōo ñasihí de nuū ñani de. <sup>26</sup>Te tēe ún suni ni jihí de, te tú na sēhe de ní íyo tucu. Te suni súcuan tēe unī, nde jíin ndihúxá de. <sup>27</sup>Te nuū ní ndihí de ni cajihí, te suni ni jihí ñahan ún. <sup>28</sup>Núu súcuan te quivī nátecu ndīyi, ¿ndé iin de cuu ña ñasihí de? Chi ndihúxá de ni condeca de ña. Achí de jíin yá.

<sup>29</sup>Yūcuán na te ni cahān yā jíin de:

Yōhoyo cástívi ró jñuhun siquī jeē tu cájecūhun ni rō jeē cahán tutu iī, ni tu cájini rō jeē iyó poder Yaā Dios jeē nastécu yā ndīyi. <sup>30</sup>Chi quivī nátecu ndīyi, te tuá na jñuhun quiñáhan tēe jíin ñahan coo. Chi coo i nájnūhun ndajéhé Yaā Dios andiví. <sup>31</sup>Te siquī jeē nátecu ndīyi, ¿á tu ní cácahu ró tutu jñuhun jeē cahán Yaā Dios jíin ró? <sup>32</sup>Máá rí cúu Yaā Dios Abraham jíin Isaac

jíin Jacob, achí Yaā Dios. Chi vēsú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de. <sup>33</sup>Te ñayuu un ní canaa ni i cájini nahín i jñuhun stéén yā.

**Jniñu cánuú ndasí gá jeē ní ndacu Yaā Dios**

(Mr. 12.28-34)

<sup>34</sup>Yūcuán na te tēe grupo fariseo ni cajini de jeē ní cajesi tēe saduceo yuhu de ni sáha ya. Te ni candutútú de nuū yā. <sup>35</sup>Te iin de jeē cúu tēe stéén tutu ley Yaā Dios, ni cajñuhún de ya, chi coto ndee de ya cuní de:

<sup>36</sup>Maestro, ¿ndé iin cúu jñuhun ndácu jniñu cánuú ndasí gá nuū tútu ley? achí de.

<sup>37</sup>Te ni cahān Jesús jíin de:

Coo maní ndasí ró jíin máá Jítoho rō Yaā Dios, nde jnāā ndasí ró sáha ró ndihí jeē cúsiñi ni yā, nde jíin ini jíin ánuá rō, jíin níí jéē níjnūní rō, achí tutu. <sup>38</sup>Yāha cúu jniñu ndácu ya jeē cujéhnu ga te cánuú ndasí gá. <sup>39</sup>Te jniñu uū jeē ní ndacu ya, suni súcuan cáhán: Cundáhú ni rō jnāhan ró nájnūhun cundáhú ni rō maá ró. <sup>40</sup>Te chíji ndíndúú jñuhun yáha ní quenda ndihí ley jeē ní tee Moisés, jíin ndihí jeē ní castéén tēe ni canacani jñuhun Yaā Dios, achí yá.

**Siquī jeē cúu Cristo sēhe yucūn David**

(Mr. 12.35-37; Lc. 20.41-44)

<sup>41</sup>Te níni cáyūcu tútu gá tēe fariseo un, te Jesús ni cajñuhun yá de:

<sup>42</sup>¿Ndese cájeni ni rō siquī Cristo? ¿Sēhe ndé yucūn cúu ya?



Te ni cacahān de:

Sēhe yucūn David, achí de.

<sup>43</sup>Te ni cahān yā jíin de:

Núu súcuan ¿te ndese cúu jeē David ni cahān de Jitoho de ya, ni sáha Espírиту Santo nde jenahán? Chi ni cahān de:

<sup>44</sup>Máá Jítóho yō Yaā Dios ni cahān yā jíin Jítóho rī, Yaā quiji: Cucōo ró lado váha ri nuū cujéhnú ró, te na sáha ri jeē quende rō poder tāca jēē cájito uhū rohó. Achí Yaā Dios. Achí David. <sup>45</sup>Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? achí yá.

<sup>46</sup>Te ni ñin de tu ní cúu stió cuñí cuíti de jnúhun nuū yā. Te nde quiví ún tuá ni ñin de ní chúndeyí ni de cajnúhún de ya.

### Jeē ni cáhān yā jeē iyó cuéchi de jíināhan de

(Mr. 12.38-40; Lc. 11.37-54; 20.45-47)

**23** Yūcuán na te ni cahān Jesús jíin ñáyuu jíin tēe cáscuáha jíin yá:

<sup>2</sup>Tēe cástéén tutu ley Yaā Dios jíin tēe grupo fariseo, cájeni ni de jeē ndiso jníñu de jeē steén de ley jeē ni jéhe ya nuū Moisés. <sup>3</sup>Núu súcuan te cuatáhú ró te squícu ró táca jēē cándacu de nuū rō. Te ma sáha ró nájnūhun casáha máá de. Chi cácahān-ni de, te tu cásquícu de. <sup>4</sup>Chi suni cástéén de tāca ley ni catava maá de jeē yí sáha, te cátee de squícu ñáyuu, te tu cácuñdeyí i squícu i. Te máá de jíināhan de, chi ni ñin xini ndáha de tu cáscánda de jeē squícu de. <sup>5</sup>Te máni squícu jeē na cuájnúhún ñáyuu de cúu ndíhi

jeē casáha de. Chi cánujnahan ni de cuhni de cuehē jnúhun tutu i jneē de jíin ndaha de. Te suni casácáni ga de yuhvā yusáhma de jeē steén jeē cácujeñnu ga de vésú inga ñáyuu. <sup>6</sup>Te cánujnahan ni de cucōo de nuū silla yíñúhún gá nuū cáyeji ñáyuu vico, jíin silla yíñúhún gá ini vehe i sinagoga. <sup>7</sup>Te suni cánujnahan ni de jeē cahán yíñúhún ñáyuu jíin de nuū calle, jíin jēē cahán i maestro jíin de.

<sup>8</sup>Te máá ró jíināhan ró, ma cuáha ró jnúhun jeē cahán ñáyuu maestro jíin ró. Chi inuú cácuu ndíhi ró jēē cácuu ró hermano, te íyó ñin-ni Maestro rō jeē cúu ruhū, Cristo. <sup>9</sup>Te ma chiñúhún ró ni ñin tēe ñayiví yáha jeē cahán rō padre jíin de. Chi íyó ñin-ni Tátá rō jíināhan ró, Yaā ndeé andiví. <sup>10</sup>Te suni ma cuáha ró jnúhun jeē cahán i jitoho jíin ró. Chi íyó ñin-ni Jitoho rō, te suu cúu ruhū, Cristo. <sup>11</sup>Te tēe mēñhu ró jíināhan ró jeē jejniñu nuū jnāhan, suu de cúu jeē cujéhnú ga. <sup>12</sup>Chi tēe jeē sajeñnu de máá de, sa ndululí de. Te tēe jeē sálulí de máá de, sa ndujéhnú de.

<sup>13</sup>Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cájesi rō jeē quíví ñáyuu ndaha Yaā andiví jēē ndacu ya jniñu nuū i. Chi tu quívicoo máá ró, ni tu cájēhe ro jnúhun quívicoo ñáyuu nducú quíví.

<sup>14</sup>Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cáquende rō vehe ñahan ní caquendō ndáhú. Yūcuán na te cájicān tahu nahán ró návaha cani ni ñáyuu jeē tú na cuéchi ró. Jeē yúcuán xeēn gā ndoho ró castigo.

<sup>15</sup>'Nacā xeēn ndoho róhó téé cástéén tutu ley jíin róhó téé fariseo, chi téé stáhú-ni cácuu ró. Chi níí ñuhun ichi jíin níí mar cájica cuu ró cánducú ró ñin ñayuu scandíje ró sáhān maá ró. Te núu ni candíje i, te casáha ró jéé vihyá gā cúu cuēchi i jeē quihín i infierno vésú maá ró.

<sup>16</sup>'Nacā xeēn ndoho ró, chi cácuu ró nájnūhun téé cuáá jéé steén ichi nuū ñayuu. Chi cácahān rō: Núu ndé téé jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. <sup>17</sup>Téé cánéé téé cuáá cácuu ró jéé castívi ró jnūhun cácahān rō. ¿Ndé ñin cúu jeē cujéhnu ga, á oro un chí Yaā Dios jeē ndeé ini templo jeé sáhíi oro un? <sup>18</sup>Te suni cácahān rō: Núu ndé téé jéjnūhun téyí de, te núu cahān de jeē Yaā Dios jeé chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeé chíí ndajníñu jeé cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. <sup>19</sup>Téé cánéé téé cuáá cácuu ró jéé castívi ró jnūhun cácahān rō. ¿Ndé ñin cúu jeé cujéhnu ga, á ndajníñu yúcu nuū altar, chí Yaā Dios jeé sáhíi yā ndajníñu ún? <sup>20</sup>Núu súcuau te téé jéjnūhun téyí, te núu ndácunehen de Yaā Dios jeé chíí altar, núu súcuau te nde jíin ndajníñu

yúcu nuū altar ndácunehen de.

<sup>21</sup>Te téé jeé jéjnūhun téyí, te núu ndácunehen de templo, núu súcuau te nde jíin Yaā Dios jeé ndeé ini templo ndácunehen de. <sup>22</sup>Te téé jéjnūhun téyí, te núu ndácunehen de andiví, núu súcuau te suni ndácunehen de mesa Yaā Dios te nde jíin máá Yaā Dios jeé ndeé nuū mesa un.

<sup>23</sup>'Nacā xeēn ndoho róhó téé cástéén tutu ley jíin róhó téé fariseo, chi téé stáhú-ni cácuu ró. Chi casáha ró úxí uxí nuhní tamínú jíin yucū anís jíin yucū comino, te cásocō rō ñin ñin siquí tāca úxí un núu Yaā Dios. Te cástóo ró jnūhun cánuú ndasí gá nuū ley, suu jeé cáca ndaā rō, jíin jéé cundáhú ni rō jnāhan ró, jíin jéé candíje ró. Tāca jéé yáha cánuú sáha ró núu, te suni ma stóo ró jéé socō rō tāca yúcu ún. <sup>24</sup>Cácuu ró nájnūhun téé cuáá jéé steén ichi nuū ñayuu. Chi cásquícu ró ñin jeé lulí gá un, te cástóo ró jéé cánuú gá. Te suu cúu nájnūhun jeé cátava rō chūcún ndíhí jeé ñūhun nuū ndúxi, te cácocó ró ñin quití cáhnu jeé naní camello.

<sup>25</sup>'Nacā xeēn ndoho róhó téé cástéén tutu ley jíin róhó téé fariseo, chi téé stáhú-ni cácuu ró. Chi nájnūhun jeé cánacate ró yátā vaso jíin yátā cohó. Te ichi íni rō chi nūhun máni máá jnūhun cuíhna jíin jnūhun ndíyo ni. <sup>26</sup>Téé cuáá cácuu ró, fariseo. Xihna gā sáha ró jéé coo ndoo ini anuá rō, te yūcuán na te suni coo ndoo tāca jéé casáha ró jéé cájito ñayuu nuū.

<sup>27</sup>'Nacā xeēn ndoho róhó téé cástéén tutu ley jíin róhó téé fariseo, chi téé stáhú-ni cácuu ró.

Chi cándāa ró nájñuhun vehe ndīyi nuū panteón jeē cáyaa. Chi ichi yátá jíto luu, te ichi íni ñuhun chítú yiqui ndíyi jíin táca jéē tehyú. <sup>28</sup>Te súcuan cácuu máá ró, chi ichi yátá rō casáha ró jeē tée ndaā cácuu ró núū ñáyuu. Te ichi íni rō ñuhun chítú jñuhun stáhú-ni jíin jñuhun néé.

<sup>29</sup>Nacā xeēn ndoho rōhó tée cástéén tutu ley jíin rōhó tée fariseo, chi tēe stáhú-ni cácuu ró. Chi casáha ró vehe siquī nuū yíndūji ndīyi jíí rō, tēe ni canacani jñuhun Yaā Dios nde jenahán. Te casáha luu ró vehe siquī nuū yíndūji táca tēe ni iyo ndaā. <sup>30</sup>Te cácahān rō: Núu jeē suni yúcu yó tiempo jeē ní cotecu ndīyi jíí yō, te ma squívi nduu yō jíin de jeē cáhni yō tēe ni canacani jñuhun Yaā Dios, achí ró. <sup>31</sup>Te súcuan cácahān ndaā rō jeē maá ró cácuu yucūn ñayuu ni cajehni tēe ni canacani jñuhun ya. <sup>32</sup>Núu súcuan te táca cuéchi jeē ní casquéjéé ndíyi jíí rō, máni un casáha ga maá ró.

<sup>33</sup>Va sēhe coō cácuu ró, chi xeēn rō nájñuhun coō. ¿Ndese cācu ró jéē ma jnahnú ndetū rō quingoo ró infierno? <sup>34</sup>Núu súcuan te tají rí táca tēe nacani jñuhun Yaā Dios nuū rō, jíin táca tēe ndíchí jéē castéén jñuhun ya. Te sava de cahni rō, te sava de cata caa ró jicā cruz. Te sava ga de cani ró de ini táca vehe íi sinagoga, te scúnu ró de quingoo de táca ñuu. <sup>35</sup>Te súcuan te condee cuéchi siquī maá ró jeē ní cajehni jíí rō táca tēe ndaā, xihna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mēhñu

cuarto íi jíin altar. <sup>36</sup>Jendaá cahán rí jíin ró jeē táca cuéchi yáha condee siquī ñáyuu iyó vijna.

### Jeē cucuíhyá ni yā jíto ya ñuu Jerusalén

(Lc. 13.34-35)

<sup>37</sup>Róhó ñuu Jerusalén, jéhni rō tēe cánacani jñuhun Yaā Dios, te jéhe ro yúu xiní tēe tájí Yaā Dios vējicoo nuū rō. Te cuehē jínu ni cuni rí nastútú rí sēhe ró, nájñuhun ndují jéē nastútú tí sēhe tí chiji ndijēn tí, te tu ní cúní rō. <sup>38</sup>Núu súcuan te vijna te stóo uun na rí rohó jíin sēhe ró. <sup>39</sup>Chi cáhán rí jíin ró jéē ndé vijna te ma cóto cuítí gā rō nuū rí, chi nde quiji quiví jeē cahán sēhe ró: Yōhyo vāha Yaā cúu Yaā véndijí jíin jniñu máá Jítoho yō Yaā Dios, achi i. Achí yá.

### Jeē ní cachi yā jeē náā templo

(Mr. 13.1-2; Lc. 21.5-6)

**24** Te ni quenda Jesús ini templo cáhnu cuahān yā. Te ni quecoo tēe cáscuáha jíin yā, te ni cacahān de jíin yā siquī táca vehe jeē ndejnáhan jeē cúu máá templo un. <sup>2</sup>Te ni cahān yā jíin de: Táca jéē cájito ró yáha, jendaá cahán rí jíin ró jeē quiji quiví jeē ma cóso jnáhan ga ni ñin yuū, chi ndíhi jnanū. Achí yá.

### Na seña coo nuū cuácuyajni ndíhi ñayiví

(Mr. 13.3-23; Lc. 21.7-24; 17.22-24)

<sup>3</sup>Te ni jehēn yā jíin tēe cáscuáha jíin yā nde yucu Olivos, te ni cucōo ya yūcuán. Te ni quecoo de nuū yā, te ni cacajñuhun sñin de ya:

Castūhun ní ndé quíví coo táca jéē ní cachi ní jéē coo. ¿Te na seña

coo núu ni cuyajni quiví ndíji ní jín jéé jínu ñayíví? áchí de.

<sup>4</sup>Te ni cahān Jesús:

Coto ró jéé ma stahú ni iin de róhó. <sup>5</sup>Chi quijicoo cuehē tēe jeē stahú jín síhví rí. Máá rí cúu Cristo, achi de. Te súcuan stáhú de cuehē ñayuu. <sup>6</sup>Te nihin rō jñūhun jeē tāca lado iyó guerra, chí je yajni coo guerra. Te ma yūhu ró, chi cánuú coo súcuan. Te ni ná tu jinū quiví ndíhi ñayíví. <sup>7</sup>Chi ndonda nación siquí inga nación, te ndonda ñuu siquí inga ñuu jeē cuajnáhan. Te coo jnamā jín cuéhyī xeēn. Te cháha chúcuan jñāa. <sup>8</sup>Te tāca jéé yáha cácuu jñūndóho quejéé xíhna ñúhún gá.

<sup>9</sup>Yūcuán na te nastúu i róhó jíjnáhan ró jéé stóho i róhó te cahni i róhó. Te ndíhi ñayuu quitī ni i nuū rō jeē siquí ruhū. <sup>10</sup>Te quiví ún chi cuehē ñayuu candíje caca yátá i, te quitī ni i nuū jnáhan i, te nastúu jnáhan i. <sup>11</sup>Te canecoo cuehē tēe stáhú, te cahān de jeē jnúhun Yaā Dios cánacani de, te stáhú de cuehē ñayuu. <sup>12</sup>Te nducuehē jniñu néé, te jeē yúcuu cuehē i ma cóo maní gā i. <sup>13</sup>Te ñayuu cuiñi nihin jín jnúhun ri nde quiví jínu, ñayuu ún chi cācu. <sup>14</sup>Te jñūhun yáha síquī ndese ndácu Yaā Dios jniñu, cuitē núu ní cáhnu ñayíví, návāha cuni ñayuu tācá nación. Yūcuán na te jínu ñayíví.

<sup>15</sup>Te Daniel, tēe ni nacani jñūhun Yaā Dios, ni tee de jñūhun iin tēe néé jéé quíji. Te róhó jéé cácahu tutu ún, na jécūhun ni rō. Chi iin quiví te cuni rō jeē sáha ndevāha de jeē stávi de tācá ndajniñu ii ini templo, te cuiñi de ini lugar ii. <sup>16</sup>Te

núu cuni rō jeē súcuan cúu, te ñayuu cáyūcú región Judea, na cúu i caa i yucu quingoo i. <sup>17</sup>Te ñayuu cáyūcu núu quéhe, ma ndívi i ini vehe jeē quénehen i ndajniñu i, chi cánuú cunu yachí i návāha cācu i. <sup>18</sup>Te ñayuu cáhiin nuū ítu, ma ndíji i vehe jeē quíhin i sahma i. <sup>19</sup>Te quiví ún nacā jeē ndahú ñahan cáñuhun sēhe jín ñahan cándeca yiquín, chi ma cúnihin ña cunu yachí ña. <sup>20</sup>Te cacān tahú rō jeē ma quíji jñūndóho un jéé cunu ró máá tiempo cúun yuhvā ni quiví ndétátú. <sup>21</sup>Chi jeē quejéé un te coo cuehē jñūndóho xeēn, jeē ná tu coo súcuan nde quiví ní jecōo ñayíví te nde vijna. Te jeē ndíhi jñūndóho ún te ni ma cóo ga jeē súcuan. <sup>22</sup>Te núu tú nastíyi Yaā Dios tiempo jñūndóho ún, te ni iin ñayuu ma cácu cuiti i. Te jeē siquí ñayuu cácandíje jeē ní nacāji ya, jeē yúcuu nastíyi ya tiempo un.

<sup>23</sup>Núu súcuan te núu iin ñayuu cahān jín ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahán i. <sup>24</sup>Chi canecoo tēe cástáhú jéé achi de jeē Cristo cúu de, chí achi de jeē tēe nācani jñūhun Yaā Dios cúu de. Te sáha de jniñu jéhu jeē naa ni ñayuu coto i, návāha stáhú de nde maá ñayuu ní nacāji ya, te núu na cúu. <sup>25</sup>Je ni castūhun rí nuū rō vijna nde ná tu coo. <sup>26</sup>Núu súcuan te núu cahān ñayuu jín ró: Cuácondēhe ró, chi nde nuū ñúhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chi ini vehe yáha íne ya, achi i, te ma candíje ró jíjnáhan ró. <sup>27</sup>Chi nájnūhun jeē ndíndēe

sáha taja te cúndijin nde ichi núu cáne niāndii jíin ndé ichi núu queé niāndii, suni súcuan coo quivī ndiji ruhū, Yaā ní nduu tēe, chi ndihi ñayuu coto. <sup>28</sup>Te nájnūhun jeē cutútú téji ndé-ni cúu nuū catú quití ní jíhi, suni súcuan coo tāca jēe ni cáhān rī ndé-ni cúu-ni nuū cáhiyo ñayuu.

**Ndese coo quivī ndiji Yaā ní nduu tēe**

(Mr. 13.24-37; Lc. 21.25-33; 17.26-30, 34-36)

<sup>29</sup>Yūcuán na te núu ni ndihi tāca jnūndóho quivī ún, te cojnúú níāndii, te yoō ma ndíi gā. Te níngoo quīmī andíví. Te tāca jēe íin andíví chi quisi i. <sup>30</sup>Yūcuán na te coto ñayuu nuū maá rí, Yaā ní nduu tēe, ndiji ri ichi ándíví. Te ndahyū ñayuu tācá nación ní cáhnu ñayīví. Te coto i nuū ruhū, Yaā ní nduu tēe, ndiji ri jíin vícō andíví, te condiso ri cuehē poder, te yōhyo luu cujéhnu ri. <sup>31</sup>Te tají rí ndajéhé rí quíngoo, te tiví nihin ya trompeta. Te quinastútú yá ñayuu ní nacáji ri ndicúún lado ñayīví, nde íin lado ñayīví jíin ndé inga lado.

<sup>32</sup>Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní.

<sup>33</sup>Te suni súcuan núu ni cajini rō jeē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndiji ri, te yachī coo. <sup>34</sup>Jendaá cahán rī jíin ró jeē ma cúu ndihi ñayuu jeē cóto jnūndóho ún, chi nde squícu ndihi jniñu ún. <sup>35</sup>Andíví jíin ñayīví chi naa, te tāca jnūhun cáhān rī chi ma náa, chi ndihi squícu.

<sup>36</sup>Te quivī jíin hora jeē ndíji ri, tú ni íin ñayuu jíin, ni máá ndajéhé cáhiyo andíví, ni máá rí, Sēhe Yaā Dios. Chi máá íin ni Tátá rī Yaā Dios cúu jeē jíin.

<sup>37</sup>Chi nájnūhun ni cuu quivī ni íyo Noé, suni súcuan coo quivī ndiji ruhū, Yaā ní nduu tēe. <sup>38</sup>Chi quivī ún, nde ná tu cuun saū xeén, te cáyeji i cájiji i, cánandāha i, te cájēhe i sēhe síhí i jeē nándāha, nde ni jinū quivī jeē ni quívi Noé ini barco cáhnu jeē naní arca. <sup>39</sup>Te tu ní cácandíje ñayuu jeē cuun saū xeén, te ni cuun, te ni ndaa ndute ni cajihí ndihi i. Te suni súcuan coo núu na ndíji ruhū, Yaā ní nduu tēe. <sup>40</sup>Te quivī ún cone uū tēe sájniñu nuū ítu. Te íin de naquihin ri, te inga de ndōo. <sup>41</sup>Te coo uū ñahan jeē ndíco cáhnu, te íin ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chi tu ní cácandíje i.

<sup>42</sup>Núu súcuan te ndito na cóo ni rō, chi tu cájini rō na quivī ndiji Jitoho rō. <sup>43</sup>Te na chúhun ni rō jeē cahán jnūhun yátá yáha: Tēe chíí vehe, núu jeē jíin de na hora quiji ñacuihná, te condito de, te ma cuáha de jnūhun sácuíhná ndajniñu vehe de núu. <sup>44</sup>Te rōhó jíjnáhan ró, suni súcuan coo tūhva ró, chi máá hora jeē tú na vé cájeni ni rō, te ndiji ruhū, Yaā ní nduu tēe.

**Jnūhun yátá síquī mozo**

(Lc. 12.41-48)

<sup>45</sup>Núu súcuan te coo ró nájnūhun íin mozo jeē ndíto xiní te squícu vāha. Te máá patrón ni jeni de mozo un jēe cóto i ñayuu vehe de, návāha scáji i máá hora. <sup>46</sup>Te

yōhyo ndetū mozo un jēē núu ni ndee patrón, te cuni de jeē súcuan squícu vāha i. <sup>47</sup>Jendaá cahán rī jín ró jeē cani de mozo un jēē coto i ndíhi ndajniñu de. <sup>48</sup>Te núu mozo sáha néé cúu i, te jéni ni i jeē ma ndíji yachí patrón i, <sup>49</sup>te quejéé i cani i jnáhan mozo i, te caji i coho i jín tée cánajini, <sup>50</sup>núu súcuan te ndee-ni patrón quiví jeē tu ndétu i jín hora jeē tú na vé jéni ni i. <sup>51</sup>Te stóho xeēn de i, te squíví de i nuū cáhiin tēe stáhú-ni. Te yūcuan ndáhyū i te nacayíhí yuhu i jeē ndoho xeēn i. Achí yá.

**Jnūhun yátá síquī uxī sūchi síhí**

**25** <sup>1</sup>Te suhva cúu jeē ndácu Yaā andíví jniñu nuū ñáyuu: Cúu nájñūhun iin vico nándāha. Te ni iyo uxī sūchi síhí jeē ní caquihin i linterna cándaha i, te ni quendacoo i cuajnahan i iin tēe nandāha. <sup>2</sup>Te uhūn i chi tú ndito xinī i, te uhūn i chi ndito xinī i. <sup>3</sup>Te sūchi tú ndito xinī, cándaha i linterna i, te tu cándaha i petróleo jeē náchuhun i. <sup>4</sup>Te sūchí ndito xinī, chi cándaha i botella petróleo jín linterna i. <sup>5</sup>Te níní cúcuéé quiji tēe nandāha ún, te ni quee māhná, te ni caquixí ndíhi i. <sup>6</sup>Te nuū ní cuu sava ñuú, te ni cajini i jeē cácana jee: Je véji tēe nandāha. Cuángoo quijnahan rō de jínáhan ró, achí. <sup>7</sup>Yūcuán na te táca súchi síhí un ní candonda i, te ni casátūhva i linterna i. <sup>8</sup>Te sūchi tú ndito xinī, ni cacahān i jín súchi ndito xinī: Cuāha jecu petróleo nuū rī jijnáhan ró, chi cuandahvā linterna rī, achí i. <sup>9</sup>Te ni cacahān sūchí ndito xinī: Ma cúu, chi ma cánda jeē cúu máa

rí jín máa ró. Vāha ga quingoo ró núu cúyāhu, te cuaan ró jéé cúu máa ró. Achí i. <sup>10</sup>Te níní cuángoo i cuaan i, te ni quee-ni tēe nandāha. Te sūchi cáhiyo tūhva un, ní quívicoo i jín de vico nándāha de. Te ni ndihyū yehyí. <sup>11</sup>Te ni cunúu, te ni quecoo uhūn gā sūchi síhí un. Te ni cacahān i jín tēe nándāha: Nune ní yéhyí na quívicoo ná, achí i. <sup>12</sup>Te ni cahān maá de: ¿Ndé nuū véjicoo ró? Chi tu jíní rī rohó, achí de. Achí yá.

<sup>13</sup>Yūcuán na te ni cahān yā:

Núu súcuan te ndito coo ni rō, chi tu cájini rō na quiví na hora ndíji ruhū, Yaā ní nduu tēe. Achí yá.

**Jnūhun yátá síquī tēe ní jēhe núu xūhun núu táca mozo**

<sup>14</sup>Te suhva cúu jeē ndácu Yaā andíví jniñu nuū ñáyuu: Cúu nájñūhun iin tēe jeē quihín jicá de inga ñuu. Te nde ná tu quihín de te ni cana de mozo de jínáhan, te ni jēhe núu de xūhún de nuū i, jeē na sájniñu i jín návāha nducuehē.

<sup>15</sup>Te nuū iin i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de iin mil. Súcuan ni jēhe de, chi jíní de nasaa canda iin iin i sájniñu i jín. Yūcuán na te ni quihin de ichi cuahān jicá de. <sup>16</sup>Te mozo jeē ní quihin uhūn mil xūhún, ni sájniñu de jín. Te ni nihín de uhūn gā mil síquī. <sup>17</sup>Te mozo jeē ní quihin uū mil xūhún, suni ni nihín de uū gā mil síquī. <sup>18</sup>Te mozo jeē ní quihin iin mil xūhún, ni jehēn de ni jete de yaū, te ni chisáhí de xūhún patrón de.

<sup>19</sup>Te ni yāha cuehē tiempo, te ni ndee patrón mozo un jínáhan. Te

ni nandacān de cuenta nuū i. <sup>20</sup>Te ni quee mozo jeē ní quihin uhūn mil xūhún un, te ni nacuaħa de xūhún un núū patrón de jíin úhūn gā mil jeē ni níhīn de síquī. Te ni cahān de: Ni jēhe ní úhūn mil nuū ná, te yāha íyó úhūn gā mil jeē ni níhīn na síquī. Achí de. <sup>21</sup>Te ni cahān patrón jíin de: Iyó váha núu súcuan. Yōhyo váha mozo cúu ró jēē squícu váha ró. Chi váha ni squícu ró ĩn jniñu lúli-ni, te vijna te cuāha ri jniñu jéhnū ndacu ró. Te quīvī ró núū cusīī ni rō jíin rí. Achí de. <sup>22</sup>Yūcuán na te ni quee mozo jeē ní quihin uū mil xūhún un. Te ni cahān de: Ni jēhe ní úū mil nuū ná, te yāha íyó úū gā mil jeē ni níhīn na síquī. Achí de. <sup>23</sup>Te ni cahān patrón jíin de: Iyó váha núu súcuan. Yōhyo váha mozo cúu ró jēē squícu váha ró. Chi váha ni squícu ró ĩn jniñu lúli-ni, te vijna te cuāha ri jniñu jéhnū ndacu ró. Te quīvī ró núū cusīī ni rō jíin rí. Achí de. <sup>24</sup>Te ni quee mozo jeē ní quihin ĩn mil xūhún un, te ni cahān de jíin patrón: Je jíin na níhīn jēē téē xeēn cúu ní. Chi cuehē gā cuní ni vēsú jeē cúu sáha mozo ni, te cuehē gā nāndacān ní vēsú jeē ni jēhe ní. <sup>25</sup>Te jeē yúcuan ní yūhu ná, te ni jehēn na ní chisāhi ná xūhun ní chiji ñuhun. Te yāhá na nācuāha na xūhun ní. Achí de. <sup>26</sup>Te ni cahān patrón jíin de: Mozo cuxí cúu ró te máni jniñu néē sáha ró. Chi jéni ni rō jeē cuehē gā cuní rī vēsú jeē cuu sáha mozo rī, te cuehē gā nāndacān rī vēsú jeē ni jēhe rī. <sup>27</sup>Núu jeē ni chúne ró xūhun rí nuū banco nuú, te jeē ní ndee rī te naquihin rí xūhun rí nde jíin séhe xūhun núú.

Achí de jíin i. <sup>28</sup>Te ni cahān de jíin táca gá mozo de: Núu súcuan te quende rō mil xūhun jíinā nuū i, te cuāha ro núū mozo névāha uxī mil. <sup>29</sup>Chi ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vēsú jecu jeē névāha i. <sup>30</sup>Te mozo yáha jēē tu sájniñu váha, quenehen ró i na quíhīn i nuū quéhe nuū néē. Te yúcuan ndáhyū i te nacayīhí yuhu i jeē ndoho xeēn i. Achí patrón un.

### Siquī jeē cóo juicio tācá nación

<sup>31</sup>Te ni cahān gā yā:

Īn quivī te ndiji máá Yaā ní nduu tēē, te cuu ya Rey nuū ñáyuu. Te tācá ndajéhé yā cuiñi ní xiin ya. Te cucōo ya mesa nuū ndácu ya jniñu, te yōhyo luu kujéhnū ya. <sup>32</sup>Te ndutútú ñayuu tācá nación nuū yā. Te sásīn ya i jíjnáhan i, nájñūhun cúsfīn lanchi jíin ndixúhú sáha tēē ndíto ti. <sup>33</sup>Te ñayuu váha jeē cúu nájñūhun lanchi, chucú yá i lado váha ya. Te ñayuu neé jeē cúu nájñūhun ndixúhú, chucú yá i lado jecó yá. <sup>34</sup>Yūcuán na te cahān Rey jíin ñáyuu cáhiin lado váha ya: Nacā ndetū rō jeē ni sáha Tátá rī jíin ró. Nehen quīvīcoo ró núū ndácu ró jniñu. Chi nde quivī ní jecōo ñayīví te je ni sātūhva ya nuū ndacu ró jniñu. <sup>35</sup>Chi ni jīi rī sōco, te ni cajēhe ro jēē ní yeji rī. Ni jichī rī ndute, te ni cajēhe ró jēē ní jihī rī. Ni quiji rī nde ñuu jicá, te ni cajēhe núú ró vehe ni ndōo rī. <sup>36</sup>Ni cumanī sahma rī, te ni cajēhe ró. Ni cocuhū rī, te ni jecōndēhe ró ruhū. Ni ine rī vecāa, te suni ni jecōndēhe ró ruhū. Súcuan cahān

yā jín ñáyuu cáhiin lado váha ya. <sup>37</sup>Yūcuán na te cahān ñáyuu váha un jín yá: ¿Na quivī ní cajito ná níhín jéē jī ni sóco, te ni cajēhe na jéē ní yeji ní, chí jéē jichí ni ndute, te ni cajēhe ná ní jihi ní? <sup>38</sup>¿Te na quivī ní cajito ná jéē ní quiji ní ndé ñuu jicá, te ni cajēhe núú ná vehe ni ndōo ní, chí jéē cúmani sahma ní, te ni cajēhe ná? <sup>39</sup>¿Te na quivī ní cajito ná jéē cuhú ni, chí jéē íne ní vecāa, te ni jecondēhe ná nihín? achi i. <sup>40</sup>Yūcuán na te cahān Rey jín i: Jendaá cahán rī jín ró jéē ná ni casáha ró súcuan jín iin tācá hermano rī jeē cácanđíje, vēsú ñáyuu núu ga cúu i, te nuū maá rí ni casáha ró.

<sup>41</sup>Yūcuán na te suni cahān Rey jín ñáyuu cáhiin lado jecó yá: Ñáyuu jnahnū ndetū cácuu ró. Cujíyo quingoo ró núū ñuhún jeē cayú ní cáni, nuū iyó túhva cone jexeén jín táca táchī jeē cájejnīñu nuū. <sup>42</sup>Chi ni jī rī sōco, te tu ní cájēhe ro jéē cáji rī. Ni jichī rī ndute, te tu ní cájēhe ro jéē coho rī. <sup>43</sup>Ni quiji ri nde ñuu jicá, te tu ní cájēhe núú ró vehe ndōo rī. Ni cumani sahma ri, te tu ní cájēhe ró. Ni cocuhū rī, ni ine ri vecāa, te tu ní jécondēhe ró ruhū. Súcuan cahān yā jín ñáyuu cáhiin lado jecó yá. <sup>44</sup>Yūcuán na te cahān ñáyuu un jín yá: ¿Na quivī ní cajito na níhín jéē jī ni sóco, chí jéē jichí ni ndute, chí jéē ní quiji ní ndé ñuu jicá, chí jéē cúmani sahma ní, chí jéē cuhú ni, chí jéē íne ní vecāa, te tu ní cájēhe na jéē cúmani nuū ní? Achi i. <sup>45</sup>Yūcuán na te cahān yā jín i: Jendaá cahán rī jín ró, jeē tu ní casáha ró súcuan jín ni iin

tācá hermano rī jeē cácanđíje, vēsú ñáyuu núu ga cúu i. Núu súcuan te suni nuū maá rí cúu jeē tu ní casáha ró, achi yā. <sup>46</sup>Yūcuán na te quingoo ñáyuu un núū ndóho i ní cáni. Te ñáyuu váha un quívicoo i nuū cótecu i ní cáni. Achí Jesús.

### Jeē ní casquijnáhan de jñuhun jeē jñii de Jesús

(Mr. 14.1-2; Lc. 22.1-2; Jn. 11.45-53)

**26** Te nuū ní ndihī ni cahān Jesús táca jñuhun yáha, te ni cahān yā jín tée cáscuáha jín yá:

<sup>2</sup>Je cájini rō jeē uū na quivī te coo vico pascua. Te ruhū, Yaā ní nduu tēe, nastúu i ruhū jeē cúu rī jicā cruz, achí yá.

<sup>3</sup>Yūcuán na te sutū cácujeñhu, jín tée cástéén tutu ley, jín táca tée jéñhu jeē cándacu jñiñu nuū ñáyuu hebreo, ni candutútú de ini patio vehe palacio maá sūtū cujéñhu ga jeē naní Caifás. <sup>4</sup>Te ni candajnūhún de ndese jñii de Jesús jín jñuhun stáhú, te cahni de ya.

<sup>5</sup>Te ni cacahān de:

Ma jñii yó de máá quivī víco, chi ndonda ñáyuu siquī yō, achí de.

### Jñuhun ñahan jeē ní chuhun perfume xinī yā

(Mr. 14.3-9; Jn. 12.1-8)

<sup>6</sup>Te íne Jesús ñuu Betania vehe Simón, tēe ni ndoho cuehyī stehyú. <sup>7</sup>Te ni quee iin ñahan nuū yā, ndáhá ña iin frasco yuū luu jeē ñuhun aceite perfume jeē yóhyo yahu ndéé. Te ni chuhun ña xinī yā níní jéē yéji yā staā. <sup>8</sup>Te ni cajito tēe cáscuáha jín yá, te ni caquitī ni de, te ni cacahān de:



¿Najehē cúu jeē náā saá-ni perfume jiñā? <sup>9</sup>Chi cuu xicó yahu yó núú, te cuāha yo xúhun núú ñáyyuu ndahú. Achí de.

<sup>10</sup>Te ni jini Jesús jñuhun cácahān de. Te ni cahān yā jíin de:

¿Naun cásáha ró jéē nácani uhū ni ñahan yáha? Chi ñin jniñu váha cúu jeē ni sáha ña jíin rí. <sup>11</sup>Chi níni coyūcu ñáyyuu ndahú jíin ró, te ruhū chi tuá condee rí jíin ró. <sup>12</sup>Chi jeē ní chuhun ña perfume yáha ruhū, suu cúu jeē ni sátūhva ña ruhū nde quivī quíndūji ri. <sup>13</sup>Jendaá cahán rí jíin ró jeē ní cáhnu ñayīvi ndé-ni cúu nuū cuité jñuhun yáha jéē jnáma ri ñayuu, suni nacani i jñuhun jeē ni sáha ñahan yáha, návāha cocuhun ni ñayuu ña, áchí yá.

#### Jeē ní nastúu Judas yā

(Mr. 14.10-11; Lc. 22.3-6)

<sup>14</sup>Yūcuán na te ñin jeē ndihúxi uū tēe cáscuáha ún, nání de Judas Iscariote, ni jehēn de nuū sutú cácujeñhu. <sup>15</sup>Te ni cahān de jíin:

¿Nasaa cuāha ní nuū ná, te na nastúu ná de nuū ní? áchí de.

Te ni cajēhe ocō uxī xúhun plata nuū de. <sup>16</sup>Yūcuán na te nde quivī un ní quejéé de ndúcú de modo ndese nastúu de ya nuū sutú jijnáhan.

#### Jeē ní jequin yā Cena yā

(Mr. 14.12-25; Lc. 22.7-23;

Jn. 13.21-30; 1 Co. 11.23-26)

<sup>17</sup>Te máá quivī jeē quejéé vico jeē cáyeji ñayuu pan jeē tú na levadura yíhi, te ni quijicoo tēe cáscuáha un núú Jesús. Te ni cacahān de jíin yá:

¿Ndé nuū cuní ni jéē quísatūhva ná cuxíni ní vico pascua? áchí de.

<sup>18</sup>Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jíin de: Achí máá Maestro jeē ní cuyajni quivī cuu yā. Te vijna te caji yā vico pascua ini vehe ní jíin tēe cáscuáha jíin yá, achi rō. Achí yá.

<sup>19</sup>Te tēe cáscuáha jíin yá, ni casáha de nájnūhun ni ndacu Jesús jniñu nuū de, te ni casátūhva de jeē cuxíni ya vico pascua.

<sup>20</sup>Te jeē cuácuaa, te ni quee yā, te ni cucōo ya mesa jíin ndihúxi uū tēe cáscuáha jíin yá. <sup>21</sup>Te níni yéji yā jíin de te ni cahān yā:

Jendaá cahán rí jíin ró jeē ñin rōhó nastúu ruhū vijna, áchí yá.

<sup>22</sup>Te ni cacucuíhyá ndasí ni de. Te ná ñin ná ñin de ni cacajñuhún de ya:

¿A sáña cúu? áchí de.

<sup>23</sup>Te ni cahān yā:

Ñin rōhó jéē cáyeji cáhnu jíin rí ñin cohō, suu ró nastúu ruhū. <sup>24</sup>Te ruhū, Yaā ní nduu tēe, jendaá cúu jeē quihín rí cuu rí, nájnūhun yósó jñuhun ri nuū tútu ii. Te nacā xeēn ndoho tēe nastúu ruhū. Váha ga núu tu ní cácu tēe un núú, áchí yá.

<sup>25</sup>Yūcuán na te ni cahān Judas, tēe nastúu ya:

¿A sáña cúu, Maestro? achí de.

Te ni cahān yā jíin de:

Suu ró cúu, áchí yá.

<sup>26</sup>Te níni jéē cáyeji de jíin yá, te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chi yáha cúu yiqui cúñu rí, achí yá.

<sup>27</sup>Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jijnáhan ró. <sup>28</sup>Chi yáha cúu niñi rī jeē cuáha ri jeē cúu contrato jeé, te cati jeē ndundoo cuēchi cuehē ñayuu, te coo jñuhun cáhnu ni nuū cuēchi i. <sup>29</sup>Te cáhán rī jín ró jeē ndé vijna te ma cóho ga rī ndūxi ndehē uva yáhá, chi nde quiji quivī ndacu Tátá rī jniñu ní ñayiví, te sáa te coho tucu ri jín ró jijnáhan ró. Achí yá.

**Jeē ní cachi yā jeē yūhu Pedro cahān de jeē jíní de ya**

(Mr. 14.26-31; Lc. 22.31-34; Jn. 13.36-38)

<sup>30</sup>Te ni jita ya iin yaa iī jín de jijnáhan de. Te ni quenda ya cuahān yā jín de nde yucu Olivos.

<sup>31</sup>Yūcuán na te ni cahān yā:

Ndivii rō nayūhu ró jeē siquí ruhū jecuáa vijna. Chi suhva je yósó jñuhun ri nuū tútu iī, ni cahān Yaā Dios: Cuáha ri jñuhun jeē cáhni ñayuu tēe ndíto lanchi, te lanchi un cuítē núu tī jeē yūhu tí, achí. <sup>32</sup>Te jeē nátecu rī, te xihna ruhū cosnūu rí quihīn rī región Galilea, te sáa te najinūcoo ró, achí yá.

<sup>33</sup>Yūcuán na te ni cahān Pedro:

Vēsú ndihī de na náyūhú de, te maá ná chi ma náyūhú cuítī ná, achí de jín yá.

<sup>34</sup>Te ni cahān yā jín de:

Jendaá cahán rī jín ró jeē jecuáa vijna, nde ná tu cana líhli, te yūhu ró jeē jniñ ñayuu rohó, te unī jínu cahān rō jeē tu jíní rō ruhū, achí yá.

<sup>35</sup>Te ni cahān Pedro jín yá:

Vēsú núu cuu na jín ní, te ma cahán cuítī na jēe tu jíní na níhín, achí de.

Te suni súcuan ni cacahān ndihī tēe cáscuáha jín yá.

**Jeē ni jicān tahú yā nuū huerto Getsemaní**

(Mr. 14.32-42; Lc. 22.39-46)

<sup>36</sup>Yūcuán na te ni jinū Jesús jín tēe cáscuáha jín yá iin lugar nuū naní Getsemaní. Te ni cahān yā jín de:

Yáhá-ni cucōo ró, te na quihín rī yūcuan cácan tahú rī, achí yá.

<sup>37</sup>Te ni jeca ya Pedro jín ndindúú séhe Zebedeo cuahān yā jín de. Te ni quejéé yá cucuíhyá ndasí ni yā te cúxií ni yā jeē quíji jñundóho siquí yā. <sup>38</sup>Yūcuán na te ni cahān yā jín de:

Yōhyo cúcuíhyá ni rī, te ndúcú sáha jeē cúu rī. Yáhá condetu ró te condito ró jín rí.

<sup>39</sup>Te ni jica ya jecu gā, te ni jecuññ yití yá ni jequin ya nuū yā nuū ññuhun, te ni jicān tahú yā suhva nuū Yaā Dios:

Tátá maá ná, núu cuu te tejiyo ní jñundóho yáha jēe ma quíji siquí ná. Te nasūu jēe cuní maá ná, chi jeē cuní maá ní na cóo, achí yá.

<sup>40</sup>Yūcuán na te ni ndee yā nuū ndinúní tēe cáscuáha jín yá, te ni jito ya jeē cáquixi de. Te ni cahān yā jín Pedro:

¿A tu ní cánda ró condito ró jín rí vēsú iin hora? <sup>41</sup>Coo ndito ni rō te cacān tahú rō jeē chindéé ñáhán yá rohó jēe ma sáha ró cuēchi jeē coto ndee jeneé rōhó. Chi cuní ndije ánuá rō squícu vāha ró, te yiqui cúñu rō chi tu fuerza, achí yá.

<sup>42</sup>Te ni jehēn tucu ya vuelta uū, te suhva ni jicān tahú yā:

Tátá maá ná, te núu ma cúu cujiyo jñundóho yáha jeē ma ndóho

ná, te na cóo jeē cuní maá ní núu súcuan, áchí yá.

<sup>43</sup>Te ni ndee tucu ya nuū de, te ni jito ya jeē cáquixí tucu de, chi yōhyo cájii de māhná. <sup>44</sup>Te ni stóo ya de, te cuahān tucu ya cuacacān tahú yā vuelta unī. Te suni jnūhun yúcuán ní cahān yā. <sup>45</sup>Yūcuán na te ni ndee tucu ya nuū de jijnáhan de, te ni cahān yā jíin de:

Vijna te cusū rō te ndetātu ró. Te je ni quee hora, te ruhū, Yaā ní nduu tēe, natūu ri te jniī tēe cáhīyo cuēchi ruhū. <sup>46</sup>Ndocuiñī jijnáhan ró, chi je vēji tēe nastúu ruhū, te quihīn yō jíin de, áchí yá.

#### Jeē ní cajniī de Jesús

(Mr. 14.43-50; Lc. 22.47-53; Jn. 18.2-11)

<sup>47</sup>Te sá cáhán gā yā súcuan, te ni quee-ni Judas, iin jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujuhnu jíin táca tēe jéhu cándacu jniñu nuū ñáyuu hebreo, ni catají tēe ún. <sup>48</sup>Te Judas, tēe nástuu ya ún, je ni jēhe de iin seña nuū tēe un jijnáhan, chi ni achi de:

Tēe jeē téchūhu rí un cúu. Te jniī ró jijnáhan ró, áchí de.

<sup>49</sup>Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. <sup>50</sup>Te ni cahān Jesús jíin de:

Amigo, ¿na jniñu vēji ró? áchí yá.

Yūcuán na te ni jinūcoo tāca gá tēe ún, te ni cajniī de Jesús.

<sup>51</sup>Te iin tēe jeē cáhiin jíin Jesús, ni tava de espada de, te ni jehnde de sōho iin mozo maá sūtū cujéhu ga.

<sup>52</sup>Yūcuán na te ni cahān Jesús jíin de:

Nachuvāha espada rō, chi tāca jeē cájejnáhan jíin espada, suni jíin espada cuu. <sup>53</sup>¿Te á tu cájini rō jeē cuu cacān tahú rī nuū Tatá rī, te vijna ñuhún tají yá víhyá gā uxí uū mil ndajéhé andiví jeē jnama ruhū? <sup>54</sup>Te núu súcuan, ¿te ndese cuu squícu jnūhun cáhán tutu iī jeē cánuú ndoho ri súcuan? áchí yá.

<sup>55</sup>Yūcuán na te ni cahān yā jíin ñáyuu cuehē ún:

¿Te va tēe cuíhná cúu ri jeē véjicoo ró jíin espada jíin yujnu jeē jniī ró rúhū jeē súcuan. Tāca quívī ni cucōo ri jíin ró jijnáhan ró ini templo cáhnu, ni steén rī jnūhun, te tu ní cájniī ró rúhū. <sup>56</sup>Te súcuan cáśáha ró návāha na squícu jeē cáhán tutu iī jeē ní catee tēe ni canacani jnūhun Yaā Dios, achí yá.

Yūcuán na te ndihi tēe cáscuáha jíin yá, ni castóo de ya, ni cajinu de cuangoo de.

#### Jeē ní indichi Jesús nuū junta tēe cácujuhnu ga

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup>Te tēe ni cajniī Jesús, cuangoo de jíin yá nuū Caifás, tēe cúu sutū cujéhu ga. Te yūcuan cáhiin tútū tēe cástéén tutu ley jíin táca tēe jéhu cándacu jniñu. <sup>58</sup>Te Pedro chi jícá-ni ndíquín de ya, te ni jinū de patio sutū cujéhu ga. Te ni quívī de ini patio, te ni cucōo de jíin táca policía, návāha coto de ndese coo síquī yā.

<sup>59</sup>Te sutū cácujuhnu jíin táca tēe jéhu jíin ndihi tēe cáśáha junta cujéhu ga, ni canducú de tēe cahān jnūhun yáá síquī Jesús, chi cahni de ya cácuni de. <sup>60</sup>Te vēsú ni

quecoo cuehē ñayuu cácahān yaá, te tu ní cánihīn de cuēchi siquī yā jeē cáhni de ya. Te jeē sándīhí te ni quecoo uū testigo jeē cahán yaá síquī yā. <sup>61</sup>Te áchí:

Tēe yáha ní cahán de jeē cuu canu de templo Yaā Dios, te nuū unf-ni quivī te nucondichi sáha de, áchí.

<sup>62</sup>Yūcuán na te ni ndocuiñī maá sūtū cujéhnu ga, te ni cahán de jíin yá:

¿Naun tu cáhán cuiti rō? ¿A íyó ndāā jeē cácahān tēe yáha síquī rō? Achí de.

<sup>63</sup>Te Jesús tu ní cáhán cuiti yā. Te ni cahán maá sūtū cujéhnu ga:

Ndácu ri jniñu nuū rō jeē cahán ndāā rō cuni nahín maá Yaā Dios, Yaā técu. Cachi cají te núu máá ró cúu Cristo, Sēhe Yaā Dios, achí de jíin yá.

<sup>64</sup>Te ni cahán yā:

Suu ri cúu, nájñuhun cáhán rō. Te na cástūhun rí nuū rō jijnáhan ró jēē tāca quívī jeē quíji te coto ró rúhū, Yaā ní nduu tēe, condee rī lado váha Yaā iyó poder. Te coto ró jēē ndíji ri ichi ándiví jíin vícō. Achí yá.

<sup>65</sup>Yūcuán na te sūtū cujéhnu ga ni jehnde de sahma de jeē quití ndasí ni de, te ni cahán de:

Tēe yáha chi cáhán de jñuhun ndevāha jeē quití ni Yaā Dios, chi sáha de máá de Sēhe Yaā Dios. ¿Nde jíni nūhún gá yō testigo núu súcuán? Chi je ni cajini ró jñuhun ndevāha cáhán de. <sup>66</sup>¿Te ndese cájeni ni rō? achí de.

Te ni cacahán tēe cuehē ún:

Cuēchi cúu jeē cahán de súcuán, te jíni nūhún cuu de, áchí.

<sup>67</sup>Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. <sup>68</sup>Te ni cacahán de:

Te núu Cristo cúu ró, te cachi rō ndé iin cúu jeē ní cani rōhó, áchí de.

**Jeē ní cachi Pedro jeē tu jíin de ya**

(Mr. 14.66-72; Lc. 22.56-62;

Jn. 18.15-18, 25-27)

<sup>69</sup>Te níni jēē súcuán cúu, te Pedro néne de nuū quéhe ini patio. Te ni quee iin ñahan jéjníñu vehe ún, te ni cahán ña jíin de:

Róhó chi suni ni jica ró jíin Jesús tēe Galilea, achí ña.

<sup>70</sup>Te máá de tu ní cáchi de, chi ni cahán de ni cajini ndíhi ñayuu:

Tu jíin rī na jñuhun cáhán rō, achí de.

<sup>71</sup>Te ni quenda de yéhyí núu quéhe, te ni jito inga ñahan nuū de. Te ni cahán ña jíin ñayuu cáhiin yūcuán:

Tēe yáha chi suni ni jica de jíin Jesús, tēe ñuu Nazaret, achí ña.

<sup>72</sup>Te inga jíinu tu ní cáchi tucu de, chi sa ni cahán teyí de:

Tu jíin rī tēe ún, áchí de.

<sup>73</sup>Te ni cunúu jecu gā, te ñayuu cáhiin yūcuán ní quecoo i nuū Pedro, te ni cacahán i:

Jendaá ndije jeē suni jñahan tēe un cúu ró, chi ndijin cahán rō jeē tēe Galilea cúu ró, áchí i.

<sup>74</sup>Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndāā de:

Tu jíin cuiti rī tēe ún, áchí de.

Te ni cana-ni líhli. <sup>75</sup>Te ni nucūhun ni de jñuhun ni cahán Jesús jíin de: Nde ná tu cana líhli,

te yūhu ró te cahān rō unī jínu jeē tu jíní rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

### Jeē cuángoo de jín yá nuū Pilato

(Mr. 15.1; Lc. 23.1-2; Jn. 18.28-32)

**27** Yūcuán na te ni cundijin. Te tāca sūtū cácujeñhu jín táca tée jéñhu jeē cándacu jniñu nuū ñayuu hebreo, ni casquijnáhan de jñuhun ndese sáha de jeē cuu Jesús. <sup>2</sup>Te ni cajihni de ya, te cuangoo de jín yá nuū Poncio Pilato, tēe cúu gobernador.

### Jeē ni jíhī Judas

<sup>3</sup>Yūcuán na te Judas, tēe ni nastúu ya un, ní jito de jeē ní cunihin siquī yā jeē cúu yā. Te ni jnahuhū ni de, te ni nacuāha de ocō uxī xūhun plata jeē ni níhīn de nuū sutú cácujeñhu jín núu tāca tée jéñhu. <sup>4</sup>Te ni cahān de jín:

Cuēchi ni sáha ná jéē ní nastúu ná iin tēe cuu de, te tú na cuēchi de.

Te máá sūtū un ní cacahān de:  
¿Vé jítú ni ruhū? Cuēchi máá ró cúu. Achí de.

<sup>5</sup>Te ni scāne Judas xūhún un ini templo. Te ni quenda de cuahān de, te ni scuēhne de máá de.

<sup>6</sup>Te sutū cácujeñhu ni canastútú de xūhún un, te ni cacahān de:

Ma cúu chuhun yó xūhun yáha ini jejnū nuū cásocō ñayuu, chi xūhun jéē ni jéconā jeē cúu iin tēe cúu, achí de.

<sup>7</sup>Yūcuán na te ni casándaā de jeē xūhun yúcuán cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá. <sup>8</sup>Jeē yúcuán cúu jeē ndé

vijna nání ñuhun ún Lugar Ñuhun Niñí. <sup>9</sup>Te súcuán ni squícu jñuhun ni cahān Jeremías, tēe ni nacani jñuhun Yaā Dios nde jenahán: Ni caquihin de ndihócó uxī xūhun plata, te súcuán-ni cúu iin yāhu jeē ní casáha ñayuu Israel cuenta jeē ndeé yā nuū i. <sup>10</sup>Te jín xūhun un ní cajeen de ñuhun quíxin, nájñuhun ni ndacu máá Jítóho yō Yaā Dios jniñu nuū rī. Achí Jeremías.

### Jeē ní indichi Jesús nuū Pilato

(Mr. 15.2-5; Lc. 23.3-5; Jn. 18.33-38)

<sup>11</sup>Te nuū ní jinūcoo de jín Jesús nuū gobernador, tēe cúu Pilato, te ni cajñuhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájñuhun cáhán rō.

<sup>12</sup>Te sutū cácujeñhu jín tée jéñhu cándacu jniñu, ni cacahān de cuēchi siquī yā. Te tú na vé ni cáhán cuiti yā. <sup>13</sup>Yūcuán na te ni cahān Pilato jín yá:

¿A tu jíní ró jéē cacahān de cuehē cuēchi siquī rō? achí de.

<sup>14</sup>Te tu ní cáhán cuiti yā ni iin jñuhun jín de. Te nahán ní naa ni gobernador jeē tú na vé ni cáhán yā jín de.

### Jeē ní cundaā jeē cúu yā

(Mr. 15.6-20; Lc. 23.13-25; Jn. 18.38-19.16)

<sup>15</sup>Te iyó costumbre gobernador jeē quivī víco un siáá de iin tēe íne vecāa, núu na-ni tēe cáconi ñayuu.

<sup>16</sup>Te suu quivī un iyó iin tēe íne vecāa, nání de Barrabás, te je ni jité núu jñuhun jeē ni sáha de cuēchi xeēn. <sup>17</sup>Te nuū ní candutútú ñayuu, te ni cahān Pilato jín i:

¿Ndé tée cécuni rō jeē siaá rī vijna: á Barrabás, chí Jesús jeē cúu Cristo, Yaá ní tají Yaá Dios? achí de.

<sup>18</sup>Súcuan ni cahān de chí cúní de siaá de Jesús. Chí je ni jecūhun ni de jeē ní cacucuésun ni tāca sūtū un cájito de ya, te jeē yúcuan ní quijicoo jíin yá nuū de.

<sup>19</sup>Te níní jéē néne Pilato silla nuū sándaā de jniñu, te ñasihí de ni tají ña jñuhun nuū de: Ma quívi nduu rō jíin ñáyuu siquī tée ndaā jiñā, chí yōhyo ni siūhu jéni ruhū cuni jeē siquí de, áchí ña.

<sup>20</sup>Te sutū cácujuhnu jíin táca tée jéhnú, ni cascáhán de ñáyuu jeē na cacán i jeē siaá de Barrabás, te na cúu Jesús. <sup>21</sup>Yūcuán na te ni cajñuhún tucu gobernador:

Jeē uú de, ¿ndé ñin de cécuni rō jeē siaá rī? achí de.

Te ni cacahān i:

Siáá ni Barrabás, achí i.

<sup>22</sup>Te ni cajñuhún Pilato:

Núu súcuan te ¿ndese cécuni rō jeē sáha ri jíin Jesús, tēe cúu Cristo? achí de.

Te ni cacahān ndíhi i:

Cata caa ní de jicā cruz, na cúu de, áchí i.

<sup>23</sup>Yūcuán na te ni cahān Pilato:

¿Na cuēchi ni sáha de núu súcuan? achí de.

Te ñáyuu un ní cacana jee ndasí i:

Cata caa ní de jicā cruz, na cúu de, áchí i.

<sup>24</sup>Te ni jini Pilato jeē tu cúndeyí de jíin ñáyuu, chí sa víhyá gā cácuvaā i. Te ni ndacu de jniñu jeē na quíji ndute, te ni nandahá de nuū ñáyuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee siquī rī jeē cúu

tēe vāha yāhá. Chí siquī maá ró jíináhan ró na cóndee. Achí de.

<sup>25</sup>Te ni cacahān ndíhi ñáyuu:

Suu siquī maá ná jíin síquī séhe ná na cóndee cuēchi jeē cúu de, áchí i.

<sup>26</sup>Yūcuán na te ni siaá de Barrabás. Te ni ndacu de jniñu jeē na cáni táca soldado un Jesús, jíin jéē cáta caa de ya jicā cruz.

<sup>27</sup>Yūcuán na te soldado un cuangoo de jíin Jesús ini palacio. Te ni cacana de ndíhi jnáhan de ni candutútú núu yā. <sup>28</sup>Te ni caquenehen de sahma ya, te ni cachuhun de ya ñin sahma cuehé jeē cúu sahma rey. <sup>29</sup>Te ni casáha de ñin corona ñnu, ni cachuhun de xiní yā. Te ni cachihi de ndaha váha ya ñin yujnu jeē nájnūhun bastón. Te ni casácatā de nuū yā, chí ni cajecuiñí yití de, casáha de jeē chiñuhún de ya.

Nacā jeē váha rey cúu Rey ñáyuu hebreo, achí de.

<sup>30</sup>Te ni catesihí de nuū yā. Te ni caquihin de yujnu jeē ní cachihi de ndaha ya, te ni cacani de xiní yā.

<sup>31</sup>Te nuū ní cuu ni casácatā de nuū yā, te ni catava de sahma cuehé un, te ni canachuhun de ya sahma máá yá. Te cuangoo de jíin yá jeē cata caa de ya jicā cruz.

**Jeē ní cacata caa de ya jicā cruz**

(Mr. 15.21-32; Lc. 23.26-43; Jn. 19.17-27)

<sup>32</sup>Te nuū ní quendacoo soldado un jíin yá, te ni canajnáhan de jíin ñin tēe ñuu Cirene, naní de Simón. Te ni catejñínu de tēe un jéē cóndiso de cruz yā.

<sup>33</sup>Te ni jinūcoo de ñin lugar nuū naní Gólgota, jeē cuní cahān Lugar

Yiqui Xíní. <sup>34</sup>Te ni cajēhe de vino jeē ni sácā núu jíin iin jeē uvuá jeē cóho ya. Te nuū ní jito ndee ya, te tu ní cúní yā coho ya.

<sup>35</sup>Te nuū ní cuu ni cacata caa de ya jicā cruz, te ni casáha de sorteo jeē siquí ndese nihīn iin iin de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquí ndese nihīn iin iin de sahma ri, achí yā, achí tutu.

<sup>36</sup>Yūcuán na te ni cacucōo de yūcuan jēē cóto de nde cuu yā. <sup>37</sup>Te ni catee de iin jnūhun xinī cruz yā jeē cahán na siquí ni jíhi yā: Yāha cúu Jesús, Rey ñayuu hebreo, achí.

<sup>38</sup>Te suni ni cacata caa de uū tēe cuíhná núu uū gā cruz, iin de lado váha ya, te inga de lado jecó yá.

<sup>39</sup>Te ñayuu cáyāha yūcuan cáscuicó i xinī i, te cacahān neé i:

<sup>40</sup>Róhó chi cáhán rō jeē cánu rō templo cáhnu, te nuū uní quivī te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jíicā cruz vii, achí i.

<sup>41</sup>Te sutū cácujuhnu, jíin tēe cástéén tutu ley, jíin tēe grupo fariseo, jíin tēe jēhnu jíjnáhan de, suni súcuan ni cacahān catá de, te achí de cacahān maá de:

<sup>42</sup>Núu inga ñayuu ni jnama de, éte naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de. <sup>43</sup>Ni candíje de Yaā Dios, te na jnáma ya de vijna te núu cundáhu ni yā de, chi ni cahān de jeē cúu de Sēhe ya. Achí de jíjnáhan de.

<sup>44</sup>Te tēe cuíhná jeē cándita caa xiin ya, suni súcuan ni cacahān neé de.

### Jeē ni jíhi Jesús

(Mr. 15.33-41; Lc. 23.44-49; Jn. 19.28-30)

<sup>45</sup>Te nuū ní cuu cahuxí uū, te ni cunee ní cáhnu nde cahunī. <sup>46</sup>Te nájñūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

<sup>47</sup>Te sava ñayuu cáhiin yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, achí i.

<sup>48</sup>Te ni jinu-ni iin tēe, ni jequihin de iin cachí, te ni chundaji de nuū vinagre iyá. Te ni tee de xinī iin yujnu, te ni tee de yuhu ya jeē coho ya. <sup>49</sup>Te sava ga de ni cacahān:

Condetu ró, na cóndēhe yó núu quiiji Elías jnama de chí tuú, achí de.

<sup>50</sup>Te Jesús ni cana jee ya inga jínu, te ni jíhi-ni ya. <sup>51</sup>Te sahma ndíta caa jeē ndihyú cuarto ii ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catahū sáva toto. <sup>52</sup>Te ni cananune yaū nuū yíndūji ndīyi. Te cuehē ndīyi jeē ní cacandíje i Yaā Dios, ni canatecu i. <sup>53</sup>Te nuū ní natecu Jesús, te ni quendacoo i nuū yíndūji i. Te ni ndīvicoo i ini ñuu ii Jerusalén, te cuehē ñayuu ni cajito nuū i.

<sup>54</sup>Te ná ni jíhi Jesús, te tēe cúu capitán jíin tēe cáhiin jíin de jeē cándito de nde cuu yā, ni cajini de jeē ni jnáa, jíin táca gá jniñu ní cuu. Te yōhyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yáha, achí de.

<sup>55</sup>Te yūcuan cáhiin cuehē ñahan, cándēhe jíca ña. Te suu ñahan un ní candiquín ña Jesús nde Galilea, vējicoo ña cájejniñu ña nuū yā. <sup>56</sup>Te unī ñahan un cácuu María ñuu Magdala, jíin María naná Jacobo jíin José, jíin naná ndindúú séhe Zebedeo.

### Jeē ní quindūji Jesús

(Mr. 15.42-47; Lc. 23.50-56; Jn. 19.38-42)

<sup>57</sup>Te nuū ní ini quivī ún, te ni quee iin tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de. <sup>58</sup>Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. <sup>59</sup>Te José ni quihin de yiqui cúñu yā, te ni chusúcún de iin sahma cuitá íyo ndoo. <sup>60</sup>Te névāha de iin yaū jeē ní caan jeé jíca iin cava, nuū ná tu quindūji ndīyi. Te yūcuan ní chindūji de ya. Te ni jesi de iin yuū cáhnu yuhu yáú un, te cuahān de. <sup>61</sup>Te María ñuu Magdala, jíin inga María, cáyūcú ña ichi núu nuū yíndūji ya.

### Jeē ní cacondito soldado nuū yíndūji ya

<sup>62</sup>Te ni cuu tācá jniñu yāha máá quivī jeē casátūhva ñayuu jeē quiji quivī ndétātú. Yūcuán na te ni cundijin maá quivī ndétātú. Te sutū cácujuhnu jíin tēe grupo fariseo ni jengoo de nuū Pilato. <sup>63</sup>Te ni cacahān de:

Cánucūhun ni na jēe nde na técu tēe stáhú néé un te ni cahān de jeē nátecu de nuū unī quivī. <sup>64</sup>Núu sūcuan te ndacu ní jniñu na cóto vāha tācá soldado yuhu yáú un nde

núu ni yāha unī quivī. Chi núu tuú te sanaa te quijicoo tēe ni cascuáha jíin de, te tava cuihná de ndīyi ún jecuáa, quingoo de jíin. Yūcuán na te cachi de nuū ñayuu jeē ní natecu tēe ún. Te cáhú gá cuu jnūhun stáhú yūcuan vēsú jeē xíhna ñūhún. Achí de.

<sup>65</sup>Te ni cahān Pilato:

Yāha cáhiyo soldado. Cuángoo jíin de, te sácutú vāha ró yuhu yáú un, te coto vāha ró, núu ndese vāha ga cuu sáha ró. Achí de.

<sup>66</sup>Te cuangoo de, te ni casácutú de yuū jeē ndihyú yuhu yáú nuū yíndūji ya, te ni castiín nihin de. Te ni castóo de tācá soldado un cándito.

### Jeē ní natecu Jesús

(Mr. 16.1-8; Lc. 24.1-12; Jn. 20.1-10)

**28** Te ni yāha quivī ndétātú un, te ni cundijin quivī domingo. Te María ñuu Magdala jíin inga María un, ní jecondēhé ña nuū ní yíndūji Jesús. <sup>2</sup>Yūcuán na te iin sanaa-ni te ni jnāa nihin ndasí. Chi iin ndajéhé maá Jítóho yō Yaā Dios ni cuun ya ichi ándiví, ni quee ya nuū ní yíndūji Jesús. Te ni stāa ya yuū ndihyú yuhu yáú un, te ni cucōo ya siquē. <sup>3</sup>Te ndíndēe núu yā nájñūhun taja, te sahma ñūhun ya yaa quiyi nájñūhun yuhvā volcán. <sup>4</sup>Te soldado cándito yūcuan ní quisi i de jeē cáyūhú de cájito de ya. Te ni cacuu ndīyí de. <sup>5</sup>Te ni cahān ndajéhé jíin ndindúú ñahan ún:

Ma yūhu ró, chi jíin rī jeē vécondēhe ró Jesús, Yaā ni jíhi jíca cruz. <sup>6</sup>Tuá yā yāhá, chi je ni natecu yā, nájñūhun ni cahān yā. Nehen condēhe ró nuū ní cachindūji de



ya. <sup>7</sup>Te yachī quingoo ró, te cachi rō nuū tée cáscuáha jíin yá jeē ní natecu yā. Te xihna gā maá yá jinū Galilea, te sáá te najinūcoo de. Te yūcuán coto de nuū yā. Achi rō na cúni de. Je ni castūhun rí nuū rō, achí ndajéhé.

<sup>8</sup>Te ni quendacoo ña nuū ní yindūji ya, te yachī cuangoo ña. Te cáyuhú ña, te suni yōhyo cácusī ni ña. Te ni cajinu ña cuacastūhún ña nuū tée cáscuáha jíin yá. <sup>9</sup>Te níní cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya. <sup>10</sup>Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tācá hermano rī, tēe ni cascuáha jíin rí, jeē na nungoo de nde Galilea, te yūcuán coto de nuū rī. Achí yá.

#### **Jnūhun ní cacahān soldado**

<sup>11</sup>Te níní cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tācá jniñu jeē ní cuu. <sup>12</sup>Te sutū cácujuhnu ni candutútú de nuū táca tée jéhnú cándacu jniñu, te ni casquíjnáhan de jnūhun. Yūcuán na te ni cajēhe de cuehē xūhun núū soldado jijnáhan. <sup>13</sup>Te ni cacahān de jíin:

Cahān rō jijnáhan ró jēé tée cáscuáha jíin de ni quiicoo

jecuáa, te ni catava cuihna ndíyí un níní cáquixī rō, achi rō. <sup>14</sup>Te núu na cúni gobernador jnūhun yáha, te maá rí quiscahān rī de, návāha tú nihīn rō castigo jijnáhan ró. Achí de.

<sup>15</sup>Te soldado un ní caquihin de xūhún un, te ni cacachi de nájñūhun ni cacahān jíin de. Te nde vijna chi súcuan cacahān ñayuu hebreo nájñūhun ni cacahān soldado un.

#### **Jeē ní tejnīñu ya de nacani de jnūhun**

*(Mr. 16.14-18; Lc. 24.36-49; Jn. 20.19-23)*

<sup>16</sup>Te ndihúxí iin tēe ni cascuáha un cuánungoo de nde Galilea, nde yucu nuū ní cachi Jesús jeē quingoo de. <sup>17</sup>Te nuū ní cajito de nuū yā, te ni cachiñúhún de ya. Te sava de tu cácdíje vāha de jeē maá yá cúu. <sup>18</sup>Te ni quee ya nde nuū de, ni cahān yā jíin de:

Je ni jēhe Tátá rī ndihí poder nuū rī jeē ndácu ri jniñu andiví jíin ñáyiví. <sup>19</sup>Núu súcuan te cuángoo nuū ñáyuu tācá nación, te stéén rō jnūhun rí nuū i návāha na cándíje i. Te scuándute ró i jeē ní cacandíje i maá Tátá jíin Séhe jíin Espíritu Santo. <sup>20</sup>Te stéén rō nuū i jeē na cuátáhú i tācá jniñu ní ndacu ri nuū rō. Te cocuhun ni rō jeē maá rí íne ri jíin ró ní cáni nde quiví jíinu ñayiví. Achí yá. Te ni cuu. Amén.